

## **Matthew**

### **Matthew-el ingkwernek pip-warl**

### **Angka Akngey-kenh**

*Matthew-el angka ingkwernek, arrwekeleny-kenh angka ayntenharl, rarl awek-penh, ingkerrenhel Jesus renh iterl-aretyek, Akngey-kenh inngarl, rernem ingkerrenh itethirretyek ikwerenh-angkwarr, ikwerenh-angkwarr apente-tyek. Angka arrwekeleny Akngey-kenh ayntenharl, ra innganem irrek. Jew-rnem-tangkwel rernem itethirrek Jesus-wenyankel. Akngey ilkelheyel ahern-areny ingkerrenhek, renh-rnem itethiletyek. Alakenh-anyem ra Jesus renh thwenek ahern nhenh-warl, ingkerrenh itethile-tyek.*

#### *Jesus Christ-kenh*

#### *(Luke 3:23-38)*

<sup>1</sup> Arrwekeleny Abraham anenh. Abraham-they Jesus-kenh-rnem anenh arrpemarl, atyet-yart David-ek-atwety. Nhenh-rnem Jesus Christ-kenh,

<sup>2</sup> Abraham Isaac-kenh aynikw anenh. Isaac Jacob-kenh aynikw anenh. Jacob Judah-kenh aynikw anenh, alerikw ingwer-rnem-then Jacob-kenh.

<sup>3</sup> Judah Perez-kenh Zerah-kenh aynikw, Amikw ikwer-atherrenh Tamar. Perez Hezron-kenh aynikw, Hezron Ram-kenh aynikw.

- 4 Ram Amminadab-kenh aynikw, Amminadab Nahshon-kenh aynikw. Nahshon aynikw Salmon-kenh.
- 5 Salmon aynikw Boaz-kenh. Amikw ikwerenh Rahab. Boaz aynikw Obed-kenh. Amikw ikwerenh Ruth. Obed Jesse-kenh aynikw.
- 6 Jesse Atyetyart David-kenh aynikw. David aynikw Solomon-kenh, amikw ikwerenh artwa Uriah-itwek arrwekel itengirrek.
- 7 Solomon Rehoboam-kenh aynikw, Rehoboam Abijah-kenh aynikw, Abijah, Asa-kenh aynikw.
- 8 Asa Jehoshapat-kenh aynikw, Jehoshaphat Joram-kenh aynikw, Joram, Uzziah-kenh aynikw.
- 9 Uzziah Jotham-kenh aynikw anenh. Jotham Ahaz-kenh aynikw anenh. Ahaz Hezekiah-kenh aynikw anenh.
- 10 Hezekiah Manasseh-kenh aynikw anenh. Manasseh Amon-kenh aynikw anenh. Amon Josiah-kenh aynikw anenh.
- 11 Josiah Jeconiah-kenh aynikw anenh, Jeconiah-kenh ayteyikw-rnem-then. Rernem iteth anenharl-antey, ahelengkw-rnemel Israel-kenh-rnem apmer Babylon-warl atnwenheynek-kety.
- 12 Israel-kenh-rnem apmer Babylon-they alpek. Shealtiel aynikw ikwerenh Jeconiah. Shealtiel Zerubbabel-kenh aynikw anenh.
- 13 Zerubbabel Abiud-kenh aynikw anenh. Abiud Eliakim-kenh aynikw anenh. Eliakim Azor-kenh aynikw anenh.

- 14 Azor Zadok-kenh aynikw anenh. Zadok Akim-kenh aynikw anenh. Akim Eliud-kenh aynikw anenh.
- 15 Eliud Eleazar-kenh aynikw anenh. Eleazar Matthan-kenh aynikw anenh. Matthan Jacob-kenh aynikw anenh.
- 16 Jacob Joseph-kenh aynikw, Joseph Mary-kenh anewikw, Mary rey-antey Jesus renh ampa akely atnyenek. Renhey-antey it-neweyel Christ-an.
- 17 Abraham-they David-ek-atwety, 14 anenhek. Atyetyart David-they 14-ek-atwety ar-rpemarl anenhel Babylonia-el anenh-rnemek-atwety. Babylonia-el anenh-penh 14-ek-atwety anenhek Christ-ek-atwety.

*Mary-el Jesus renh atnyeneyel*  
(Luke 2:1-7)

- 18 Mary Joseph-itwek itengirrey-angenh-antey, amperr-arenyel-antey. Mary ra Joseph alhelekarl anenh. Joseph ra arrwekeleny Atyetyart David-kenh arrpemarl, arleng-alenty ikwerenh-rnem anenhey-alpek. Itnweng Rlwartel Mary renh ampa akely antheek.
- 19 Joseph ra artwa arraty anenh. Ra iterrenh ipmelhetyek, artwa ingwer-akert-arrpantey.
- 20 Ra altyerr arek-anem. Ingkart-kenh angel-el renh ilek, "Joseph-ay, alerikw David-kenh, Itnweng Rlwartel ampa akely Mary antheek. Mary renh anew ngkweng inay, itengirretyek.
- 21 Alerl ampa ra atnyeneyenh. Renh itnewa Jesus. Itna alakenh-anyem aynteyel ingkerrenh itethileyenh apmwekety."

<sup>22</sup> Inkart ra arrwekel ilek-angkwarr-antey, innganem ra alakenh ayntek, angkakert ar-rwekelenyel arrwekel ilek-angkwarr-antey, rap innganem ayntekan.

<sup>23</sup> “Aleyak ra ampa akely atnyeneyenh. Renh itneweyel Immanuel. Itnan alakenh-anyem aynteyel. Akngey anwekantherr-itwek anem.”

<sup>24</sup> Joseph ra akemirrek, ratherr itengirrek-anem, angel-el renh ilek-angkwarr-antey.

<sup>25</sup> Ratherr iteng ayntey-angenh, away ra aney-alentyan. Mary-el Jesus renh atnyenek-anem. Joseph-el away renh itnewek Jesus.

## 2

### *Artwernem apetyeyel akngerrakw-they*

<sup>1</sup> Herod atyetyart anenh-antey arrwekelan Jesus atnyenek apmer Bethlehem-itwek, ahern Judea-ampeny-itwek. Artwa rernem ayerrer-they apetyek apmer Jerusalem-warl. Antyarrantarl artwel-rnem iterl-arenh apmer ntheke-angkwarr ra born-irrek. Antyarr aremirrek ikwer-rnem-warl. Antyarrel ikwer-rnem-warl iylparrernek, antyarr-angkwarrant rernem iterl-arek, antyarr renh apentetyek, rarl ikwer-rnem iylparrerneman, rarl ikwerel born-irrekan.

<sup>2</sup> Rernem ayernek, “Nthenh ampa akely ra, Jew-rnem-kenh atyetyart ilkwa? Anwantherr antyarr ikwerenh arenhey-alpenh, renharl antyarrel iylparrernek. Anwantherr antyarr renh aremel apentek. Anwantherr apetyek, ikwer inkwerelhemel.”

<sup>3</sup> Atyetyart Herod ra angka awek, rap arkarirrek atyetyart ingwer Jew-rnem-kenh-kety. Jerusalem-areny ingwer-rnem arkarirrek arrpemar. Rernem aterirrenh atyetyart Herod-kety, ahelengkw-rnem ilanthe Kerr, renh-rnem atwetyek.

<sup>4</sup> Herod-el-anem tyaty-areny atyetyart ilkwernem-then akarrilek, artwa Moses-kenh angka akalty-anthey-angker-rnem-then, renh-rnem ayerneK, "Nthenharlap ran, artwa itethiley-angker nheng aynteyel. Nthenh-itwek ra aremirreyenhan, pip arrwekeleny Akngey-kenhel aynteyel-angkwarr-antey?"

<sup>5</sup> Rernem renh ilek, "Bethlehem-itwek, ahern Judea-ampeny-itwek, angkakert arrwekelenyel angkarl arrwekel ingkwernek-angkwarr-antey, ra irrkn garl ayntek.

<sup>6</sup> Akngey-kenh pip arrwekeleny alakenh aynteyel: 'Judea-ampenyel Bethlehem-areny-rnem rernem atyetyart ilkwakert-anem aneyenh. Bethlehem-areny anyent ra atyetyart Israel-kenh-rnem arntarnt-areyenh.' "

<sup>7</sup> Herod artwa tyak-rnemek anyelkel yangkelhek, renh-rnem ayerneK, "Ilenger arrantherr antyarr arek?"

<sup>8</sup> Ra renh-rnem ilantheK, "Bethlehem-warl alenherr-arey, ampa ikwer nthwetyek. Arrantherr arenty-penh, arrantherr atyeng-warl apeyalpenherr-arey, ayenh-anem iletiek. Ayengan ikwer-warl alhetyek arrpemar, ikwer inkwerelhetyek arrpemar."

<sup>9-10</sup> Artwa tyak-rnem Herod ikwer awalhek. Rernem antyarr wethey areynenh arrpemar,

awankarl rernem arek ayerrer. Rernem antyarr renh arek-penh, rernem ikwer artewentyel inkwerelhek innga. Ra ikwer-rnem iylparrernek. Antyarr ra ampa akely ayntenh-itwek-anem arlanirrek.

<sup>11</sup> Artwernem warl kwen-warl aylpenhek, amenheng-atherr arey-alhek. Rernem kwenirrey-alhek ampwethel alernelhemel. Rernem ikwer antheke ilek-ilek, apwert gold-then apernelhey-angker mwerr-angker inteyel-rnem-then.

<sup>12</sup> Ikwer-penhan rernem altyerr arek. Rernem angkarl awek-penh, rernem ilek, "Arrantherr iwerr ingwer-angkwarr alpenherr-arey atyetyart Herod-kety." Rernem iwerr ingwerel-anem ikw-erety alpek.

### *Rernem aterel anterreyel apmer Egypt-warl*

<sup>13</sup> Artwa tyak rernem alpek-penh, Ingkartkenh angel Joseph ikwer aremirrek, Ra renh ilek, "Akemirra, ampa akely-then amikw-then akngeyna Egypt-warl. Herod-arl ikwer nthweyel-kety, renh atwetyek. Arrantherr ikwer-itwel anem, atha arrenhantherr iletiek-atwetyek."

<sup>14</sup> Ingwa ikwerel-antey Joseph-el anew ikweren-then ampa akely-then Egypt-warl akngeynek.

<sup>15</sup> Rernem-anem aney-alpek. Herod ra ilwekarl-kety, Akngeyel renh-rnem ilantheke, rernem angkep alpetyek, Israel-warl. Akngeykenh angka alakenh ayntek, angkakert arrweke-lenyel ingkwernek-angkwarr-antey, "Atha alerey

atyenh renh atwenhek, Egypt-they.” Angka arrwekeleny innganem ayntek.

*Ahelengkwel-rnem ampa akely-rnem ipmek atweyel*

<sup>16</sup> Herod ra iterl-arek-anem, artwa tyak arleng-areny rernemarl renh irrtwyerl-ampernek, ra ahelirrek-anem. Ra ahelengkw-rnem thwenek, away akely-rnem atwetyek. Away aherrety atherrek-atwety anenh-rnem, ra ingkerrenh atwetyek, artwa tyak-rnem awek-penh, arlta ilengerarl Mary-el Jesus renh atnyenek, rernemarl antyarr arek-penh-angkwarr.

<sup>17</sup> Angka innganem ayntek. Angkakert arrwekeleny Jeremiah ra arrwekel ilenh-angkwarr-antey,

<sup>18</sup> “Apmer Ramah-itwek rernem artewentyel artnalhelirreyenh. Israel-kenh-rnem artneyenh ampa ikwerenh-rnemek, arternpirrey-angenh, rernemarl ingkerrenh ilwem.”

*Rernem alpeyel Egypt-they*

<sup>19</sup> Atyetyart Herod ra ilwek-penh, Inkart-kenh angel ra altyerr-angkwarr aremirrek, Joseph ra Egypt-itwek anenharl-warl.

<sup>20</sup> Angel angkek, “Akemirra, ampa akely-then amikw-then akngeyna apmer Israel-warl. Ahelengkw ingkerrenh kel ilwekarl-kety.”

<sup>21</sup> Joseph ranem akemirrek, amenheng-atherr akngeynek apmer Israel-warl.

<sup>22</sup> Herod-kenh alerikw Archelaus ranem atyetyart ahern Judea-ampeny-itwek anenh. Joseph ranem awek-penh, ranem aterirrek. Ra altyerr

arek, Ingkartelarl renh ilantheek, ra Galilee-warl alpetyek.

<sup>23</sup> Rernem Nazareth tawen-itwek aney-alpek. Akngey-kenh angkakert arrwekeleny-rnemel ingkwernek, "Renh-anem itneweyn 'Nazareth-areny,' " Angka arraty innganem ayntek.

### 3

*John-el ingwer-rnem akalty-antheyel  
(Mark 1:3-8; Luke 3:1-18; John 1:19-28)*

<sup>1</sup> Ingwer-inger, John Baptise-emeley-angker ra ingwer-rnem akalty-antherl-apenh ahern Judea-itwek, apmer arlpaw-itwek.

<sup>2</sup> "Angkepirrenherr-arey apmwekety Akngey-warl, arlta Atyetyart ikwerenh arrerirreyelarlkety, ingkerrenhel anwantherr Akngey renhant-anem apentetyek."

<sup>3</sup> John rey-antey arlkeyel angkakert, Angkakert Isaiah-kenh pip arrwekel aynteyel: "Angkakert ra arlkeyel apmer arlpawel. Iwerr arraty-angkwarrant ingkerrenhel apenterl-ayntetyek!"

<sup>4</sup> Arnkwan ikwerenh alta kamwerl-penh, pilt yenp-penh arertnelhenh. Ra intelty-rnem arlkenh, ngkwarl arwengalker-then.

<sup>5</sup> Ingkerrenh apmer Jordan-ampeny-they John-warl akarrirrek apmer Judea-areny-rnem-then, Jerusalem-areny-rnem-then.

<sup>6</sup> Rernem ilelhek John-ek, rernemarl apmwakert anenh. John-el renh-rnem baptise-emelek Jordan ilpayek.

<sup>7</sup> Pharisee-rnem-then Sadducee-rnem-then John ikwer-warl apetyek arrpemar, renh-rnem



baptise-emeletyek. John-el renh-rnem ilek, “Arrantherr apmwangkarrant apenteyel. Kel ingwerentyel arrenhantherr ilek, arrantherr apmwekety angkepirretyek-arrpantey Akngey-warl! Akngey arrekanterr ahelirreyel-antey.

<sup>8</sup> Arrantherr innga angkepirretyek apmwekety, ingkerrenhel arrenhantherr aretyek.

<sup>9</sup> Arrantherr Abraham-kenh-rnem tnakelhey-angenh anetyek. Akngey ilkelheyel ingwerek-ingwer ikwerenh-rnem anetyek. Akngeyel Abraham renh arntarnt-arenh, rarl ikwer awelhenh. Ikwer awelheyel-rnem rernem ikwerenh-rnem innga aneyel. Akngey ra ampa akgerram-akngerrilem, rernem arraty-angkwarr apenterl-ayntetyek. Ran ilek-ilek mpwarem, artwernem apwert-penh mpwarey-angker.

<sup>10</sup> Artwa apmwernem arwerl apmwarl arternemel, rwewarl iwem-apeny. Alakenh-apeny arrenhantherr iwekerr, arrantherr arraty-angkwarr apentey-angenh-they.”

<sup>11</sup> “Atha arrwekel arrenhantherr kwatyelant baptise-emelem, arrantherr apmwekety ipmel-hetyek. Artwa ingweran atyeng-they rlterrk inngan apetyem, ingkern-theyarl. Ayeng rlterrk-wenyarl, warrkenh apmwamwamarl, ran Atyet-yart inngarl. Ra Itnweng Rlwart arrerney-angker.

<sup>12</sup> Alakenh-anyem arlta ingkernel Akngeyel apmwangkwarrrarl alheyel-rnem ingkerr-antey rwewarl iweyenh, irrarlkemel ampetyek, atherrk ilpatileyel-apeny.”

*John-el Jesus renh baptise-emeleyel  
(Mark 1:9-11; Luke 3:21-22; John 1:31-34)*

<sup>13</sup> Jesus Galilee-they anperl-alhek Jordan lher-warl, John-el renh baptise-emeleyek.

<sup>14</sup> John arrkngert angkek, "Ilekek ngan atyeng-warl apetyek? Ntwa ayenh baptise-emeley-areny!"

<sup>15</sup> Jesus-el renh ilek, "Kel aleyan alakenh aynteyel: arraty-angkwarr-antey marenyel-areth, Akngey-kenh angka aynteyel-angkwarr-antey." John-anem ikwer awelhek.

<sup>16</sup> John-el Jesus renh baptise-emelek-anem. Kwaty-they tyerrelhenhey-alpek-anem kwenpay-anem amentant atherrirrekarl ra arek. Itnweng Rlwart ikwer-warl apetyek irrwerl-they, thip pwelker-apeny.

<sup>17</sup> Ingkerrenhel awek alker irrwerl-theyarl angkek, "Nhanyem alerey atyenh, ayengan ikwer inkwerelheyel."

## 4

*Arrentyel Jesus renh arrkerneyel  
(Mark 1:12-13; Luke 4:1-13)*

<sup>1</sup> Itnwengel-anem Jesus renh atnwenhek apmer arlpaw-ampeny-warl, arrentyel renh arrkerneyek.

<sup>2</sup> Jesus ra amern arlkwey-angenh anenh, arlta 40-ek-atwety, angayakw.

<sup>3</sup> Arrenty ra ikwer-warl apetyek, angkemel, "Akngey-kenh alerikw apek nga. Apwert nhernem akngartewa, amern irreyek, Akngey-kenh rlterrk-akertel."

4 Jesus-el renh tyerne, “Akngey-kenh pipel aynteyel: ‘Ingwerenty nthakenh amernelant itethirrey-angenh. Rernem angka Akngey-kenh-angk WARRANT itethirretyek.’ ”

5 Arrentyel Jesus renh atnwenhek Jerusalem-warl, tern ilkwewarl. Akngey-kenh apmer aknganenty-warl. Arrentyel Jesus renh tyaty ilkwa Jew-kenh irrwerl-warl atnwenhek, warl irrwerl-itwek rnernek.

6 Arrentyel renh ilek, “Akngey-kenh alerikw apekap ngan? Kel irrwerl-they nhenh atnarnpa. Nthakenh nga atwelhey-angenh. Akngey-kenh pipel alakenh aynteyel: ‘Akngeyel angel-rnem thwenem, ngenh anterrkwetyek, atwelhekerr.’ ”

7 Jesus-el renh tyerne, “Akngey-kenh pipel alakenh aynteyel: ‘Nthakenh Ingkart Akngey arrkerney-angenh rlterrek, rlterrk ilkwangk-warr.’ ”

8 Ikwer-penh Arrentyel Jesus renh atnwenhek apwert irrwerl inngewarl-anem. Arrenty-anem ikwer lwewarrernek apmer ingkerr tern ilkwernem, apmer ilek-ilek-akert, mwerr-angker-akert.

9 Arrentyel renh ilek, “Nga atyeng awelhemel kwenirrenty, atha ingkerrenh ngenh anthem.”

10 Jesus-el renh tyerne, “Arrenty, atyengety alhay! Akngey-kenh pipel aynteyel: ‘Akngey anyent ikwerant awelhetyek, Ingkart Akngey renhant apenterl-ayntetyek.’ ”

11 Arrentyel Jesus renh iwerl-alhek-anem. Angel irrwerl-areny ikwer-warl apetyek, renh arntarnt-aretyek.

*Jesus-el renh-rnem akalty-antheyel  
(Mark 1:14-15; Luke 4:14-15)*

<sup>12</sup> Artwa ahelengkw-rnemel John tyayl-warl akwernek. Jesus-el angka awek-penh, ra apmer Galilee-warl alhek.

<sup>13</sup> Ra Nazareth-itwek aney-angenh, ra anper-antey alhek Capernaum tawen-warl, ikwer-itwel aney-alhek, apmer Zebulun-itwel, Naphthali-itwel.

<sup>14</sup> Akngeyel angka arrwekel arrernek-angkwarr-antey, kel arraty-anem ayntek, angkakert Isaiah-el ilenh-angkwarr-antey.

<sup>15</sup> “Awelhenherr-arey, Zebulun-areny-rnem-then, Naphthali-areny-rnem-then, Jordan-they intwarr-ampeny, Galilee ahern artwa alethang-angketyarr.

<sup>16</sup> Arrantherr apatemel aneyel, ingwemerntel aneyel-apeny, Inggart iterl-arey-angenh. Arrekantherr arrer-anem ilwetyekan. Lyenentyel arrekantherr arrtyerneyenh, arrantherr iwerr arraty-angkwarr apentetyek.”

***Anayntileyel: Lyenentyel arrtyerneyenh, iwerr arraty apentetyek. Alakenh-anyem Jesus lyenenty-apeny anwekantherr aneyel, anwantherr arraty apenterl-ayntetyek.***

<sup>17</sup> Jesus ranem renh-rnem akalty-anthenh, “Angkepirrenherr-arey apmwekety Akngey-warl-athek! Arlta ikwerenh arrer-anem ra Inggart ingkerrenhek anetyek.”

*Jesus-el kwertengerl 4-pel rlwaneyel  
(Mark 1:16-20; Luke 5:1-11; John 1:35-42)*

<sup>18</sup> Jesus alhenh Galilee kwaty alay impalth-angkwarr. Ra awayenheng-atherr arek. Anyent

Simon itnan ingweran Peter, ingweran Andrew-arl. Netting ratherr kwaty-warl iwenh, irrpeng anterrkwetyek.

<sup>19</sup> Jesus-an angkek ikwer-atherr, “Apetyenherr-atherr atyeng-angkwarr, atha mpwelenh akalty-anthetyek, mpwel ingwer-rnem akalty-anthetyek Akngey-kenh angkek, rernem-anem apentetyek arrpemar, irrpeng mentyar.”

<sup>20</sup> Ratherr ikwer-angkwarr antelherl-alhek netting iwerl-alhemel.

<sup>21</sup> Jesus ra alhenharl-antey, ra James-then John-then arek, Zebedee-kenh alerikw-atherr. Ratherr rtnwa kwen-itwek, aynikw-itwek netting mpwarenh. Jesus-el renh-atherr ayernekk arrpemar, “Atyeng-angkwarr apetyenherr-atherr!”

<sup>22</sup> Ratherr rtnwa renh iwerl-alhek, aynikw-then-antey, Jesus-angkwarr antelherl-alhek.

*Jesus-el akngerr akalty-antheyel, arntety-rnem-then mwerrileyel  
(Luke 6:17-19)*

<sup>23</sup> Jesus ran ahern ingkerrenh-angkwarr alhenh Galilee-ampeny. Jew-rnem akalty-anthenh, Jew-kenh tyaty akely-rnem-itwek, angka mwerrangker ilerl-apenh. Akngey rant atyetyart ingkerrenhek aneyel. Ranem arntety-rnem mwerrilerl-apenh.

<sup>24</sup> Rernem ahern Syria-ampenyel angka awek. Rernem arntety ilek-ilek-akert-rnem ikwer-warl akngetyek, arrenty-akert-rnem-then, arwengkw-rnem-then, nthakenh alhey-angenh-rnem-then. Jesus-el renh-rnem ingkerrenh mwerrilek.

<sup>25</sup> Galilee-ampeny akngerr innga Jesus ikwer-warl akarrirrek, 10-pel tawen-areny-rnem-then, Jerusalem-areny-rnem-then, Judea-areny-rnem-then anyentirrek arrpemar, Jordan ilpay intwarr-ampeny-they.

## 5

### *Akngeyel renh-rnem arntarnt-areyel (Luke 6:20-23)*

<sup>1</sup> Jesus-el akngerrarl arek-penh, ra apwert irrwerl-warl alhek kwertengerl ikwerenh-rnem-akert.

<sup>2</sup> Ranem renh-rnem akalty-anthek.

<sup>3</sup> “Rernemar, ikwer-warl angkepirretyek arrk-ernelheyel, Akngeyel renh-rnem arntarnt-arem. Rernem Akngey-kenh-rnem ingkerrenh anem.

<sup>4</sup> Rernemar amperrngirreyel, Akngeyel renh-rnem arntarnt-arem, arternpilemel.

<sup>5</sup> Rernem iterl-arelheyel rernemar ahern-areny-rnem arwa aneyel, rernem ahern-areny ingkerrenhek atyetyart aneyenh.

<sup>6</sup> Akngeyel ingwer-rnem arntarnt-arem arrpemar, rernemar ikwer arraty-angkwarr awelheyel, arratyirretyek ikwerenh-angkwarr. Akngeyel ikwer-rnem iwerr mpwarem, itnweng mwerr-angker anthemel.

<sup>7</sup> Ingwer-rnem mwerrant-arey arntarnt-arerreyel, Akngeyel renh-rnem arntarnt-areyel ingkerrenh-anteyarl arrpemar.

<sup>8</sup> Arraty-angkwarr aneyel-rnem, Akngey ikwer-rnem inkwerelhem.

<sup>9</sup> Aylperrepwenty atyetyart ilkwernem aheket-yarl arrkngert angkeyel-rnem, Akngeyel renh-rnem alerey antweyel.

<sup>10</sup> Rernem arraty-angkwarr alhetyek arrkernelheyel. Ingwer-rnemel renh-rnem irrwerneyelar, Akngeyel renh-rnem arntarnt-arem arrpemar.

<sup>11</sup> Arrantherr atyeng-angkwarr alhetyek arrkernelheyel-rnem, ingwer-rnemel arrenhantherr irrwerneyelar, Akngeyel arrenhantherr arntarnt-areyel arrpemar.

<sup>12</sup> Irrkngerney anaynta! Akngeyel ngenh atnyen-aynteman, apmer aknganenty-itwek. Awank-akerrarl ingwerel-rnem Akngey-kenh angkakert-rnem irrwernek-apeny, aleyarl aynteyel arrpem.”

*Angka thalt-akert, angka lyenenty-akert  
(Mark 9:49-50; Luke 14:34-35)*

<sup>13</sup> “Aker-warl thalt arrernem. Thalt-penh nthakenh apmwirrey-angenh, intengirrey-angenh, arleng-alenty mwerr ayntem. Thalt-weny aker anamerl intengirrem, ikweweny. Alakenh-anyem Akngey-kenh angka aynteyel. Akngey-kenh angkekety amentirrenty, rap aleth-antey apmwirreman, Akngey-kenh-angkwarr apentey-angenh. Ikwer-angkwarr akaltyirrenty, rernem arleng-alenty mwerr aneman.

<sup>14</sup> Lyenentyel arrtyernem-apeny, iwerr aketh arem. Ahern-areny ingkerrenhel arrenhantherr aketh-antey arem arrpemar, nthenh-angkwarr alheman. Warl-rnem apwert irrwerl-itwek artelhenharl. Ingwer-rnemel anaynt

arem arleng-they. Ingwer-rnemel arrenhantherr anaynt arem arrpemar, rernem arraty-angkwarr apenteyelan.

<sup>15</sup> Lherrm ampenty, nthakenh ntwā tyampet-warl akwerney-angenh. Renh akethek-anem arrernetyek irrwerl-warl, ingkerrenhel anaynt aretyek.

<sup>16</sup> Arrantherr arraty-angkwarr apententy, ingwer-rnemel arrenhantherr aketh arem arrpemar, rernem Akngey-kenh-angkwarrant apentem arrpemar, ikwer inkwerelhemel.”

### *Moses-kenh angkakert*

<sup>17</sup> “Angka Moses-kenh aynteyel, angka arrwekeleny angkakert-rnemel pip-warl ingkwernek aynteyel arrpemar. Atyeng arrantherr iterreyel, ayeng angka ingwer-akert apetyentyek-athen, angka Moses-kenh arrwekelenyek iyelpirrentyek-athen. Angka nthakenh iparelhey-angenh. Ayengan apetyek atha Akngey-kenh angka irrkaty renhey-antey arrekantherr iletiek, angka Akngey-kenh arlperryiletiek, ywerreyek-atwety.

<sup>18</sup> Arraty innga atha arrenhantherr ileyel. Angka Akngey-kenh ywerrey-angenh, ahernthen alker-then ywerrey-alenty.

<sup>19</sup> Angka Moses-kenh arrwekeleny-kety amentirrenty, ingwer-rnem apmwel-aretharl akalty-anthenty, arrantherr apmwelhileyel Akngey-kenh-angkwarr. Angka Akngey-kenh arraty apententy, ingwer-rnem arraty akalty-anthenty, arrantherr Akngey-angkwarr mwerrarl aneyenh.



20 Pharisee-kenh-rnem, artwa ilkwa Moses-kenh-rnem rernem apmwangkwarrr apenteyel. Arrantherr arraty-angkwarr apenterl-ayntetyek. Arrangkwelan, angka Pharisee-kenh Moses-kenh apententy, arrantherr Akngey-kenh apmer-warl aylpey-angenh.”

### *Ahel iltenty-akert*

21 “Moses-kenh angka arrwekeleny angka alak-  
enh ayntenh, ‘Ra ingwer ipmek atwenty, renh  
angkep atweyenh arrpemarl.’

22 Athan arrenhantherr ileyel, ‘Ingwerentyel  
apek iltenty, arlta ingkernel Akngeyel renh ay-  
erneyenh arrpemarl. Arrantherr ingwer-rnem  
apmwa antwenty, rwa aknganenty arrwekel  
ikwer mpwelheyel arlta ingkernel.’

23-24 Ngethen ingwerenty-then ahel mpwe-  
lanth ilterrekarl-penh, nga ikwer-warl alhetyek-  
tangkwel, sorry antwelhetyek, tyaty-warl aylpey-  
angenh, Akngey renh tyenkerr anthey-alenty.  
Ahenp-antey alhey-angenh. Ikwer-penh-anem  
ntwa Akngey renh tyenkerr anthey-alpem-  
anem, mwerrant-atherr anetyek. Alakenh-  
anyem Akngey-angkwarran mwerrant-arey ane-  
tyek.

25 Arrkent arwa ilterrey-angenh. Angketangk-  
wel arratyilerrey mwerr-angkwarr, ra ngenh  
court-warl akngekerr, court-arenyel ngenh tyayl-  
warl akwernekerr.

26 Fine ilkwa ntwā payemeley-angenh, nthak-  
enh nga tyerrelhey-angenh.”

### *Anew inetyek*

27 “Akngey-kenh angka alakenh aynteyel: ‘Ingwer-kenh anewikw nthakenh ikngwey-angenh.’

28 Athan arrenhantherr arraty ileyel, angka awerr innga. Nga arelh ingwerek ahenty anenty ikngwetyek-arrpantey, ngap apmwangk-warr iterreyelan.

29 Ntwa apek apmwangk-warr mpwareyel annel. Ntwa apek annga atherr-akert apmwangk-warr mpwareyel-kety, mwerr ntwa annga anyent tyerrelhemel iwetyek, ngap Akngey-kenh apmer-warl aylpeman, annga anyent-akert.

30 Ntwa apek apmwangk-warr mpwareyel itepel. Ntwa apek itep atherr-akert apmwangk-warr mpwareyel-kety, mwerr ntwa itep anyent akelhem iwemer, mwerr-angkwarr Akngey-kenh apmer-warl aylpetyek.”

***Anayntileyel: Anwantherr arwa akelhey-angenh, impen-antey. Alakenh-anyem angka anayntileyel, Inkart ra impen ingarl, angethen iltyethen-angkwarran. Kel Jesus-el arwa renh-rnem ilek, rernem iterretyek, rernem apmwelhilekerr.***

*Ratherr iwerretyek*

31 “Angka arrwekeleny alakenh aynteyel: ‘Mwerr arelh ikwerenh iwem. Artwa pip-warl itna inkwernelhemel, arelh ikwerenh pip renh anthemel, arelh ra pip renh aremel, artwa renh iwey-alentyan.’

32 Athan arrenhantherr arraty ileyel, angka atyenh awerr. Arelh ra artwa ingwer-angkwarr

antelhenty, kel alakenh mwerr iwemarl. Arrangkwarl, arelh ngkwenh ntwaw iwenty apmwel-areth, Akngey-angkwarr apmwa aynteyel.”

*Ingkart itnewemel irrtwyerremel angkey-angenh*

<sup>33</sup> “Arrwekeleny-kenh aynteyel arrpemar, ‘Ingkart itnewemel irrtwyerremel ilelhey-angenh, Ingkartel arem.’ Arraty ntwaw angkayntetyek.

<sup>34</sup> Angka atyenhan awerr, atharl arrenhantherr ileyel. Alkenh itnewey-angenh, irrtwyerremel ilelhey-angenh.

<sup>35</sup> Ahern itnewey-angenh arrpemar, ikwerenh arrpemar. Jerusalem itnewey-angenh arrpemar, apmer ilkwa atyetyart impen ikwerenh arrpemar.

<sup>36</sup> Irrtwyerremel ilelhey-angenh, arratyant nga ilelhetyek.

<sup>37</sup> Yaw apek, arrangkw apek, alakenh arraty innga nga ilelhetyek. Ingwer-angkwarr nga ilelhenty, arrenty-kenh-angkwarrarl.”

*Angkep atwey-angenh  
(Luke 6:29-30)*

<sup>38</sup> “Angka arrwekeleny aynteyel: ‘Ingwerentyel annga atwenty, ntwaw renh annga angkep atweyentyek arrpemar. Ingwerel ngenh arntek renh atwenty, renh arntek atwem arrpemar.’

<sup>39</sup> Ayengan arrekantherr-warl angkem, ngenh apek arreyl anyent-ampeny atwenty, renh angkep atwey-angenh, aleth-antey atwerrerrl-anekerr. Nga menty anthelhetyek ra ngenh arreyl ingwer-angkwarr-anemarl atwenty.

<sup>40</sup> Ingwerentyel kwet ngkwenhek ayernenty, ntwā kwet renh alhewer anthem arnkwa ingwer-then anthem. Akngey-kenh-angkwarr alakenh aynteyel.

<sup>41</sup> Ingwerentyel ngenh ilanthenty, ikwer-angkwarr alhetyek, nga ikwer-angkwarr alha anper-antey, ikwer awelhemel. Angath-antey alhey-angenh.

<sup>42</sup> Ingwerentyel ngenh amernek ayernenty an-gayakwel, ntwā renh amern anthetyekan. Amp-wal ilek-ilek renh anthetyek arrpemarl.”

*Ingwer-rnem arntarnt-aretyek, ikwer-rnem amperrngirretyek*

<sup>43-44</sup> “Ingwer-rnemel ileyel, ikwer-rnem-kenh arntarnt-arayntetyek. Angka atyenhan awerr, atharl arrenhantherr ileyel, alakenh aynteyel, ingkerrenh arntarnt-arayntetyek alethang-rnem-then arntarnt-arayntetyek. Ingwerentyel ngenh irrwernenty, ntwā Akngey ayernetyekan ikwer, renh arntarnt-aretyek.

<sup>45</sup> Arrantherrap Akngey-kenh-rnem ingkerren-harl aneman, arrantherrap alakenh mwerrant-arey anetyek. Akngeyel ingkeny arrernek ingk-errenhek, apmwernemek-then mwerr-rnemek-then, ilek-ilek ra antheek, kwaty antheek, amern ingkerrenh lyapelhiletiek, aker-then anteril-ayntetyek atherrkeny.

<sup>46</sup> Ahern-areny-kenh alakenh aynteyel, ngkwenh-rnemant arntarnt-arayntetyek apmellerreny. Apmwamwam man kapmentek iney-angker-rnem rernem arntarnt-arayntetyek

arrpemarl, apmellerreny. Akngey-kenh ingwer-angkwarr aynteyel, ingkerrenh arntarnt-arayntetyek. Alakenh Akngeyel anwenhantherr angkep antheman.

<sup>47</sup> Ingwer-rnem Akngey apentey-angenh-rnem rernem ikwer-rnemekant inkwerelheyel. Alakenh-apeny-weny anayntetyek mwerr-angkwarr.

<sup>48</sup> Arrantherr mwerr innga anayntetyek, Akngey irrwerl-areny aneyel-apeny.”

## 6

### *Tnakelhey-angenh*

<sup>1</sup> “Mwerr-arrpantey tnakelhey-angenh, arraty-angkwarr nga anetyek, ingwer-rnemel arrenhantherr awekerr. Arrantherr tnakelhenty, Akngey irrwerl-arenyel arrenhantherr nthakenh arntarnt-arey-angenh.

<sup>2</sup> Ntwa irrpern-rnem man anthenty, ingwer-rnem akarriley-angenh, rernem ngenh aretyek. Apmwangkwarr alheyel-rnem rernem alakenh tnakelheyel, tyaty akely kwenel iwerr impalthel, ingwer-rnemel renh-rnem aretyek, tnaketyek. Atha arrenhantherr arraty ileyel, Akngeyel renh-rnem anthey-angenh.

<sup>3</sup> Ntwa irrepern-rnem arnkwa anthenty anyelkel-antey, tnakelhey-angenhel, ingkerrenhel ngenh arekerr,

<sup>4</sup> Akngeyelant ngenh aremel, rap ngenh arntarnt-arem arrpemarl.”

*Alakenh Akngey-warl angkaynta  
(Luke 11:2-4)*

5 “Ingwer-rnem alhem tyaty akely-rnem-warl, aketh-warl, Jew-rnem angkerreyel-warl. Akngerr akarrirrenty, rernem angkem Akngey-warl, ingwerel-rnem renh-rnem mwerr-arrpantey aretyek, tnaketyek. Rernem tnakelheyel. Akngey alakenh-kety arlkarirreyel. Kel ra renh-rnem arntarnt-arey-angenh.

6 Ament Akngey-warl angkenty mwerrarl. Akngey ilkelheyel, ngenh arntarnt-aremarl.

7 Arrantherr aleth-antey angkey-angenh, artwa ingwer-arenyel-rnem angka akngerrileyel-apeny ingkart ikwer-rnem-kenh-warl.

8 Aleth angkey-angenh, rernem angkeyel-apeny. Anyent-inger-antey angketyek, kel ra ngenh aweyelarl.

9 Arrantherr alakenh ayernem, ‘Akngey anwekantherrenh, ngarl irrwerl aneyel. Ingkerrenh akalty-antha, anwantherr ngenh arraty iterl-aretyek.

10 Apey-alha, ingkerrenhek ingkart anetyek. Ingkerrenh arratyila, ngkweng awelhetyek, irrwerl-areny ingkerrenh ngkweng awelheyel-apeny.

11 Anwenhantherr intem-antey amern antherl-aynta.

12 Apmwa anwekantherrety iwa, anwernantherr arratyilerretyek, mwerrant-arey anwernantherr anetyek.

13 Anwernantherr apmwewarl irrekerr atnyena. Arrenty anwernekantherr irrpelthirreyelarl-kety, anwernenhantherr arntarnt-ara.’ ”

<sup>14</sup> Jesus-el renh-rnem ilek, “Arrantherr ingkerrenh mwerrant-arey-anem anetyek atwerrey-angenh, Akngeyan arrekanterr ingkerrenhek inkwerelhem, apmwa ingkerrenh-kety, arrekanttherrety Akngeyel iwem.

<sup>15</sup> Arrangkwelan, Akngeyel apmwa arrekanttherrety iwey-angenh.”

*Rernem amern-kety ipmelhetyek*

<sup>16</sup> “Ingwer-inger amern-kety ipmelhem, amernekant aleth iterrey-angenh, Akngeyekant iterrerl-ayntetyek. Ingwer-rnem artwerrety anew-aneyel, irrepern antwelhemel. Akngey ikwer-rnem inkwerelhey-angenh, renh-rnem angkep anthey-angenh.

<sup>17</sup> Alakenh amern-kety ipmelhenty, artwerrety aney-angenh. Inngerr lhewelhem apmellerreny-angkwarr. Irrepern antwelhey-angenh ingwer-rnemek.

<sup>18</sup> Akngeyel kel aketh-antey areyel, arrenhantther angkep anthem.”

*Ampwal akngerr ayerrpiley-angenh*

*(Luke 12:32-34)*

<sup>19</sup> “Ampwal akngerr ayerrpiley-angenh ahern nhenh-itwek. Arrangkwarrap ikwer-angkwarran. Ampwal akngerr apwert man-then akarriley-angenh, ingwerentyel irrtiyert-inekerr, interrkel arlkwekerr.

<sup>20</sup> Arraty-angkwarr apenterl-ayntem. Rap arrernem ilek-ilek mwerr-angker arrekanterr irrwerl-itwek. Mwerr-angker ayntayntem intem-antey irrwerl-itwek, nthakenh ywerrey-angenh,

arrangkwa. Ingwerentyel irrtiyert-iney-angenh, interrkel arlkwey-angenh, arrangkwa.

<sup>21</sup> Arrantherranap ampwal ikwer-rnemant iterreyel, arrantherr ampwal renh-rnemant apenteyel.”

*Angka lyenenty-akert*  
(Luke 11:34-36)

<sup>22</sup> “Annga mwerr-akertel ntwā iwerr arraty apenteyel-apeny, anaynt-apeny.

<sup>23</sup> Aparrngelan iwerr arraty apentey-angenh arrangkwarl, aperrertirrerl-alpeyel. Aparrngel-apeny rernem apmwangkwarrr apenteyel, atwemengkel-apeny. Rernem Akngey-kety amentirreyel.”

*Angka man-akert*  
(Luke 12:22-31; 16:13)

<sup>24</sup> “Arrantherr apwert man akngerrekant iterrerl-anenty, arrantherrap Akngey-kenh angkek-anem iyrlpelirrem-anem, Akngey-kenh angka apentey-angenh, amentewarl-anem. Akngey-kenh angka impenarl. Manek artewentyel iterrey-angenh, Akngey-kenh angkekant artewentyel iterr-ayntetyek. Nthakenh ntwā atherr-angkwarr apentey-angenh.

<sup>25</sup> Alakenh iterrey-angenh, ‘Amern ilek atha arlkwetyek, ilek atha antywetyek, arnkwa ilek-warl ayeng aylpetyek?’ Iteth anayntetyekant nga iterr-ayntetyek, Akngey-kenh-angkwarr apenterl-ayntetyek.



<sup>26</sup> Thip yanh-rnem arenh-arey. Thip nthakenh amentel amern lyapelhiley-angenh, amern warl-warl akwerney-angenh, awakelhey-angenh. Akngey irrwerl-areny rant thip-rnem wanteyel, arntarnt-areyel. Arrantherr Akngey-kenh impen thip-rnem-angkwarr. Anwenhantherr arntarnt-areyel arrpemar.

<sup>27</sup> Arrantherr artewentyel iterrerl-anenty, arrantherrap arwapeny ywerreman.

<sup>28-29</sup> Arnkwekant iterrey-angenh. Solomon arnkwa mwerr-angker-warl aylpenh. Arnkwan ikwerenh ahern-areny-kenhant. Akngeyelant alpeyt mwerr-angker arrernek ahern nhewarl. Alpeyt arnkwarnem-angkwarr mwerr-angker ingarl inngelheyel! Alpeyt yanh-rnem arenherr-arey! Anyentel-antey aneyel rernem arnkwel mwerr ilelhey-angenh.

<sup>30</sup> Akngeyel atherrk lyapelhileyel. Atherrk arlenyirrem aherretyel, rernem antywer arrtiem. Akngeyel atherrk renharl arntarnt-areyel-apyen, ra anwenhantherr iwerl-alhey-angenh arrpemar, arnkwa ilek-ilek anthemel arntarnt-arem mwerr-angkwarr. Arrantherr apal, Akngey renh tnakey-angenh, rarl anwenhantherr ingkerrenh arntarnt-arem.

<sup>31-32</sup> Artewentyel iterrey-angenh, 'Ilek anwantherr arlkwem, ilek anwantherr antywem, arnkwa ilek-warl anwantherr aylpeman?' Inggart apentey-angenh-rnem alakenh iterreyelan. Akngey alker-areny ra arrenhantherr areyel, ranem arrenhantherr ilek-ilek antheman, arntarnt-arem-then.

<sup>33</sup> Arrantherr-anem ikwerenh-angkwarr

apenterl-ayntetyek arraty-angkwarr; Akngeyel arrenhantherr atnyenem.

<sup>34</sup> Ampwal ilek-ilek akngerr arrerney-angenh ingwer-ingerek. Ngant ikwerant iterretyek. Arlta arrpanenhel Akngeyel arenhantherr arntarnt-areyelan.”

## 7

### *Ingwer-rnem akngakey-angenh (Luke 6:37-38, 41-42)*

<sup>1</sup> “Arrantherr ingwer-rnem tyatyemiley-angenh, akngakey-angenh. Arrantherr renh-rnem apmwa antwey-angenh, Akngeyel ngenh arrpemaril lekerr.

<sup>2</sup> Nga mwerr-arrpantey ilelhenty, ngap irrtwyerreyelaril. Alakenh Akngeyel ngenh akngakeyenh mwerr-rnem-they.

<sup>3</sup> Artwa anyent annga arwerl-akert nthakenh arey-angenh. Mwerr-arrpantey irrtwyerremel ilelheyel. Ra artwa ingwer annga ahern-angketyarr ileyel, ‘Annga ahern-akert irrarlkelha ntwa anynt arey-alkenh!’

<sup>4</sup> Nthakenh ingwerek alakenh angkey-angenh, ‘Atha ahern akely irrarlketyek annga ngkweng-itwel.’ Arrangkwl! Ra apek arrkay arem, annga arwerl ilkwakert.

<sup>5</sup> Rarl alakenh angkem, rap irrtwyerremaril. Ra arwerl angethey-tangkwel tyerrelhem, mwerr-anem arey-kety. Rap ahern akely irrarlkem annga ingwer-itwek-anem.”

***Anayntileyel: Jesus-el angka ilenh, rernem iterretyek, tnakelhey-angenh. Artwa Moses-kenh-rnem rernem mwerr-arrpantey***

***ilelhenh, ingwer-rnem apmwekety angkepilyek-arrpantey ikwer-rnem-kenh-angkwarrant apenterl-ayntetyek.***

<sup>6</sup> “Nhanyem angka Akngey-kenh impen. Rant angkepilye-angker. Ahern-arenyelant-amperl nthakenh angkepilye-angenh. Apwert mwerr-angker impen, nthakenh pikepik anthey-angenh. Aker mwerr-angker arengk apmwa nthakenh anthey-angenh. Akngey-kenh angka impen arpemarl apwert mwerr-angker impen-apeny.”

***Anayntileyel: Akngey-kenh angka impen, apwert mwerr-angker-apeny, aker impen mwerr-angker-apeny. Alakenh atnwenh pikepik anthey-angenh-apeny, arengk apmwa anthey-angenh-apeny, alakenh anwantherr Angka Akngey-kenh atnyenem, ingwer-angkwarrant iterreyel-rnem anthey-angenh.***

<sup>7-8</sup> “Ntwa Akngey ayernenty, ranap ngenh anthemarl. Ntwa renh ayernenty, ranap ngkweng lwewarrernemarl. Ran iwerr ngkweng mpwareyel, ntwa ikwerenh-angkwarr apentyek. Inngarlap ran! Akngey ranap ngkweng mpwaremarl, ngap aylpenhem-anem.

<sup>9</sup> Alerengkwel ngenh amernek apek ayernem. Ntwa apwert ikwer anthey-angenh, arrangkw! Ntwa amernant anthem arlkwetyekan.

<sup>10</sup> Alerengkwel ngenh aker irrpengkek apek ayernem. Ntwa rtnwem ahelengkw ikwer anthey-angenharl, arrangkw! Ntwa aker irrpengant anthetyek arlkwetyekan.

<sup>11</sup> Arrantherran apmwamwam aneyel, arrantherrap iterl-areyellarl, ilek-ilek mwerr-

angker anthayntetyekan ampememek. Akngey irrwerl-arenyan arrantherr-apeny-wenyarl, ilek-ilek anthey-angker. Ra mwerr-angkerarl arrekantherr anthem, arrantherr renh ayernentyan. Rant iterl-areyel.

<sup>12</sup> Anwantherr ilkelheyel ingwer-rnemel anwenhanterr mwerr-angkwarr arntarnt-aretyek. Alakenh anwantherr mwerr-angkwarr renh-rnem-tangkwel arntarnt-aretyek. Akngey-kenh angka arrwekeleny aynteyel, Moses-kenh-angkwarr angkakert ingwer-rnem-angkwarr-then.”

### *Iwerr atherr-akert*

<sup>13</sup> “Iwerr akely alpeyel Ingkart-kenh-angkwarr, nga array-angkwarr apentetyekan. Akngerr alpeyel iwerr ilkwangkwarr, apmwel-aretharl alheyel-rnem. Akngeyel renh-rnem ywerrel-hileyen.

<sup>14</sup> Irrpetyap alheyel Ingkart-kenh-angkwarran. Rernem iteth intem-antey aneyen.”

### *Arwerl amern-akert (Luke 6:43-45)*

<sup>15</sup> “Mwanty el arntarnt-arelhetyek mwerranty array apentetyek artwa apmwernem-kety. Rernem irrtwyerremel angkakert mwerr-arrpantey ilelheyel-kety, yep-yep-rnem anik mwerr aneyel-apeny. Artwa apmwernem ahelirreyel arengk artnwerel ahelirrem-apeny tnhwerremel. Rernem apmwangkwarr akalty-antheyel, ngenh apmwewarilekerr.

<sup>16</sup> Apmwarlap ran, arwerl arleny-apenyarl. Arwerl arleny-penh nthekwern amern iney-angenh. Apmwa nthekwern akey-angenh, amern arnwekety akey-angenh arwerl arleny-penh apmwarl. Amern akatyerr akey-angenh arwerl arntek-arntek-penh apmwarl.”

***Anayntileyel: Apmwangkwarr akwerrpel akalty-antheyel-rnem arwerl arleny-rnem-apeny. Angka mwerr akalty-anthey-angenh akwerrpel-rnem, amern apmwamwam-apeny.***

<sup>17</sup> Jesus-el angka ingwer-anem ikwer-rnem ilenh. “Arwerl ingweran amern mwerr-akertarl, arwerl apmwarenyan amern mentyarl.

<sup>18</sup> Arwerl arleny-penh nthekwern amern akey-angenh. Amernek ywarn nthweyel.

<sup>19</sup> Arwerl arlenyan apmwarl, rwewarl iwem arwerl renh.

<sup>20</sup> Angkakert irrtwyerrey-angker-rnem rernem arwerl arleny-apeny.

<sup>21</sup> Apmwel-areth aneyel-rneman rernem arlkeyenh, ‘Ay, Inkartay.’ Rernemap Akngey-kenh-warl aylpey-angenh. Arraty-angkwarr apenteyel-rnemant, Akngey ikwerenh-rnem aneyenh.

<sup>22</sup> Arlta ingkernel ingwer-rnem arlkeyenh, ‘Ay, Inkartay. Anwantherr angka ngkwenh ilerl-apenh arrpemar, anwantherr arrenty-rnem ir-rentek, itna ngkwenh itnewemel, ilek-ilek mp-warek, rlterrk ngkwenh-akertel.’

<sup>23</sup> Athan renh-rnem ileyenh, ‘Alpenherr-arey atyengety, athan arrenhantherr iterl-arey-angenharl.’ ”

*Warl atherr-akert  
(Luke 6:47-49)*

<sup>24</sup> “Rernem apek angka atyenh awek-penh, rernem arraty-angkwarr apenteyel rlterrk-anem, artwa warl apwert irrwerl rlterrk-itwek artek-apeny.

<sup>25</sup> Kwaty-anem rntwey-alhek, atnyerr ilkwanem alhek. Warl atakelhey-angenh arrangkw, ra anyentel-antey apwert rlterrk ikwerel cement-apeny-itwek artelhenh.

<sup>26</sup> Artwa ingwerel angka atyenh arwa iylpelant awek atyeng awelhey-angenh. Ra anamerl ywerreyenh warl apmwamwam anamerl ywerrek-apeny.

<sup>27</sup> Kwaty ilkwa rntwey-alhek. Atnyerr alhek, awerel rlterrk pwey-alhek, warl apmwamwam renh-anem atakenhek, kel. Warl rlterrk intem-antey aneyenh, warl apmwamwam arrangkwarr, angath-antey atakelheyel. Artwa akalty intem-antey aneyel, Akngey-kenh. Artwa arwengk angath-antey ywerreyenh, warl apmwamwaman angath-antey ywerremel atakelhek-apeny.”

<sup>28-29</sup> Jesus rarl angka ilenh-penh, ingkerrenh-anem apatek, rarl renh-rnem rlterrk innga akalty-anthek Akngey-kenh-angkwarr, artwa Jew-kenh akalty-anthey-angker-rnemel rlterrkkel akalty-anthey-angenh.

## 8

*Jesus-el artwa tywen-angketyarr mwerrileyel  
(Mark 1:40-45; Luke 5:12-16)*

<sup>1</sup> Jesus apwert-they atwarrerl-alhek, akngerr ingwer-rnemel renh apentek.

<sup>2</sup> Artwa tywen-angketyarr apetyek Jesus-warl. Tywen ywerrey-angenh intem-anteyarl anenh. Ra kwenirrenh Jesus-itwek, ampwethel aler-nelhemel. Ra angkek, “Nga rlterrk inngan, mwerriley-angker. Ntwa ayenh mwerrileyek tywen-rnem atyeng-they ywerrelhila, ayeng tywen-weny alyelk-anem anetyek.”

<sup>3</sup> Jesus ranem renh arnep-arnek, angkemel, “Ayeng ilkelheyel, ngenh atha mwerrileyek.” Tywen-rnem arwapeny ywerrerl-alhek, mwer-rirreyelpek.

<sup>4</sup> Jesus ra arrkngert angkek, “Akater-anem aney-alpa! Ingwer-rnem-warl ilelhey-angenh anetyek, atharl ngenh tywen-angketyarr-penh mwerrilek. Atyetyart tyaty ilkwa Jew-rnem-kenh-arenyek nga anyentekant ilelhey-alpa, ra ngenh mwerr-anem aretyek. Ntwa aker tyenkerr Atyetyart antha! Moses-kenh angka aynteyel, aker Atyetyartek anthetyek, ingkerrenhel ngenh aretyek, ngarl mwerrirekanem, ntwarl aker tyenkerr Atyetyart antheke.”

*Jesus-el atyetyart Rome-areny-kenh warrkenh mwerrileyel*

*(Luke 7:1-10; John 4:43-54)*

<sup>5</sup> Jesus apmer Capernaum-warl-anem alpek. Artwa ahelengkw atyetyart irikentyek-artwey Rome-areny ikwer-warl apetyek, ayernetyek.

<sup>6</sup> “Inkartay, warrkenh atyenh arlan aynteyel, akngelhey-angenhirrek, arlka ingkerr kwarnelheyel-kety.”

7 Jesus angkek, “Ayeng alhem ngkweng-angkwarr, renh mwerriletyek.”

8 Atyetyart irlkentyek-artwey ilelhek, “Ngan ilkwarl atyeng-angkwarr. Ayengan artwa apmwamwamarl. Ayeng nyerrirreyel ngkwengety, atha ngenh warl atyenh-warl atnwenheynekerr. Nga arntety ikwer angka, renh mwerriletyek.

9 Ayeng atyetyart arrpemarl ingwer-rnemek. Atha apek anyent ilanthem, rap awelhemarl. Atha anyent ingwerek arlkem, rap atyeng-warl apetyem. Atha warrkenh anyent ilanthenty, rap awelhemel warrkirremarl. Ngan atyetyart ilkwa innga, ingwer-rnem ngkweng awelhemarl.”

10 Artwa renh awek-penh Jesus ra apatek, rantarl renh-rnem ilek, “Artwa nhenhelant ayenh tnakeyel innga, ayengarl riterrk ilkwakert, arleng-they mwerriley-angker. Ranap Jew-wenyarl, alethangarl. Nhareny-rneman arrangkwarl.

11 Akngerr akarrirreyenh apmer arrpanenh-they amern kwenty arlkwetyek arrwekeleny-rnem-itwek. Abraham-akerr, Isaac-akerr, Jacob-akerr, Rernem ingkerr anerl-aneyenh Akngey-itwel. Akngey-kenh-rneman ingkerrenh mwerr anayntem, inkwerelhemel amern kwenty arlkwerl-anemel. Jew-rnem alethang-rnem-then pweytirreyenh anerl-anemel arrpemarl. Akngeyelanap renh-rnem ingkerrenh arntarnt-arerl-aneyenh.

12 Jew-rnem Akngey-kenh arrwekel anenh-rnem arrangkwarl. Rernem ywarn iter-



remel arrangkeyenh, Akngeyarl ikwer-rnem-kety intwemelirreyenh-kety.”

<sup>13</sup> Jesus-el atyetyart renh ilek, “Kel alpa, atha warrkenh ngkwenh mwerrilek, ntwarl ayenh tnakek.” Kel warrkenh ra mwerrirreyelpek.

*Jesus-el akngerr mwerrileyel  
(Mark 1:29-34; Luke 4:38-41)*

<sup>14</sup> Jesus-el awek, arelh ampwa Simon-kenh arntety rwenparl ayntenh.

<sup>15</sup> Jesus alhek ikwer-warl, itep ikwerenh anter-  
rkwek. Arelh ranem mwerrirrek. Ra akemirrek,  
amern-anem ra ampernek Jesus-ek.

<sup>16</sup> Atwemengkel ingwer-rnemel atnwenhey-  
alhek arrenty-akert-rnem Jesus ikwer-warl.  
Ranem arrenty-rnem irrentek ikwer-rnem-they,  
Akngey-kenh angka rlterrk-akertel, arntety-  
rnm-then mwerrilek.

<sup>17</sup> Alakenh angkakert Isaiiah-el angka arrwekel  
ingkwernek, ra innganem irrek, “Ra arntety-  
rnm ingkerrenh mwerriley-angker.” Alakenh  
angka arraty innganem irrek.

*Rernem ilkelheyel Jesus-angkwarr apentetyek  
(Luke 9:57-62)*

<sup>18</sup> Jesus-el artwa akngerr arek. Ra angkek  
kwertengerl ikwerenh-rnemek, “Mpa, kwaty ilk-  
wangkwarr anwantherr artarnpenhey intwarr-  
ampeny-warl.”

<sup>19</sup> Artwa anyent atyetyart Moses-kenh rap  
angkek Jesus-ek, “Atha ngenh apentetyek,  
ingweram-angkwarr nga alhenty.”

<sup>20</sup> Jesus-el renh tyerne, "Arengk artnwer rernem inteyelarl aynteyel. Thip-rnem athar-ikwel aneyel, Artwa Impen Akngey-kenh ayeng apmer-weny arrangwarl, ayeng arwarl apmer arrpanenh-warl alheyel."

<sup>21</sup> Kwertengerl anyent ikwer angkek, "Ingkartay! Akngey atyenh ilwetyek arrer-anem. Ayeng alpetyek, renh arntarnt-arey-alpetyek. Renh aytarenty-penh, ayeng apey-alpem arrpemar, atha ngenh apenterl-ayntem arrpemar."

<sup>22</sup> Jesus angkek ikwer, "Menty, ingwerel-rnem renh aytarey. Ayenhantarl apenterl-aynta, mwerr-ayteng."

*Jesus-el kwaty awer-akert arternpileyel  
(Mark 4:35-41; Luke 8:22-25)*

<sup>23</sup> Nganerl-alhek rernem rtnwewarl-anem anperl-alhek.

<sup>24</sup> Kwaty awer-akert apetyek rntwey-alhek rl-terrk innga. Awer ilkwel renh-rnem akngelhew-akngenhilek. Kwatyan lherrparnpek-anem rtnwewarl, rtnwan aylperl-alhetyek-anek-anem. Jesus rtnwel ankwaynterl-apenh apal.

<sup>25</sup> Kwertengerl ikwerenh-rnemel Jesus akwentelhilek. Rernemap renh ilek, "Ingkartay, kwatyel anwenhantherr ilwerl-athenekerr!"

<sup>26</sup> Jesus-an angkek ikwer-rnem, "Ilek-ketyarl arrantherr aterirreyel, atyeng irrpelthirremel-apeny, atharl arrenhantherrenh arntarnt-areyelan?" Jesus artewentyel arlkek awerek, atnengkirretyek. Kwaty awer-akert atnengkirreyelpek, arwapeny.

27 Kwertengerl ikwerenhel-rnem Jesus renharl arek-penh, rernem ikwerety aterirrek, rarl kwaty awer-akert arternpilek rlterrkell. Rernemap ayernerrek, "Nthakenh awer-then kwaty-then ikwerant awelheyel."

*Artwa atherr arrenty akgerr-akert  
(Mark 5:1-20; Luke 8:26-39)*

28 Jesus rtnwel artarnpenhek Galilee kwaty ilkwangkwarr kwertengerl ikwerenhrnem-akert, apmer Gadara-warl. Artwa arrenty-akert atherrel Jesus renh arlengek arnarek, apetyenharl. Ratherr kanper-antey anekirrey-ayntek Jesus-warl apmer awenng-angketyarthey. Arrewaly-kenh awenng-angketyarrel ratherr anenh, nthakenh ikwer-atherr-warl alhey-angenh, ahelengkwek-atherrety.

29 Artwa ratherr arlkek, "Jesus, ngan Alerikw Akngey-kenh. Ntwa arraty ilay. Ilekek ngan apetyek? Aylernanthenh ntwa atwetyek? Arlta ingkernelant Akngeyel anwernenhantherr atweyenh!"

30 Apwertel atnwenth pikepik akgerr rtnenherrenh.

31 Arrenty-rnemel Jesus renh ilek, "Irrentey-angenh anwernenhantherr, apmer arleng-warl! Anwernenhantherr atnwenth yanh-rnem-warl thwena!"

32 Jesus-el kel renhrnem irrentek, "Alpenherr-arey wenh!" Rernem kel tyerrelhek artwa ikwer-atherrthey, alhemel atnwenthrnem-warl. Atnwenth rernem kel anterrerrek arrenty-akertan. Rernem arnkarrthey aytnek, kwaty alay kwenwarl. Rernem ilwek kwatyel kwen.

<sup>33</sup> Artwa atnwenth arntarnt-arey-angker-rnem tawen-warl anterrek. Rernem iley-alhek tawen-areny-rnem, atnwenth-rnem kel ilwek kwaty ilkwa kwen, Jesus-elarl arrenty-rnem irrentek artwa ikwer-atherr-they.

<sup>34</sup> Tawen-areny-rnem ingkerrenh rernem-anem alhek, rernem-anem Jesus renh aretyek. Rernem Jesus ikwerety aterirrek, itnweng rltarrk-akert-kety. Rernem angkenh, "Nga apmer ilenh-they alpetyek, apmer ingwer-warl-anem."

## 9

### *Jesus-elan artwa lerrp mwerrileyel (Mark 2:1-12; Luke 5:17-26)*

<sup>1</sup> Jesus rtnwewarl nganek, kwaty-angkwarr artarnpenhek. Ra angkep-anem alpek apmer ikwerenh-warl, tawen Capernaum-warl.

<sup>2</sup> Artwa ingwerel-rneman artwa lerrp anyent akngey-alhek pantyel, Jesus-warl. Jesus-el renh-rnem arek, rernemarl renh tnakek mwerriley-angker. Ra artwa lerrprenh ilek, "Apmwan atha ngkwengety iwem."

<sup>3</sup> Artwa Pharisee-rnem-then Moses-kenh akalty-anthey-angker-rnem-then rernem angkerrenh, "Ran nhenhey irrtwyerremel ilelheyel Akngey-arrpantey. Akngeyelant apmwan iwem!"

<sup>4</sup> Jesus-el iterl-arek artwa renh-rnem, rernemarl ikwer irrpelthirremel angkerrenh. Ra renh-rnem ilek, "Arrantherran apmwel-aretharl angkerreyel, atyeng irrpelthirremel!"

5-6 Ayengan Akngey-kenh Artwa Impen. Akngeyel ayenh thwenek ahern nhenh-warl, rlterrk innga. Akngeyel ayenh rlterrkilek, artwa arntety mwerriletyek, apmwa ingkerrenh-they iwetyek, arrantherr ayenh iterl-aretyek. Atha akwentelhilemel thwenem, ra apmer-warl alpetyek panty inerl-alhemel.” Jesus angkek artwa arntetyek, “Akwentenhey-alpa, panty ngkwenh inerl-alhemel, apmer-warl-anem alpa!”

<sup>7</sup> Artwa arntety-penh akwenterl-alhek, panty inerl-alhemel. Alpek-anem ra apmer-warl, mwerr-anem.

<sup>8</sup> Akngerrel intwarek apatemel, arntety rarl apmer-warl alpek. Rernem Akngeyek-anem inkwerelhek, rarl ahern-areny-rnem rlterrk-ilek, ingkerrenh mwerril-ayntetyek. Rernemap angkerrenh-anem, “Ngay! Akngey inngarl yanh-an!”

*Jesus-el artwa Matthew renh rlwaneyel  
(Mark 2:13-17; Luke 5:27-32)*

<sup>9</sup> Jesus ra alpenh, ran artwa arek, itnan Matthew. Ra man akwetyenh, kapment-warl an-thayntetyek. Jesus-anem angkek ikwer, “Atyeng-angkwarr apetya!” Ra warrk ikwerenh-kety ip-melhek, Jesus-angkwarrant-anem antelhenhek.

<sup>10</sup> Ikwer-penhan Jesus kwertengerl ikwerenh-rnem-akertel amern arlkwek artwa apmwernem-itwek, man akwetyey-angker-rnem-itwek warl kwenek.

<sup>11</sup> Pharisee ingwer-rnemel Jesus-kenh kwertengerl-rnem ayernek, “Ilekek ra amern

arlkweyel man akwetyey-angker-rnem-itwek, apmwa ingwer yanh-rnem-itwek?”

<sup>12</sup> Jesus ra awek rernemarl angkerrenh. Ra renh-rnem ilek, “Ngangkerel arntety-rnemant arem, mwerr-rnem nthakenh arey-angenh. Ingwer-rnem rernem mwerr-arrpanteyarl iterl-arelheyel, atyeng-angkwarr-wenyarl. Ayengarl ran apmwa atha iwey-angkeran, arntety mwerriley-angkeran.

<sup>13</sup> Angka Akngey-kenh-angkwarr akaltyirra! Atha mwerr-rnemant arntarnt-arey-angenh. ‘Angka ingweran aynteyel amern tyenkerr anthetyek. Nga ingwer-rnemek-tangkwel amperrngirra!’ Alakenh-anyem Akngey-kenh pipel aynteyel, anwantherr iterl-aretyek. Ayeng ilkelheyel ingwer-rnemek-then amentewarl alheyel-rnemek-then, Akngey-kenh angkek awelhey-angenh-rnemek, rernem atyeng-warl angkepirretyek.”

*Ingwerel-rnem Jesus renh ayerneyel  
(Mark 2:18-22; Luke 5:33-39)*

<sup>14</sup> John-kenh kwertengerl-rnem apetyek Jesus-warl. Rernem renh ilek, “Anwantherr Pharisee-rnem-then Akngeyekant iterreyel, amernek iterrey-angenh. Kwertengerl ngkwenh-rnem-alew? Amern-kety ipmelhek arrpemar!”

<sup>15</sup> Jesus ikwer-rnem angkek, “Artwa anyent itengirrem-angkwarr, ingkerrenhel ikwer-angkwarr amern kwenty arlkwetyek, inkwerelhemel. Alakenh-anyem, kwertengerl atyenh-rnem anyentirremel aylperrem, amern kwenty arlkwetyek, atyeng inkwerelhemel.

Ayengarl alpeyenh-ketyant, rernem  
ipmelheyelpyenh.

<sup>16</sup> Arnkwa apmwamwamel-rnem nthakenh anwantherr atanthey-angenh arnkwa mwerr-warl, renh arnwarnetyek. Arnkwa apmwamwam altherrkirrey-angker arrpemar. Anwantherr menty arnkwa apmwamwam iwey, arnkwa mwerran atnyenemel.”

<sup>17</sup> Jesus-el renh-rnem ilek, “Anwantherr theley-angenh ngkwarl wayn lyerteny arranty apmwamwam-warl. Arranty apmwamwam altherrkirremarl. Arranty-they ngkwarl wayn thelelhekerr ingkerrenh-antey, rwenpirrentyan. Arranty ampwanemar. Anwantherr ngkwarl wayn lyerteny an arranty mwerr-warl-anem theletyek. Arranty mwerr-itwek wayn mwerr aynteyel, thelelhey-angenh anetyek.”

***Anayntileyel: Alakenh-anyem Jesus-el renh-rnem akalty-anthek, “Arrantherr arranty apmwamwam iwem-apeny, arrantherr arnkwa apmwamwam iwem-apeny, arrantherr Pharisee-rnem-kenh angka iwenherr-arey, angka apmwa, atyengant-anem awelhenherr-arey.”***

*Kwey ilweyel, arelh arntety anyent  
(Mark 5:21-43; Luke 8:40-56)*

<sup>18</sup> Jesus angkenharl-antey, artwa Atyetyart ilkwa ranem apetyek, ampwethel arrernelhek kwenirremel, “Kwey alerey atyenh kel ilwek. Renh arnep-arna, ra angkep itethirretyek.”

<sup>19</sup> Jesus ra rtnerl-alhek, ikwer-angkwarr antelhenhek, kwertengerl ikwerenh-rnem-akert.

<sup>20</sup> Arelh anyent arntety inngan, aherrety 12-ek-atwety, arleng-alenty anenh. Arelh ra ingkernthey apetyek, arnkwanem Jesus-kenh arnep-arnek.

<sup>21</sup> Ra ament-anem iterrek, “Atha arnkwa ikwerenh arnep-arnenty, ayengap mwerrarl irreman.”

<sup>22</sup> Jesus ranem artepang arek arelh renh, ra ikwer angkek, “Nga mwerr-anem irrek, ntwarl ayenh tnakek.” Kel ikwerel-antey ra mwerrirrek.

<sup>23</sup> Warl atyetyart-kenh-warl ra aylpenhek, ra arek ingwer-rnemark artnalhelirrenh.

<sup>24</sup> Ra angkek, “Arnangerrenherr-arey! Kwey ngkwenh ilwey-angenh, ankwarl ra aynteyel.” Ingkerrenh Jesus ikwer atherrenh irrpelthirremel.

<sup>25</sup> Ingkerrenh aketh-warl irrentek-penh, Jesus ra aylpenhek, arrewaly rarl ayntenh-warl. Ranem akwethey rnrkerne, rtnerl-alhetyek. Kwey ra akwentenhey-alpek-anem.

<sup>26</sup> Ingkerrenhel ahern Judea-ampenythey rernem angka awek-anem, Jesus-elarl renh itethilek.

### *Jesus-el artwa aparrng atherr mwerrilek*

<sup>27</sup> Jesus apmer ikwerthey anperl-alhek, artwa aparrng atherrel Jesus renh apentenh ingkernthey. Ratherr arlikek, “Aylekanth amperrngirra! David-kenh alerikw!”

<sup>28</sup> Jesus ranem warl kwen-warl aylpenhek. Artwa aparrng ratherr ikwer-warl apetyek, Jesus-el renh-atherr ayerne, “Mpwelanth ayenh tnakeyel, atha mpwelanth mwerriley-angker?”



“Kel Inkartay, aylernanth ngenh tnakeyel,”  
ratherr alakenh angkek.

<sup>29</sup> Jesus-el annga renh-atherr arnek, angkemel,  
“Kel mpwelanth mwerrirrem-anem, ayenh  
tnakekarl-penh.”

<sup>30</sup> Kel ratherr mwerrirrek-anem. Jesus  
ikwer-atherr arrkngert angkek, “Ingwer-rnemek  
ilelhey-angenh, atharl mpwelanth mwerrilek.”

<sup>31</sup> Apmer arrpanenh-warl ratherr ilelherl-  
apenh, renh-atherrarl mwerrilek Jesus-el.

*Jesus ra artwa akerter angkey-angenh renh  
mwerrileyel*

<sup>32</sup> Jesus anperl-alhek kwertengerl ikwerenh-  
rnem-akert, ingwer-rnemel artwa arrenty-  
akert atnwenhek Jesus-warl. Arrentyel artwa  
arrwekel-antey renh angkey-angenh ilek.

<sup>33</sup> Jesus-el arrenty renh irrentek, artwa ikwer-  
they. Artwa rap angkek-anem, mwerr-anem.  
Jesus renh arek-penh, ingkerrenh inkwerel-  
hemel iterrek, “Aleyant anwantherr arek, Israel-  
ampenyek arey-angenh.”

<sup>34</sup> Artwa Pharisee rernem angkerrenh, “Artwa  
yanh arrenty atyetyart-kenh riterrk-akertel ar-  
renty ingwer-rnem irrenteyel.”

<sup>35</sup> Jesus ra apmer arrpanenh-warl akalty-  
antherl-apenh, Akngey-kenh-angkwarr apenterl-  
ayntetyek, Jew-kenh tyaty-itwek, arntety-rnem  
mwerrilerl-apenh.

<sup>36</sup> Ra ingkerrenh arek, ra ikwer-rnem amper-  
rngirrek, rernemarl ywarn iterrenh. Ingweren-  
tyel renh-rnem akalty-anthey-angenh. Rernem

apatemel anenh, atyetyartek arrangkw, yep-yep atyetyart-weny apatemel arlperrtyirrem-apeny.

<sup>37</sup> Ra kwertengerl ikwerenh-rnem ilek, “Akgerr ingwer-rneman Akngey-kenh angka away-angenh-antey. Angkakert apetyey-angenh-antey, renh-rnem akalty-anthetyek.

<sup>38</sup> Ingkart Akngey ayernetyek, angkakert thwenetyek, angka mwerr-angker ilerl-apayntetyek, akwerrp-rnem-warl.”

## 10

*Jesus-el kwertengerl ikwerenh-rnem rlwaneyel  
(Mark 3:13-19; Luke 6:12-16)*

<sup>1</sup> Jesus-el kwertengerl ikwerenh 12 akarrilek, ranem renh-rnem rlterr-kilek, rernem-anem rlterr ikwerenh-akertel arrenty-rnem irrenterl-apayntetyek, arntety ilek-ilek-akert-rnem mwerrilerl-apayntetyek.

<sup>2</sup> Nhanyem itnernem ikwer-rnem, Simon, itnan ingweran Peter, awayikw ikwerenh Andrew, James-then John-then, Zebedee-kenh alerikw-atherr.

<sup>3</sup> Philip-then Bartholomew-then, Thomas-then Matthew, man kapment-warl akwetyey-angker, James-then, Alphaeus-kenh alerikw, Thaddeus-then.

<sup>4</sup> Ingweran itnan Simon Patriot. Judas Iscariot rarl Jesus renh ahelengkw-rnem-warl ahayiwenh.

*Jesus-el angkakert 12 thweneyel  
(Mark 6:7-13; Luke 9:1-6; 10:1-12)*

<sup>5</sup> Jesus-el angkakert 12 thwenek, Ranem renh-rnem ilek, "Jew-weny-rnem-warl alhey-angenh, Samaria-areny-rnem-warl alhey-angenh,

<sup>6</sup> Israel-kenh-rnem-warlant alhenherr-arey, rerneman atyetyartek arrangkwarl, rernem apatemelarl aneyel-rnem-warl, yep-yep apatemel rtneyel-apeny.

<sup>7</sup> Ilenherr-arey, arlta kel-anemarl arrerirreyel-kety, irrwerl-areny atyetyart ingkerrenhek anetyek.

<sup>8</sup> Arntety-rnem mwerriletyek, arrewaly-rnem itethiletyek, tywen-rnem ywerrelhiletyek arntety-rnem-they, arrenty-rnem irrentetyek. Akngeyel ilek-ilek arrekantherr kel antheek. Arrantherr ngkweltyekant iterrey-angenh, arrantherr ingkerrenh ingwer-rnem mwerriletyek arwa.

<sup>9</sup> Ngkwelty ilek-ilek akngeyney-angenh, thilp apek.

<sup>10</sup> Yakweth akngey-angenh, arnkwernem akngey-angenh, ingkety aylpey-angker mentyarl, irrertety akngey-angenh. Ingwerentyel arrenhantherr anthem mwerr-angkwarr, warrkpenh.

<sup>11</sup> Apmer ingwer-warl alhenty, warl anyentel-antey aney-alhetyek.

<sup>12</sup> Warl ikwer-warl aylpentyel, Akngey ayerna, renh-rnem ingkerrenh arntarnt-aretyek.

<sup>13</sup> Rernem ngkweng inkwerelhenty, nga ikwer-rnem-itwek mwerr aneman. Rernem ngkwengety arlkarirrenty, ikwer-rnem-kety amen-tirrem arrpemar.

14 Tawen-areny-rnem ngkwengety arlkarir-renty, irrpelthirremel, ahern tertangkwelhila ingkety-theyan. Tawen-arenyel-rneman arem, rernem iterremarl, 'Anwantherr arntetyirreyenh, Akngeyel anwenhantherr arntety ilkwa antheyenh, anwantherrarl ikwer inkwerelhey-angenh-they.' Menty-anem yanhrnem iwerl-alhem alpemelant-anem.

15 Arlta ingkernel Akngeyel arlkarirreyelarlrnem ingkerrenh renh-rnem atwem, Sodom-areny-rnem-then Gomorrah-areny-rnem arrwekel atwek-apeny."

*Ingwer-rnemel irrwerneyenh kwertengerlrnem*

*(Mark 13:9-13; Luke 21:7-19)*

16 "Kel-anem alhenherr-arey, mwanty-antey. Arrantherran anik ahelengkw-weny, yep-yep-rnemarl anik aneyel-apeny. Ingwer-rnem ahelengkw arengk artnwer-apenyarl. Arrantherr mwanty-antey arnwarnelhemel mwerrant-arey aney-alhenherr-arey, ikwer-rnem-itwel ahelengkw-weny, thip rwelyarr anikarl aneyel-apeny.

17 Mwantysel arntarnt-arelhenherr-arey artwa apmwa ahelengkw-rnem-kety arrenhantherrenh atwekerr tyaty Jew-kenh akely-rnem-itwek.

18 Artwa apmwernemel arrenhantherr ar-rerneyenh angka ilkwewarl, atyetyart-rnem-warl angketyek. Arrantherr angka atyenh iletyek Jew-weny-rnemek nyerrirrey-angenh.

19 Atyetyart ilkwel arrenhantherr angka ilkwewarl arrerrenty, arrantherr ilelhetyek ikwer-warl, aterirrey-angenh. Akngeyel arrenhan-

therr akwerrng rlterrkilem, arrantherr arraty angketyek.

<sup>20</sup> Angka ngkwenh-weny. Akngey-kenh It-nwengel arrenhantherr akwerrng rlterrkilem, arrantherr arraty angketyek.

<sup>21</sup> Artwel-rnem ayteyikw ikwer-rnem-kenh ahayiweyenh ahelengkw-rnemel atwetyek. Ingwer-rnemelan alerikw ikwer-rnem-kenh ahayiweyenh, ahelengkw-rnemel atwetyek. Ampel-rnem amey ikwer-rnem-kenh-then akngey ikwer-rnem-kenh-then ahayiweyenh, ahelengkw-rnemel atwetyek.

<sup>22</sup> Akgerr arrekantherrety arlkarirreyenh ayenharl apenteyel-kety. Arrantherr atyeng-angkwarr apententy, atyengety amentirrey-angenh, arrantherr intem-antey iteth aneyenh.

<sup>23</sup> Tawen-areny-rnem arrenhantherr atwetyek arrkernelhenty, tawen ingwer-warl alhenherr-arey. Akngey-kenh Artwa Anyent Impen ayeng apey-alheyenh arrer-anem.

<sup>24-25</sup> Kwertengerl 12 lyertant akaltyirreyel, atyetyart-wenyarl, warrkenh atyenh-rnemarl. Ingwer-ingeran ra alyepel akalty-anemarl, ingwer-ingeran artewentyel akalty-anemarl. Rernem warrkirreyel, atyetyart alerl irreyenh. Ingwer-rnem atyeng irrpelthirrenh, rernem kwertengerl-rnemek irrpelthirreyenh arrpemarl, rernem atyeng warrkirrenharl-kety. Ingwer-rnemel apek ayenh Satan antwem, rernem arrenhantherr Satan antweyenh arrpemarl.”

**Anayntileyel: Jesus-el angka ikwer-rnem alakenh anayntilek, “Ingwer-rnem**

***atyeng irrpelthirreyel, rernem kwertengerl  
atyenh-rnemek irrpelthirreyel, rernem  
atyeng warrkirreyelarl-kety.”***

*Akngeyekant iterretyek*

*(Luke 12:2-7)*

<sup>26</sup> “Ingwer-rnem-kety aterirrey-angenh. Inkartel arem. Nthakenh anyelkel arlengkewelhey-angenh. Ingwer-ingerant arerl-arrernem-anem.

<sup>27</sup> Atha arrenhantherr angka atyenh anyelkel-antey ileyel. Atha arreytemel arrenhantherr ileyel, ingwer-ingerant arrantherr alhewer arnkatyel iletiek. Ingwer-ingerant arrantherr angka atyenh aketh-antey alhewer iletiek, ingkerrenhel awetyek.

<sup>28</sup> Ingwer-rnem-kety aterirrey-angenh. Rernem arlkant ngenh atwem, itnweng atwetyek arrangkwarl. Ahern-areny-kety aterirrey-angenh. Arrantherr Akngeyekant iterrerl-ayntetyek, rantarl arlkethen itnweng-then ywerrelhiley-angker.

<sup>29</sup> Thip nyengk akely atherr tharlemiletiek man akelyek. Nyengk ahern-warl aytenty, Akngeyel renh areyelarl.

<sup>30</sup> Alta ingkerr akapwert-itwek nthakenh count-emiley-angenh, Akngey akalty arrpemarl.

<sup>31</sup> Rarl thip nyengk-rnem arntarnt-areyel-apeny, rap arrenhantherr mwantysel arntarnt-arem arrpemarl.”

*Jesus-kenh angka alhewer ilayntetyek*

*(Luke 12:8-9)*

32 “Arrantherr ilelhenty ingwer-rnemek arrantherr atyenh-rnem aneyel, arlta ingkernel athap Akngey irrwerl-areny ilem, arrantherr kwertengerl atyenh-rnem aneyel.

33 Arrantherr atyengety arlkarirrenty, arlta ingkernel athap Akngey irrwerl-areny ilem, arrantherr atyenh-wenyarl.”

*Rernem amentirreyenh Inkart-kety  
(Luke 12:49-53)*

34 “Arrantherr atyeng iterreyel, ayeng apetyek ahern nhenh-warl, ingkerrenh arternpiletyek-arrpantey. Arrangkwarl! Akgerr ilterrerl-aneyenh arnerant-arey atyeng-they.

35 Rernem ilterrerl-aneyenh, aynenheng-rnem ilterrerl-aneyenh atyeng-they, amenheng-rnem atyeng-they ilterrerl-aneyenh arrpemarl, anherrenheng-rnem atyeng-they ilterrerl-aneyenh arrpemarl.

36 Ngkwenh-rnem ilterrerl-aneyenh atyeng-they arrpemarl.

37 Arrantherr atyeng inkwerelh-ayntetyek inga, ngkwenh-rnemant inkwerelhey-angenh.

38 Arrantherr arlka menty anthelhem, ayenhant arrantherr apenterl-ayntetyek.

39 Arrantherr amentewarl-anem alhenty, arrantherrap ywerrem-anem, intem iteth aneyangenh. Arrantherr arlka menty anthelhenty, arrantherrap Akngey-angkwarr iteth intem aneman.”

*Akngyel renh-rnem angkep antheyenh  
(Mark 9:41)*

40 “Ingwerenty ngkweng inkwerelhenty, rap atyeng inkwerelhem arrpemar. Ingwerenty atyeng inkwerelhenty, rap Akngeyek inkwerelhem arrpemar rarl ayenh thwenek angkakert.

41 Ingwerenty apek artwa angkakert ikwer inkwerelhenty, Akngeyel renh arntarnt-arem arrpemar. Ingwerenty artwa arratyek inkwerelhenty, Akngeyel renh arntarnt-arem arrpemar, artwa arraty arntarnt-arem-apy.

42 Ingwerentyel ngenh apek kwaty irrernt anthenty, nga atyenh kwertengerlarl aneyel, Akngey ikwer inkwerelhem. Akngeyel renh mwantysel arntarnt-arem arrpemar.”

## 11

### *Angka John Baptise-emeley-angker-akert (Luke 7:18-35)*

1 Jesus-el kwertengerl ikwerenh 12 ilanthekepenh, ranem alpek tawen-areny-rnem akalty-anthayntetyek, angka ikwer-rnem anayntilyek.

2 John Baptise-emeley-angker tyayl-itwek anenh. Ranem awek-penh, John-el kwertengerl ikwerenh-rnem thwenek Jesus-warl.

3 Rernem Jesus renh ayerne, “Ngang John-el arrwekel ilenhan? Ingwerentyek apek anwantherr mpwelhem?”

4 Jesus-el renh-rnem tyerne, “Alhenherr-arey, John ilyek, arrantherr anngetherr ayenh awek-penh, arek-penh.



5 Aparrng-penhel-rneman areyel-anem, lerrp-penh-rnem mwerr alheyel-anem, tywen-angketyarr-penh-rnem mwerrirrek, iyypel awey-angenh-rnem aweyel-anem, arrewaly-penh-rnem itethirrek-anem, akwerrp-rnemel angka mwerr-angker aweyel.

6 Akngeyel renh-rnem arntarnt-areyel, rerne-marl ayenh tnakeyel.”

7 John-kenh kwertengerl-rnem alpek. Jesus-el-anem ingkerrenh angka John-akert ilek, “Ilek-apeny artwa arrantherr arekan apmer arlpaw-itwek? Atherrk arlpenty-apeny, artwa awerr-wenyarl.

8 Ilek-apeny artwa arrantherr arekan, arnkwa mwerr-angker-akert? Atyetyart ilkwekenh apmerelarl aneyel?

9 Ilek arrantherr arekan? Akngey-kenh angkakertan? Ran angkakert anyent impen inngarl!

10 Ranap irrkaty-antey, Akngey-kenh pipel aynteyelarl. Angkakert anyent impen rey-antey: ‘Atha angkakert thwenetyek arrwekel, iwerr mpwaretyek, rarl apetyemek.’

11 John ranem ahern-areny ingkerrenh-angkwarr impen-antey Akngey-kenh. Akngey-kenh-angkwarr apenteyel-rnem, rernem John-angkwarr ilkwa innga anem.

12 Artwa ahelengkw akngerr-anem ilkelhenh, Akngey-itwek aney-alpetyek. Rernem angkakert-rnem ipmek atwek.

13 Angkakert Akngey-kenh-rnemel ingwer-rnem akalty-anthenh. Akngeyel Moses law an-

thek arrpemarl. Rernem akalty-anthenh, John Baptise-emeley-angker ra aremirreyek-atwety.

<sup>14</sup> John ra aneyel, angkakert arrwekeleny Elijah anenh-apeny. Awank-akerr Akngeyel ilek, renh thwenetyek ahern nhenh-warl. Renhey-antey anwantherr iterl-areyel.

<sup>15</sup> Arrantherr atyeng awelhenherr-arey!"

<sup>16-17</sup> Jesus-el renh-rnem ilek, "Ampernem arkalhelirreyel ampa ingwer-rnemek, 'Ileketyarl arrantherr arlkarirreyel arrkent alhewer ntwelhelirrey-angenh anwekantherr-itwek? Arlkarirreyelarl. Rernem amperrngirremel anwekantherr-itwek artney-angenharl.' Ampernem arlkarirreyel artwa nhareny-rnemarl atyengety arlkarirreyel-apeny.

<sup>18</sup> John ran artwa ipmeng, amern arlkwey-angenh, ngkwarl wayn antywey-angenh, ar-rangkw. Arrantherr ikwer angkerrenh arrenty-akertek-arrpantey! Arrantherr ikwerety arlkarirrenh.

<sup>19</sup> Akngey-kenh Artwa Impen ayeng kel apetyek. Arrantherr ayenh ayntarrp-ileyel ankety-arrpantey, amern akngerr arlkwerl-anenty-arrpantey, ngkwarl wayn akngerr antywerl-anenty-arrpantey. Ayeng artwa apmwernem-itwel, arwa alhewer anem, ikwer-rnem-kety arlkarirrey-angenh. Ayeng alhewer anem man-awarr-rnem-itwek arrpemarl, ankety-rnem-itwek, man kapmentek akarrileyel-rnem-itwek. Akngey-kenh-angkwarr arratyarl aynteyel, alakenh-anyem atha apenteyel."

*Ingwer-rnem Jesus ikwer awelhey-angenh  
(Luke 10:13-15)*

<sup>20</sup> Tawen arrpanenhel Jesus-el ilek-ilek mpwarek. Tawen-areny-rnem apmwekety angkepirrey-angenh-antey, apmwantey. Alakenh Jesus-el renh-rnem ilenh,

<sup>21</sup> “Tawen Korazin-areny-rnem angkepirrey-angenh. Akngeyel arrenhantherr artewentyel innga irrwampenh-antheyenh. Alakenh irrkaty arppemarl aynteyenh ingwer-rnemekan tawen Bethsaida-arenyekan. Rernem ayenh anngetherr arek, atharl akngerr mwerrilenh, rernemap atyengety arlkarrerkarl. Tawen Tyre-areny-rnem-then tawen Sidon-areny-rnem-then. Rernem-alew? Rernemap nyerrirrem, apmwa ikwer-rnem-kety angkepirrem. Rernemap arnkwa apmwamwamel aylpem inmenthel-then apernelhemel. Arrantherr akwerrp, atyeng awelhey-angenh.

<sup>22</sup> Arlta ingkernel, Akngeyel tawen Tyre-areny-rnem-then tawen Sidon-areny-rnem-then irrwampenh-antheyenh alyepelant. Rap tawen Korazin-areny-rnem-then tawen Bethsaida-areny-rnem-then irrwampenh-antheyenh artewentyel innga.

<sup>23-24</sup> Tawen Capernaum-areny-rnem-alew? Rerneman apmwel-areth iterreyel alakenh, ‘Akngeyel anwernantherrenh irrwerl-warl akngeyneyenh, ikwer-itwel aney-alpetyek. Jesus-el ilek-ilek mwerr-angker mpwarenh arrekantherr-itwek.’ Alakenhap rernem iterreyelan. Rernem atyeng awelhey-angenh-anteyarl. Akngey rap renh-rnem atweyenh.

Sodom-areny-rnem-alew? Akngeyel renh-rnem atwek, rernem renh arraty apentey-angenh-they. Alakenh-anyem ra arrenhantherr atwemarl.”

*Jesus-el renh-rnem arntarnt-arem  
(Luke 10:21-22)*

<sup>25</sup> Ikwer-penh Jesus angkek, “Akngeyay, ngan atyetyart ingkerrenhek, ahern-areny-rnemek, alker-areny-rnemek. Ayeng ngkweng inkwerelheyel, ntwarl angka ngkwenh anayntilek, akwerrp-rnemek, ingkerrenhel ngenh iterl-aretyek-awaty, arraty apenterl-ayntetyek. Akalty-arrpantey ingwer-rnem tnakelheyel, angka ngkwenh nthakenh iterl-arey-angenh.

<sup>26</sup> Alakenh Akngeyay, ntwan anwekantherr ar-rernek arrwekel.”

<sup>27</sup> Jesus kwertengerl ikwerenh-rnemek angkek arrpemar, “Akngey atyenhel alakenh ayenh arrernek. Akngeyelant ayenh iterl-areyel innga. Atha anyentelant Akngey renh iterl-areyel innga. Atyeng-angkwarrant rernem Akngey renh iterl-aretyek.

<sup>28</sup> Atha arrenhantherr mwanyel arratyilem, arrantherr ingwer-angkwarr iterreyel-kety.

<sup>29</sup> Atyeng-angkwarr akaltyirra, atha arrenhantherr alpemiletyek.

<sup>30</sup> Arrantherr ayenh apententy, mwerrarl ar-rekantherr aynteyel, awerr-wenyarl.”

## 12

*Arlta impen ltyerrey-angker  
(Mark 2:23-28; Luke 6:1-5)*

<sup>1</sup> Arlta anyent impen Saturday-el, Jesus alhek kwertengerl ikwerenh-rnem-akert amern weyt-angketyarr-angkwarr. Kwertengerl ikwerenh-rnemel amern weyt inenek, angayakwirrekerr.

<sup>2</sup> Pharisee-el-rnem Jesus renh iltek, “Angka anwekantherrenh aynteyel, arlta nhelan nthakenh warrkirrey-angenh. Kwertengerl ngkwenhel-rnem amern weytarl inenhey-alhek Saturday-el, arlta anyent impenel. Apmwel-aretharl amern weytan inenhey-alhek, law anwekantherrenh rernem apmwilenhey-alhek.”

<sup>3</sup> Jesus angkek artwa Pharisee-rnemek, “Mwerr amern anwantherr inenhey-alhek angayakwirrekerr. Arrantherrap iterl-aremer ingwer-rnemarl awank amern inek-apeny arrpemar, David-kenhel-rnem.

<sup>4</sup> Rernem Akngey-kenh warl impen-warl aylpek. Rernem amern tyenkerr impen akngek angayakwirrekerr. David-el renh-rnem ilek, ‘Amern inenhetyek angayakwirrekerr, arwa alhewer. Angka arrwekeleny aynteyel, tyaty-areny atyetyart-rnemelant amern impen arlkwetyek.’

<sup>5</sup> Atyetyart ilkwernem priest-rnem-then rernem alhewer warrkirreyel-antey, ipmelhey-angenh arlta Saturday-el. Alakenh mwerrarl. Ingwer-rnemel renh-rnem ayntarrp-iley-angenh.

<sup>6</sup> Angka atyenhan impen inngarl, tyaty ilkwa arrangkwarl.

<sup>7</sup> Nthakenh arrantherr kwertengerl atyenh-rnem ayntarrp-iley-angenh arrpemar. Akngey-kenh angka alakenh aynteyel, irrepern-rnem amernel wantetyek, ipmelhey-angenh. Amern

tyenkerr Akngeyek arrerney-angenh.

<sup>8</sup> Ayengan Akngey-kenh Artwa Impen anyent, arlta ltyerrey-angker ikwer atyetyart. Atha anyentelant ilem, arlta ikwer, kwertengerl atyenh-rnem rernem arlkwetyek.”

*Jesus-el mwerrileyel artwa anyent akwarl arlwerrelhek, akngelhey-angenh*

*(Mark 3:1-6; Luke 6:6-11)*

<sup>9</sup> Saturday-el, Jesus alhek warl kwen-warl Jew-kenh tyaty akely-warl.

<sup>10</sup> Artwa anyent akwa arlwerrelhekarl akngelhey-angenh anenh warl kwenel. Pharisee-el-rnem Jesus renh arek, arrer-they, ra arntety renh mwerrilentyek. Artwa rernem angkerrenh, “Arlta Saturday-el rlengkan Jesus-el nthakenh arntety mwerriley-angenharl. Moses-kenh angka nhenh arrwekel aynteyel.” Jesus renh arek Pharisee-el-rnem, ra akengenty irrenty arlta anyent impen nhel. “Moses-kenh angka aynteyel, arlta Saturday-el nthakenh arntety mwerriley-angenh.”

<sup>11</sup> Jesus-el artwa ilkwernem ilek, “Angka nhenhek iterrenh-arey arrantherr. Yep-yep apek aytne m irrkewarl, mwernelhemel. Ntwa renh angkep tyerrenhey-alpem itethilemel? Yep-yep itethilem-apeny arlta Saturday-elan,

<sup>12</sup> Kel alakenh atha artwa arntety alhewer itethilem arrpemar, arlta Saturday-elan.”

<sup>13</sup> Artwa arntety renh ilek Jesus-el, “Akwa arratyirra!” Artwa ra akwa arratyirrek, mwerranem, akwa ingwer-apeny.

14 Pharisee-rnem rernem tyerrelhek tyatythey. Rernem tyel-angkerrenh Jesus ikwer, rarl arntety renh mwerrilek, arlta anyent impen apmwilek Jesus-el. Rernem angkerrenh Jesus renh atwetyek.

*Isaiah-kenh angka innganem irreyel*

15 Jesus-el awek, rernemarl ikwer mpwelhenh, ranem alpek apmer ingwer-warl. Akngerrel renh apentek. Ikwer-penhan, ra akngerr arntety-rnem mwerrilek.

16 Jesus-el renh-rnem artwerilek, “Arrantherr ingwer-rnem-warl iley-angenh. Arrantherr akater aney-alpenherr-arey.

17 Angka Akngey-kenh arraty innganem irrek. Angkakert Isaiah arrwekel ingkwernek, Akngey alakenh angkek,

18 ‘Aray, nhanyem artwa warrkenh atyenh, atharl renh rlwanek. Ayeng ikwer inkwerelheyel. Atha Itnweng atyenh arrernek ikwer-warl, ra angka arraty ilerl-apyantetyek Jew-weny-rnemek, rernem arraty-angkwarr apenterl-ayntetyek ingkerrenhel.

19 Ra ingwer-rnem-then iltey-angenh, ra artewentyel arlkey-angenh iwerr ampepel.

20 Ra ingwer-rnem pwerep-anthey-angenh, rernem mwerr-angkwarr aneyel. Ra ikwer-rnem-itwel aneyenh.

21 Apmer arleng-areny, Jew-weny-rnem rernem renh iterl-arayntetyek-awaty, rarl renh-rnem itethileyenh.’ Alakenh angkek Akngey.”

*Atyetyart Arrenty-rnem-kenh*

*(Mark 3:20-30; Luke 11:14-23; 12:10)*

<sup>22</sup> Ingwer-rnemelan artwa aparrng anyent Jesus-warl atnwenhek. Artwa akertter arrenty-akert. Jesus-el renh mwerrilek. Artwa ranem mwerr angkek, mwerr-anem arek.

<sup>23</sup> Rernem apatek, angkerrenh, “Nhanyem David-kenh innga!”

<sup>24</sup> Pharisee-el-rnem awek-penh, rernem ikwer angkerrenh, “Artwa nhan arrenty-kenh rlterrk-akertel. Arrenty-kenh atyetyartel Jesus renh rlterrkilek, arrenty-rnem irrentetyek ingwer-rnem-they!”

<sup>25</sup> Jesus-el renh-rnem iterl-arek, rernemarl angkerrenh. Rap angkek, “Arrenty-kenh rlterrk-akertel nthakenh atha irrentey-angenh ikwer-rnem-they. Ra ayenh rlterrkiley-angenh, ikwerenh-rnem irrenteyek. Akngey-kenh Itnweng-akertarl ayengan. Itnweng rlterrk-akertel atha arrenty-rnem ingkerrenh irrentetyek.

<sup>26</sup> Atyetyart arrenty-kenhel nthakenh ikwerenh-rnem irrentey-angenh.

<sup>27</sup> Arrantherr iterreyel, rarl ayenh rlterrkilerl-anenty-arrpantey, arrenty irrentetyek. Arrekantherrenh-rnem-alew, arrenty irrentey-angker ingwer-rnem-alew? Arrenty atyetyartel renh-rnem rlterrkiley-angenh, arrangkw! Arrantherr alakenh ayntarrp-ilty, irrentey-angker ingwer-rnem arrekantherr ahelirrem.

<sup>28</sup> Akngey-kenh Itnweng-akertelant atha arrenty-rneman irrentetyek. Akngey-kenh-angkwarr alakenh aynteyel, arrantherr iterl-aretyek.



29 Artwa rlterrk aneyel warl ikwerenhel. Ingwerenty nthakenh aylpey-angenharl, arnkwa ikwerenh irrtiyert-inetyek. Artwa rlterrk anyent ingwerarl apetyem warl ikwerenh-warl, renh anterrkwemel, arertnemel, arnkwa ikwerenh ingkerrenh akngeynemel. Atyetyart arrenty-kenhan artwa rlterrk-apeny. Ayeng anyent ran rlterrk, arrenty-kenh atyetyart antengiletiek, arrenty ingwer-rnem irrentetyek.

30 Ingwerenty atyeng awelhey-angenh, rap atyengety amentirrekarl, rap apmwangkwararl anem ilpertel mpwareyel, ingwer-rnem Akngey-kety amentirrem arrpemar.

31 Ra Akngey-warl angkepirrenty, Akngeyel kel apmwa ikwerety iwem. Ra Itnwengek irrpelthirrenty, Akngeyel apmwa ikwerety iwey-angenh.

32 Ra Akngey-kenh Artwa Impenek irrpelthirrenty, Akngeyel kel apmwan ikwerety iwem rarl ikwer-warl angkepirrem. Ra Itnweng Rlwartek irrpelthirrenty, Akngeyel apmwa ikwerety iwey-angenh, ahern nhel, apmwan ikwerety iwey-angenh intem-antey.”

### *Amern arwerl-penh*

*(Luke 6:43-45)*

33 Jesus-el angka ingwer-anem ikwer-rnem ilenh. “Arwerl mwerran amern mwerr-akertarl, arwerl arleny arrangkw amern-wenyarl. Arrantherr ayenh iterl-arey-angenh arwerl arleny-apeny.

34 Arrantherr anyelk-awarr, rtnwem anyelkel alheyel-apeny. Mwerr-arrpantey arrantherr angkeyel.

<sup>35</sup> Artwa mwerr, ra mwerr iterreyel. Ra mwerr angkeyel ingwer-rnemek. Artwa apmwa ra apmwangkwarrr iterreyel. Ra apmwel-areth angkem ingwer-rnemek. Mwerran ra mwerr-antey ilelhem. Apmwan ra apmwantey ilelhem.

<sup>36</sup> Atha arrenhantherr arraty ilem. Arlta ingk-ernel Akngeyel ingkerrenh ayerneyenh, nthakenharl rernem angkenhan, arraty-angkwarr apek, apmwangkwarrr apek.

<sup>37</sup> Mwerrarl angkenh-rnem, arrantherr Akngey-angkwarr arraty aneyenh. Apmwel-areth angkenh-rnem Akngeyel renh-rnem irrenteyenh.”

*Rernem Jesus renh arlkareweyel, ilek-ilek mpwarayntetyek*

*(Mark 8:11-12; Luke 11:29-32)*

<sup>38</sup> Pharisee-el-rnem renh ayernek “Ilek-ilek-angkwarr mpwara, Akngey-kenh rlterrk-akertel, anwantherr ngenh iterl-aretyek, Akngey-kenh innga.” Moses-kenhel-rnem ayernek arrpemar.

<sup>39-40</sup> Jesus-el renh-rnem ilek, “Arrantherr angka ilek-ilek ayerneyel-kety menty-anem, yanh ipmenherr-arey. Arrantherran apmwar! Arrantherran intemar arlkareweyel, ‘Mwerr-angker mwanty mpwara Akngey-wenh rlterrk-akertel!’ Nthakenh atha alakenh-anyem mpwarey-angenh arrekanterr. Athan angka Jonah-akertant ilem. Ranap angkakert Akngey-kenh arrwekeleny. Arrantherr angka weth iterl-areyel. Aylperr ilkwel renh kwertnew, ingwa atherrel ra ayntenh aylperr-itwel kwen.

Akngeyel aylperr iylarnek, Jonah renh iteth-antey rlkwethel iwenhey-alpetyek aketh-warl kwaty impalth-warl. Ikwer-penhan rap tawen ilkwewarl Nineveh-warl alhekanem, ra apmer ikwer-areny-rnem iletiek, apmwekety angkepirretyek Akngey-warl-athek. Ayengan Artwa Impen Akngey-kenh, ayengap arrekanterr katy ilweyenh, awengng kwenel aynteyenh ingwa atherrel, Jonah-arl aylperr-itwel atnertel kwenel ayntek-apeny, ingwa atherrel.

<sup>41</sup> Nineveh-areny-rnem Jonah-ek awelhek, rarl angka Akngey-kenh ilenhek. Rernemap nyerrirrek-anem, apmwekety angkepirrek. Akngeyel mentyarl renh-rnem arek, atwey-angenharl. Kel ayengan Atyetyart ilkwa inngarl Jonah-angkwarr. Arlta ingkernel, Akngeyel ingkerrenh-antey ayerneyenh, rernem arraty-angkwarr apententyek. Arlta ikwerel-antey, Nineveh-areny-rnemel arrenhantherrenh apmwa antweyenh, arrantherrarl atyeng awelhey-angenh-antey, apmwekety angkepirrey-angenh-antey.

<sup>42</sup> Arrantherr angka iterl-areyel arelh atyetyart Sheba-areny-akert. Rap arleng alhek inga Solomon ikwer-warl, Akngey-kenh angka akalty-ayteng awetyek. Ayengan akalty inngarl Solomon-angkwarr. Arlta ingkernel, Akngeyel ingkerrenh-antey ayerneyenh-angkwarr, arelh ra arrenhantherr apmwa antweyenh arrpemar, arrantherr atyeng awelhey-angenh-they.”

*Arrenty anyent angkep-antey apeyam-alpeyel  
(Luke 11:24-26)*

<sup>43</sup> Jesus angkek ikwer-rnem, “Arrenty-wenh-angkwarrarl alakenh-anyeman. Arrenty ra artwa anyentel-arleng-tangkwel anem, ingwerentyelap renh irrentem-anem ikwerthey. Ra artwa renh iwerl-alhem-anem, rap anpenhem-anem arlpaw-ampeny-warlanem ywarn-antey nthwerl-ayntetyek, artwa ingwerek-anem, ikwer-itwel ltyerreyek.

<sup>44</sup> Ran ament angkem, ‘Ayengan angkep artwa ikwer-warl alpem, ayengarl awank anenh-warl.’ Rap angkep alpem, artwa renh mwerr-anem arey-alpem, arikan iylpwanem arrenty-weny-anem.

<sup>45</sup> Artwa renh arem-penh, arrenty ra alpem, apmwa innga 7 ingwer-rneman ikngwerl-alpetyek, rernemap ingkerrenh artwa ikwer-warl aylpeyarr-alpetyek-anem. Artwa irrepern ra arrenty anyent-akert-tangkwel. Aleyan ra arrenty akngerr-akert-anem apmwa innganem. Angka atyenh apentey-angenhthey, alakenh apmwangkwarr apenteyel.”

*Jesus-kenh amikw-then ayteyikw-rnem-then  
(Mark 3:31-35; Luke 8:19-21)*

<sup>46-47</sup> Jesus-el akngerr ingwer-rnem akalty-anthenh. Amikw ikwerenh ayteyikw ikwerenh-rnem-then apetyek, renh aretyek. Rernemap akethel rtney-alhek, akngerrelarl arrngelekety. Ingwerentyel renh ilek, “Ntwa nhak-rnem awetyek alha! Amengkw ngkwenh ayteyengkw ngkwenh-rnem-then ngkweng mpwelheyel akethel.”

48 Ran angkek, “Kakey atyengan angwenh-rnemar! Amey atyeng angwenhar! Nhareny ingkerrenhar! arrangkwar!, nhelar! aneyel-rneman. Arrantherr Akngeyek awelhenty, arrantherr atyeng arrpemar!

49 Kwertenger! ilenh-rnemant atyeng inngerneman!

50 Angka Akngey-kenhar! apenteyel-rnem atyeng ingkerrenh.”

## 13

*Jesus-el angka artwa ntang-akert ikwer-rnem ileyel*

*(Mark 4:1-20; Luke 8:4-15)*

1 Arlta anyent ikwerel-antey, Jesus warl-they tyerrelherl-alhek kwaty irrker-ampeny-warl. Ranem arrernelhey-alhek.

2 Akngerr innga akarrirrek apmer arrpanenhthey Jesus-warl, rap ilenh angka ikwer-rnem. Akngerrelarl tyetilek-kety ra rtnwewarl-anem nganek, kwatyelarl rtnwa rtnenh-warl. Ra rtnwethey-anem anemel-anem, angka ikwer-rnem ilenh. Akngerr rtnenherremel awelhenh Jesus ikwer kwaty ilkwa impalthel.

3 Jesus-el angka akngerr ilenh. “Awelhenharey atyeng! Artwa anyentel ra ntang weyt iwerl-apenh, amern lyapetyek.

4 Artwa ra ntang weyt ingwerentyan iwerl-arlertek-warl iwerl-apenh. Thip-rnemel apetyemel arlkwek ingkerrenh.

5 Artwa ra ntang weyt ingwerentyan ahern apwert-angketyarr-warl iwerl-apenh. Rernemap

alyepel lyaperrek. Artekerr kwen-aylpey-angenh ahern apwert-angketyarrel. Nthakenh lyapey-angenh ahern apwert-angketyarrelan arrangkw.

<sup>6</sup> Atherrk-rneman arlenyirrek-anem itwern-penh kwaty-wenyel.

<sup>7</sup> Artwa ra ntang weyt ingwerentyan ahern arlkerl-angketyarr-warl iwerl-apenh. Arlkerl artekerrrel amern weyt lyapey-angenhilek. Arlkerl-angketyarrelan lyapey-angenh amern weyt arrangkw.

<sup>8</sup> Artwa ra ntang ingwerentyan ahern mwerr-warl iwerl-apenh. Amern weyt ahern mwerrrelan mwerrarl lyapek. Ntang weyt anyent-they amern akngerr lyapek, ntang 30 apek. Ntang weyt anyent ingwer-they 60 apek, ntang weyt anyent ingwer-they 100 apek. Aparnp-anem irrenh. Arnkengeny-anem inpanem.”

<sup>9</sup> Jesus-el renh-rnem ilek, “Angka nhanyem mwerr atha arrekanterr ilem, arrantherrap iterl-arenherr-arey!”

<sup>10</sup> Kwertengerl ikwerenh-rnem rernem renh ayernek, “Ilek ntwā angka anyelkelan ileyel anwekantherr. Angka ngkwenh anayntila anwekantherr!”

<sup>11</sup> Jesus-el renh-rnem ilek, “Nhanyem atha angka arrekanterrant anayntilek, Akngeykenh-angkwar. Nthakenh atha angka ingkerr ingwer-rnemek anayntiley-angenharl. Nthakenh atyengan akngerr awelhey-angenharl.

<sup>12</sup> Arrantherr Akngey-kenh angkek mwantysel awelhenty, inkwerelhemel, Akngeyel arrenhantherr intem-antey akaltyilem. Arrangkwelan, Akngeyel arrenhantherr akalty-anthey-angenh.

13 Atharl rernem angka anyelk-rnem awekarl-penhan, rernem ywarn iterrey-alpeyel.

14 Isaiah-el angka alakenh ingkwernek. Angka innganem ayntek, 'Rernem ayenh awek-penh, rernem mwantyel awelhey-angenh-antey. Rernem ayenh arek-penh, rernem ayenh iterl-arey-angenh-antey, akwerrp.' Angka innganem irrek.

15 'Rernem iylpel awelhey-angenh ingkerrenh. Rernem arey-angenh aparrng-apeny. Rernem atyeng mwantyel awelhenty, rernemap ingkerr Akngey-warl angkepirremarl.'

16 Arrantherr annga mwerr-akertel angetherr areyel, iyipa mwerr-akertel awayel,

17 Angkakert arrwekeleny-rnem artwa arraty-rnem-then rernem ilkelhenh, ayenh aretyek, aley arrantherr ayenh anaynt areyel-apeny. Rernem ilkelhenh ayenh awetyek, aley arrantherr ayenh aketh awayel-apeny.

18 Angka nhanyem awelhenherr-arey, atharl arrenhantherr ilem, angka ntang-akert.

19 Amern weytarl arlperry iwem-apeny, angka nhanyem Akngey-kenh ingkerrenh-angkwarr arlperryirrem. Ingwer-rneman ntang weytarl iwerr arlertek-warl iwek-apenyarl. Rernem Akngey-kenh angkek awelhem-tangkwel, rernem Akngey-angkwarr-anem apenteyel. Arrentyel Akngey-kenh angka ilpertileyel. Rernem intwemelirreyel Akngey-kety, rernem intem-anem apmwel-areth aneyenh.

20-21 Ingwer-rnemel Akngey-kenh angka awemarl-penh, rernem mwerrarl apenteyel

angath-antey. Rernem ntang weytarl apwert-angketyarrelan iwek-apenyarl. Artekerr-rnem aylpeyel angath-antey apwert-angketyarrelan. Rernem alakenh-anyemarl Akngey-kenh angka apenteyel angath-antey. Rernem ipmelhemant-anem, ahelengkwel-rnem atwekerr, apmwa mpwarekerr.

<sup>22</sup> Ingwerentyan ntang weytarl arlkerl-angketyarr-warl iwek-apenyarl. Rernem Akngey-kenh angka iylpelant aweyel. Rernem apwert manek ampwal ingwerentyek-then iterrerl-anem apmwel-areth. Mwerrek iterrekerr, ikwerant iterreyel. Rernem anterrkweyel-apeny ilpertilemel, arlkerlel ntang weyt anterrkweyel-apeny.

<sup>23</sup> Ingwerentyan ntang weytarl ahern mwerr-warl iwek-apenyarl. Rernem Akngey-kenh angka awemel, rernem inkwerelhem.”

### *Atherrk apmwakert*

<sup>24</sup> Jesus-el angka ingwer-anem ilenh. “Akngeyan Ingkart ingkerrenhek aneyel, alakenh-apeny anem. Artwa atyetyart anyentelan ntang weyt iwerl-apenh, amern ament lyapetyek.

<sup>25</sup> Ingwel ra ankwayntenh warrkenh ikwerenh-rnem-then. Artwa apmwel apetyek, antywer apmwernem iwerl-apenh weyt-angketyarr-warl.

<sup>26</sup> Atherrk mwerr-rnem lyapek, atherrk apmwernem-then lyapek iyntwerel.



<sup>27</sup> Warrkenh ikwerenhel-rnem renh ayernek, 'Nthakenharl atherrk apmwa nhenh-rneman lyapek mwerr-itwelan?'

<sup>28</sup> Atyetyartel renh-rnem ilek, 'Artwa apmwel atherrk apmwernem lyapelhiletyek.' Warrkenh ikwerenh-rnem angkerrenh, atherrk apmwernem tyerreynetyek. Rernemap renh ayernek, 'Atherrk apmwernem anwantherr tyerreynearl?'

<sup>29</sup> Ra angkek, 'Menty, ipmenherr-arey, amern-rnem-then tyerrekerr.

<sup>30</sup> Amern ntang ampengirrentyelant, atha warrenh atyenh-rnem thwenem, renh-rnem ingkerrenh tyerreytyek, apmwernem akngakemel, mwerr-rnem ingwer-ampeny-warl arrernemel, atherrk apmwa rwewarl iwetyek. Mwerr-angkwarr atherrk mwerr-rnem pweytiletyek, warl ilkwewarl akwerney-alenty.' "

*Angka arwerl-akert*

*(Mark 4:30-32; Luke 13:18-19)*

<sup>31-32</sup> Jesus-el angka ingwer-anem ikwer-rnem ilenh, "Akngey-kenh-angkwarr alakenh aynteyel arrpemar. Ntang ankwerrenarl lyapeyelapeny ahernel. Ntang ankerr-penh lyapem arwerl ilkwa. Thip-rnem ikwer-warl arrernelhemar. Ankerr anyent-apeny, Akngey-kenh anyent anenh."

***Anayntileyel: Ntang arwerl akngerr aneyel-apeny, Akngey-kenh-rnem akngerr-anem aneyel. Rerneman arlperrtyirrem, ntang arwerl akngerr arlperrty aneyel-apeny. Alakenh-anyeman irrpetyapelant***

***Akngey-kenh angka apenteyel. Ikwer-penhan akngerrel-anem Akngey-kenh angka apenteyel. Rerneman arlperrtyirrem, ntang arwerlel arlperrty aneyel-apeny.***

*Amern arlwariley-angker-akert  
(Luke 13:20-21)*

<sup>33</sup> Jesus-el renh-rnem angka ingwer-anem ilenh, “Amern arlety akely-penh amern ilkwerrem, arlwar rtnemel, arlwariley-angker-akert. Amern akngerr-anem ampernem. Alakenh-anyemarl yanhey, Akngey-kenh-angkwarr. Akngey-kenh-rnem akngerram-akngerr irreyenh arrpemar, amern arlwariley-angker-akert-apeny. Alakenh-apeny Inkart-kenh-rnem akngerram-akngerrirrem arrpemar.”

*Angka anyelk-angkwarr akalty-antheyel  
(Mark 4:33-34)*

<sup>34</sup> Angka angath-antey renh-rnem akalty-anthenh, angka arrpanenh ikwer-rnem anayntiley-angenh. Angka anyelk-antey ayntenh, angka iley-angenh anaynt.

<sup>35</sup> Akngey-kenh angkakert ra arrwekel ingkwernek-angkwarr-antey, kel arraty innga ayntek. Akngey-kenh angka alakenh aynteyel: “Atha angka anyelk ikwer-rnem iley. Arrwekeleny-rnemel angka anyelk-rnem away-angenh-antey.”

*Jesus-el angka anayntileyel ikwer-rnem*

<sup>36</sup> Kwertengerl ikwerenh-rnem Jesus ikwer-warl apetyek, renh ayernetyek, “Angka weth

atherrk apmwepenh anayntila, ntang weyt-they iyntwerelarl lyapek.”

<sup>37</sup> Jesus-el angka ikwer-rnem anayntilek, “Akngey-kenh Artwa Anyent Impen, ayeng artwa ntang mwerr iwerl-apenh-apeny.

<sup>38</sup> Apmer amern-angketyarrel atherrk akngerr, ahern nhelarl akngerr aneyel-apeny. Akngeyek awelheyelarl-rnem ntang mwerr-apeny. Arrenty-kenh-rnem, rernem atherrk apmwapeny.

<sup>39</sup> Atherrk apmwa iwey-angkeran anayntileyel arrentyan. Warrkenh-rnem anayntileyel angel-rnem.

<sup>40</sup> Atherrk apmwa rwewarl iwem-apeny, alakenh-anyem aynteyel arlta ingkernel.

<sup>41</sup> Akngey-kenh Artwa Impen atha angel-rnem thweneyenh, apmwernem akngakeyenh ikwerenh-rnem-they.

<sup>42</sup> Angel-rnemel ingkerrenh inem, apmwangk-warr alheyel-rnem-then akngakeyenh, rwa ilkwewarl iweman, ingkerrenh artewentyel arrangeyenh-warl.

<sup>43</sup> Akngey-kenh-rnem arrtyerneyenh ingkenyel-apeny, ikwerenh ingkerrenh. Angka nhanyem mwerr atha arrekantherr ilem, arrantherrap ingkerrenhel iterl-aretyek!”

### *Angka ampwal impen-akert*

<sup>44</sup> “Artwa ingwerel ampwal man-angketyarr arerl-alpek, inkwerelhemel. Ranem man renh arlwarrernek. Ra arterl-alhek, ra ingwer-inger apey-alpetyek. Ra anyent ikwerant arrker-nelhenh, renhant inetyek. Ra ilek-ilek ikw-erenh tharlemilek, apmer man-angketyarr renh

payemeley-alenty. Ampwal man-angketyarr impen, mwerr-angker Akngey-kenh-angkwarr alakenh arrpemar, impen alakenh-anyem ayntaxe-lan.”

*Angka apwert impen-akert*

<sup>45</sup> “Artwa anyent ingwer apwert pearl mwerr-angker ikwer nthwerl-apenh, impenek-antey.

<sup>46</sup> Ra apwert mwerr-angker store-itwek arerl-alpek. Ra apwert arlwarrenherl-alpek, apmer ikwerenh-warl alpemel. Ra apwertekant arrkernelhenh. Artwa ranem ampwal ilek-ilek ikwerenh tharlemilek, apwert pearl mwerr-angker renh payemeley-alenty man ilkwel. Man ingkerrenh arimpek, apwert renhant payemeleyek. Akngey-kenh impeney-antey arrpemar, apwert pearl-apeny.”

***Anayntileyel: anwantherr Akngey-kenh-angkwarr anetyek arrkernelheyel arrpemar, artwa rarl arrkernelhenh-apeny. Anwantherr Akngeyek iterreyn-ayntetyek, impenekey-antey.***

*Angka netting-akert angka irrpeng ingwerek-ingwer-akert*

<sup>47</sup> Jesus-el angka ingwer-anem ikwer-rnem ilenh, “Akngey-kenh-angkwarr alakenh ayntaxel; artwernem rernem netting iwek kwaty-warl, irrpeng ingwerek-ingwer anterrkwetyek.

<sup>48</sup> Rernem-anem netting renh kwaty irrker-ampeny-warl ayteng-akngey-irrpeng-angketyarr. Ikwer-penhan rernem irrpeng

renh-rnem akngakeyenh. Irrpeng mwerr-rnem rernem atnyeneyel. Irrpeng apmwernem rernem menty iwem.

<sup>49</sup> Alakenh-apeny arlta ingkernel aynteyenh. Angel-rnem apetyeyenh, apmwa ingkerrenh akngaketyek, mwerr-rnem-they.

<sup>50</sup> Renh-rnem-anem ingkerrenh rwa aknganenty ikwer-warl iweyenh, ikwer-itwek-anem rernem artewentyel innga arrangkeyenh.”

<sup>51</sup> Jesus-el renh-rnem ayernek, “Arrantherr angka nhenh aweyel?” Rernem angkek, “Kel, anwantherr aweyel!”

<sup>52</sup> Ikwer-penhan ra renh-rnem ilek, “Store-arenyel ampwal ilek-ilek tharlemileyel, awanken-y-rnem-then lyerteny-rnem-then. Inkart Akngey-kenh angka ingkerrenhek arraty akaltyirretyek, angka arrwekeleny-angkwarr akaltyirretyek angka lyerteny-angkwarr akaltyirretyek. Alakenh-anyem Akngey-kenh-angkwarr arraty apenteyel.”

*Nazareth-areny-rnem Jesus ikwer irrpelthirreyel*

*(Mark 6:1-6; Luke 4:16-30)*

<sup>53-54</sup> Jesus tawen Nazareth, apmer ikwerenh-warl alpek. Ra warl kwen-warl aylpek, Jew-kenh tyaty akely-warl. Ra renh-rnem akalty-anthenh. Ingwer-rnem Jesus-ek inkwerelhek. Rernem angkerrenh, “Jesus rantarl ingkerrenh-angkwarr iterl-areyel, ran akalty innga. Ranap ngangker-akert inngarl nhenhey, arntety mwerriley-angkerarl.” Akngerr ingwer-rneman Jesus-ek irrpelthirremel angkerrenharl,

<sup>55</sup> “Jesus ahern-areny-kenh alerikw! Ilek-ilek arwerl-penh arnwarney-angkeran-kenh! Ilenhan Mary-kenh ampikwarl! Ayteyikw-rneman ikwerenh apmer nhareny-rnemarl. Itnan ayteyikw-rnem ikwerenh, James, Joseph, Simon, Judas.

<sup>56</sup> Arrempikw-rneman ikwerenh apmer nhareny-rnemarl. Ran anwantherr-apeny arrpemarl, Akngey-kenh inngewenyarl.”

<sup>57</sup> Jesus angkek, “Apmer nhareny-rnemantarl atyeng irrpelthirremelan angkerreyel, ayeng angkakert Akngey-kenh inngewenyarl. Atyenhrnem atyeng irrpelthirreyel arrpemarl.”

<sup>58</sup> Apmer-areny-rnem ikwer irrpelthirrenharlkety, Jesus-el renh-rnem mwerriley-angenh.

## 14

### *John Baptise-emeley-angker atweyel*

*(Mark 6:14-29; Luke 9:7-9)*

<sup>1</sup> Herod, atyetyart Galilee-arenyel angka awek, Jesus-elarl arntety-rnem mwerrilenh, apmer arpanenhek.

<sup>2</sup> Herod ra ywarn iterrenh John Baptise-emeley-angker ikwer. Ra warrkenh-rnem ilek, “Rang angkep ipmepenh itethirrek, rang apmer arpanenhek mwerrileyel?”

<sup>3-4</sup> Herod-kenh awayikw anewikw ikwerenh arelh anyent itnan Herodias. Herod-el anew ikwerenh rakek. John-el renh ilek, “Ntwa nthakenharl awayengkwan anew ikwerenhan rakek? Apmwel-aretharl alakenhey! Awayengkwan-anteyarl anew ikwerenh ntwa

rakekan, arraty-wenyarl!” Arelh Herodias ra ahelirrek John ikwer. Herod-el artwa ahelengkw thwenek, John renh anterrkwetyek, tyayl-warl akwernetyek.

<sup>5</sup> Herod aterirrek ingwer-rnem-kety, ingwer-rnemelarl John renh iterl-arek Akngey-kenh angkakert. Herod atherr-angkwarr iterrenh, mwerr-angkwarr, apmwangkwarr.

<sup>6</sup> Atyetyart Herod-rnem-then Atyetyart ilkwa ingwer-rnem-then, apmer Galilee-areny-rnem akarrirrek, rernem amern kwenty ingkerrenhel arlkwetyek. Atyetyart ahelengkw-rnem-then rernem akarrirrek ingkerrenh amern ingkerrenhel arlkwetyek arrpemar. Arelh Herodias-kenh ampikw rntwenh ikwer-rnem ingkerrenhek. Aleyak ikwer rernem inkwerelhek, rarl mwerr-angker Herod-kenh apmerel rntwenhek.

<sup>7</sup> Herod-el kwey renh ilek, “Ilek-ilek akngerrek nga arlkwententy, atha ngenh anthem.”

<sup>8</sup> Arelh Herodias ra iterrek, John renh atwetyek. Kwey ra amikw ikwerenh Herodias-warl alhek. Ra amikw renh ayerne, “Ilekekarl atha ayernem Atyetyart ilenhan?” Amelikw renh ilanthe, “Akapwert John Baptise-emeley-angker yanh ina, pmwar-warl arrernemel, ayenh anthemel!” Ikwer-penhan kwey rap Atyetyart Herod-warl alhek. Ra Atyetyart Herod renh ilek, “Akapwert John Baptise-emeley-angker arterna, pmwar-warl arrernemel, ayenh anthemel.”

<sup>9</sup> Herod ra amperrngant-anem irrek John ikwer. Akngerrel renh awekarl-kety, ra nthakenh akengenty angkey-angenh. Nthakenh ra arrkngert angkey-angenh.

<sup>10-11</sup> Herod-el ahelengkw thwenek tyayl-warl, John ahenty arternetyek. Ahelengkwel arreylpel akapwert arternek, akapwert renh pmwar-warl arrernemel, kwey renh antheK. Kwey ra amikw-warl akngeynek, John Baptise-emeley-angker akapwert.

<sup>12</sup> John-kenh kwertengerl-rnemel angka awek, rarl ilwek. Rernem apetyek, ipma awenng-warl akwernetyek. Rernem renh akwernek. Rernem Jesus renh angka ilek.

<sup>13</sup> Jesus ra angka John-akert awek-penh ra nganerl-alhek rtnwewarl, ra Galilee kwaty ilk-wangkwarr artarnpenhek, apmer alther-warl, ampeny-warl, ra ament anayntetyek. Ingwer-rnem ingkern-they artenhirrek-anem ikwer-warl, ingkel alhemel tawen-they.

*Jesus-el 5,000 wanteyel*

*(Mark 6:30-44; Luke 9:10-17; John 6:1-14)*

<sup>14</sup> Jesus-anem rtnwethey atwarrek, ra akngerr arek. Ra ikwer-rnem amperrngirrek, ingkerrenh arnty-rnem-then mwerrilek.

<sup>15</sup> Atwerrp, kwertengerl ikwerenh-rnem Jesus-warl apetyek, ikwer angkek, "Amern-wenyarl nhanyeman, arrangkwarl. Yanh-rnem ingkerrenh-antey thwena tawen-rnem-warl, amern-tangkwel inerl-alpetyek. Atwerrpirrekerrem-awaty!"

<sup>16</sup> Jesus angkek, "Arlkarel arrantherr wantenherr-arey."

<sup>17</sup> Rernem Jesus renh ilek, "Amern ampeng 5-pelant, aker irrpeng atherr-thenant."



18 Jesus-el renh-rnem ilek, “Atyeng-warl akngetyenherr-arey!”

19 Jesus-el renh-rnem ilek, rernem arrernel-hetyek atherrk-warl. Amern irrpetyap aker irrpeng-atherr Jesus-el inek. Ra Inkart Akngey-warl angkek inkwerelhemel, rarl amern antheek, aker irrpeng-then antheek. Jesus-el amern rlweth-akek. Ra kwertengerl ikwerenh-rnem antheek, rernem-anem antheynetyek ingwer-rnem. Jesus-el aker irrpeng rlweth-akek. Ra antheek kwertengerl ikwerenh-rnem rernem antheynetyek ingwer-rnem.

20 Rernem ingkerrenhel arlkwek-penh, rernem atnerteng-anem anek. Rernem akertang arlkwekarl-penh, rernem rtnwa amernek-arelh 12-pel-warl ampwerrk iweynek.

21 Artwa 5,000-el amern arlkwek, arelh-rnem-then, ampnerm-then ingkerrenhel.

*Jesus ra ingkel irrwerlap-alheyel kwaty ampep-angkwarr; ahern-angkwarr-apeny  
(Mark 6:45-52; John 6:16-21)*

22 Jesus-el kwertengerl ikwerenh-rnem ilantheek, rernem rtnwel kwaty anthenayn-ampeny-warl artarnpenhetyek arrwekel-antey, ra ingwer-rnem ilantheek rernem apmer-warl-anem alpetyek.

23 Rap apwert irrwerl-warl nganek, Akngeyek ament angketyek. Atwerrpirrek-anem, ra ament-areny anenh.

24 Rtnwa ranem kwaty ampep-itwek. Awer ilkwel rtnwa renh akngelhew-akngelhilek.

<sup>25</sup> Ingwepenh ingkeny tyerrelhey-angenhel, ra ingkel irrwerlap-alhek kwaty ampep-angkwarr, ahernel-apeny.

<sup>26</sup> Kwertengerl ikwerenhel-rnem renh arek, rernem aterirremel arlkenh, “Arrewaly yanh-an.” Rernem aterirrek, arrewalyek-athen.

<sup>27</sup> Jesus-el renh-rnem ilek, “Artewentyel aterirrey-angenh! Ayengarl nhan!”

<sup>28</sup> Peter-el renh tyerne, “Ingkartay, ayenh ila, ayeng kwaty-angkwarr alhetyek ngkweng-warl!”

<sup>29</sup> Ranem angkek, “Apetya”. Peter ranem rtnwethey atwarrelhilek, kwaty-angkwarr ingkel alhemel Jesus-warl.

<sup>30</sup> Ranem aterirrek alherrp-kety, kwen-anem aylperl-alhetyek-anek. Ra arlkek, “Ingkartay, ayenh itethila!”

<sup>31</sup> Jesus ra anamerl-antey iltia ikwerenh anter-  
rkwek angkemel, “Ilek-kety ntwā ayenh tnakey-  
angenh!”

<sup>32</sup> Ratherr rtnwewarl nganek, kwaty awer-  
akert arternp-anem irrek atnengk-anem.

<sup>33</sup> Rernem renh tnakek, “Nga Akngey-kenh  
alerikw innga!”

*Jesus-el akngerr mwerrileyel apmer  
Gennesaret-itwek  
(Mark 6:53-56)*

<sup>34</sup> Rernem artarnpenhek intwarr-ampeny-  
warl, apmer Gennesaret-ampeny-warl.

<sup>35</sup> Apmer ikwer-areny-rnemel renh arek-  
penh, rernem-anem ingwer-rnem ilek. Apmer  
arrpanenh-they arntety-rnem akngetyek ikwer-  
warl.

<sup>36</sup> Rernem iterrenh, “Anwantherr arnkwa ikwerenh arnenty anwantherr mwerrirremarl.” Rernem arnkwa arnep-arnek-penh rernem mwerrirrek-anem, arntety-weny-anem.

## 15

*Pharisee-rnemel angka arrwekeleny-angkwarr apenteyel*

*(Mark 7:1-13)*

<sup>1</sup> Moses-kenh-rnem-then Pharisee-rnem-then Jesus-warl akarrirrek Jerusalem-they.

<sup>2</sup> Rernem arek, kwertengerl Jesus-kenhel-rnem itep aternnigel amern alhewerarl arlkwek, itep lhewelhey-angenhel. Jew-rnem itep lhewelhenh amern arlkwey-alenty. Rernem Jesus renh ilek, “Kwertengerl ngkwenhel-rnem nthakenharl itep lhewelhey-angenhharlan amern arlkwey-alenty. Arrwekeleny-kenh apmer nhel aknganek amern arlkwey-alenty itep lhewelhetyek.”

<sup>3</sup> Jesus-el renh-rnem tyernek, “Arrantherr Akngey-kenh angkekety intwemelirrek, ahern-areny-kenhant arrantherr apenteyel.

<sup>4</sup> Atha ileyel Akngey-kenh angel: ‘Arrantherr ameyek akngeyek awelhenherr-arey.’ Moses-kenh angka alakenh-anyemarl aynteyel arwekelenyan: ‘Akngeyek ameyek apmwel-areth angkentyek, renh ipmek atwem.’

<sup>5</sup> Arrantherr apmwel-areth akalty-antheyel, Akngey-kenh-angkwarr-weny. Arrantherr man ikwerel amey-rnem-then akngey-rnem-then arntarnt-arey-angenh, man ilenh arrantherr ayerrpileyel. Arrantherr irrtwyerremel ileyel man nhenhan Akngey-kenh-arrpantey.

6 Arrantherr Akngey-kenh angkekety ipmelhek, angka arrekantherrenh-angkwarrant akalty-antheyel.

7 Arrantherr irrtwyerremel ilelheyel. Awankakerr Isaiah-el Akngey-kenh angka pip-warl ingkwernek, arrantherran aneyel-apeny.

8 Akngey angkek ikwer-rnem, 'Arrantherr irrtwyerremel atyeng inkwerelheyel, atyeng-angkwarr apentey-angenh.

9 Arrantherr apenteyel arrekantherrenh-angkwarrant, ahern-areny-kenh-angkwarrant, Akngey-kenh-angkwarr-weny. Alakenh arrantherr ingwer-rnem apmwangkwarr akalty-antheyel.' "

*Alakenh Akngey-angkwarr apmwelhilem  
(Mark 7:14-23)*

10 Jesus-el akngerr ingwer-rnem akarrilek. Ra renh-rnem ilek, "Atyeng arrantherr awelhetyek arternp.

11 Amern arrantherr arkwetyek alhewer, nthakenharl arrantherr apmwelhiley-angenh Akngey-angkwarr, amern alhewer arkwemel. Arrantherr apmwel-areth angkenty, arrantherr Akngey-angkwarr apmwelhilemarl."

12 Kwertengerl ikwerenhel-rnem renh ilek, "Pharisee-rnem ngkweng ahelirrenh nga apmwel-areth angkenty-arrpantey."

13 Jesus-el renh-rnem ilek, "Apmwangkwarrarl akalty-antherl-anentyan, Akngeyel renh iwemarl, arwerl apmwa iwem-apeny. Pharisee-rnem arwerl apmwapeny.

14 Artwa aparrngel nthakenh atnwenhey-angenh artwa aparrng ingwer. Ratherr atherr-anteyarl aytnekerr irrkewarl aparrngant-atherr.”

**Anaytileyel: Alakenh-anyem Jesus-el ikwer-rnem ilenh, Pharisee-rnem arwerl apmwapeny anenh, rernem artwa aparrng-apeny.**

15 Peter-el renh ayernek, “Angka anyelk anwernekantherr anayntila, angka amern alhewer arlkwentyek.”

16 Jesus angkek, “Ntwa iterl-arey-angenh-antey, ywarn iterreyel!

17 Amern alakenh arlkwemer, nthakenh arleng-alenty ayntey-angenh, rap atnert-they ywerrem.

18 Apmwel-areth angkenty, arrakert-they angka apmwel-areth ikwerenh tyerrelheman. Alakenh apmwelhileyel Akngey-angkwarran. Amern-then aker-then arrangkwarl, nthakenh Akngey-angkwarr apmwelhiley-angenh.

19-20 Arrantherr apmwel-areth iterrenty, arrantherrap Akngey-kety amentirremarl, apmwelhilemarl. Arrantherr ingwerenty ipmek atwenty, ingwer-kenh arrkar irrtyertel ikngwenty, arrantherr irrtyertel inenty, arrantherr tyel-angkenty ingwer-rnemek, arrantherrap Akngey-kety apmwangkwarrarl aneman. Amern arlkwenty itep aterrng-akertel nthakenh Akngey-angkwarr apmwelhiley-angenh. Kel ntwa amern arlkwentyek alhewer.”

*Arelh Canaan-areny anyentel Jesus renh*

*tnakeyel**(Mark 7:24-30)*

<sup>21</sup> Jesus ra anperl-alhek apmer Tyre-warl, Sidon-warl.

<sup>22</sup> Ikwer-penh arelh Jew-weny Caanan-areny-anem anterrey-alhenh Jesus ikwer-warl arlkemel, "Ingartay, David-kenh, atyeng amper-rngirra! Ampa atyenh arrenty-angketyarr!"

<sup>23</sup> Jesus-el renh tyerney-angenh, arelh rarl aleth-antey ikwer arlkeynenh. Kwertengerl ikwerenh-rnem Jesus ikwer angkek, "Arelh yanh irrenta".

<sup>24</sup> Jesus ran angkek, "Akngeyel ayenh thwenek, atha Israel-kenh-rnemant arntarnt-arayntetyek, rernem aperrertirrekerr amentirrekerr yep-yep-rnem ingwer-rnemarl aperrertirrem-apeny atyetyart-wenyel."

<sup>25</sup> Arelh ranem arrer-apeny irrek. Rap kwenirrek-anem ikwer angkemel, "Ingartay, atyeng amperrngirra!"

<sup>26</sup> Jesus-el renh ilek, "Atha Jew-rnemant arntarnt-areyel, atyenh-rnemant. Anwantherr ampennem-tangkwel wantey. Ampel-rnem-tangkwel arlkwenty-penh arengk-rnemant-anem wantemel. Atha atyenh-rnem Jew-rnem-tangkwel arntarnt-areyel."

<sup>27</sup> Arelh angkek ikwer, "Arengkel-rnem arlkwetyek arrpemar, arengk-kenh amernan rernem iwetyek arrpemar. Jew-rnem rernem ingkerrenh atyenh-rnem-kety arlkarirreyel. Atyenh-rneman arengk-apenyarl aneyel, Jew-rnem-angkwarr. Atha ngenh iterl-areyel, ntwa

ingkerrenh arntarnt-arey-angker. Atyeng-then amperrngirra!"

<sup>28</sup> Jesus ran angkek, "Nga atyeng arternp awelhek, kel atha ngenh arntarnt-arem." Kel anamerl-antey arrenty tyerrelhek kwey ikwerenh-they, kwey ikwerenh mwerr-anem irrek.

<sup>29</sup> Jesus apmer ikwer-they alpek, ra kwaty Galilee impalth-angkwarr alhenh. Ra apwert ilkwewarl nganek, apwert-itwek anenh.

<sup>30</sup> Akngerr ikwer-warl akarrirrek, Rernem arntety-rnem-then akngeynek ikwer-warl, lerrp-rnem-then aparrng-rnem-then akерter-rnem-then arntety ingwer-rnem-then. Jesus-el renh-rnem mwerrilek.

<sup>31</sup> Ingkerrenh apateyeppek. Akерter-rnem mwerr-anem angkenh, lerrp-penh rernem mwerr-anem alhenh. Aparrng-penh-rnem arenh-anem. Rernem inkwerelhek Akngey Israel-kenhek, Jesus-elarl ingkerrenh mwerrilek, Akngey-kenh rlterrk-akertel.

*Jesus-el artwa 4,000 wanteyel, arelh-rnem-then ampernem-then*

*(Mark 8:1-10)*

<sup>32</sup> Akngerr akarrirrek Jesus-warl. Amern ingkerrenh ywerrelhilek. Jesus irrepem angayakw-rnemek amperrngirrek. Jesus ilelhek kwertengerl ikwerenh-rnemek, "Ayeng irrepem angayakw-rnemek amperrngirreyel. Arlta irrpety-inger rernem anwekantherr-itwel anenh, angayakw. Nthakenh atha renh-rnem thweneyney-angenh, apmer arleng-warl

alpetyek, rernem aytney-alpekerr angayakw angath-antey.”

<sup>33</sup> Kwertengerl ikwerenh-rnemel renh ayernek, “Amernan anwantherr nthenh-itwel inem artwa arnkengeny wantetyek? Arrangkwarl nhenhan, aherretyarl! Atherrkeny-weny!”

<sup>34</sup> Jesus-el renh-rnem ayernek, “Amern akngerrelang arrekantherrenhan?” Rernem renh tyernek, “Ya, amern ampeng 7-ant aynteyel, aker irrpeng irrpety.”

<sup>35</sup> Jesus-el ingkerrenh ilek, “Arrantherr ingkerrenh anenherr-arey ahernel.”

<sup>36</sup> Jesus-el amern 7 renh-rnem inek aker irrpeng-rnem-then. Ra Inkart Akngey-warl angkek, inkwerelhemel, amern-then aker-then akngerr anthetyek. Jesus-el amern-then aker-then rlweth-akek, kwertengerl ikwerenh-rnem anthemel, rernem artwa ingwer-rnem antheyntyek ingkerrenh.

<sup>37</sup> Jesus-el amern irrpety-penh irrpelthel akngerrilek, ingkerrenh wantetyek. Amern akngerr menty-anem irrek. Kwertengerl rernem ingkerrenh amern-rnem akwetyeynek, teram 7-warl ampwerrk iwemel ingkerrenh. Teram 7 amern akngerr-akert rtenh.

<sup>38</sup> Artwa 4,000 rernem atnerteng-anem anenh, arelh-rnem-then ampernem-then.

<sup>39</sup> Jesus-el ingkerrenh thwenek, rernem apmer-warl alpetyek. Jesus rtnwewarl nganek. Rtnwa ikwerel rernem alhek apmer ingwerampeny-warl-anem, apmer Magadan-warl.



# 16

*Rernem Jesus renh arlkareweyel  
(Mark 8:11-13; Luke 12:54-56)*

<sup>1</sup> Artwa Pharisee-rnem Sadducee-rnem-then Jesus-warl apetyek, ilerretyek. Rernem renh arrkernek, Akngey-kenh rlterrkek, ingwerek-ingwer-angkwarr mpwaretyek, mwerriletyek.

<sup>2</sup> Ranem renh-rnem ilek, "Alker rnter-rnter irrenty atwerrpan ntwā arem, kel iterl-arem-anem ingwepenh alker akethirrem arrpemarl.

<sup>3</sup> Kwenpayel artem, ingwepenh kwaty rntweyenh-anem. Arrantherr alhengk-areyel alker yanh, kwatyarl rntweyenh. Kwaty rntwey-alenty arrantherr arem, arrantherrap iterl-arem. Arrantherr aleyan iterl-arey-angenh, nthakenharl irreyenh."

***Anayntileyel: Jesus-el ikwer-rnem ilek, "Ayeng Akngey-kenh Impen. Arrantherr atyeng awelhey-angenh, ayengarl Akngey-kenh innga. Atha ilek-ilek mpwarek, Akngey-kenh angka akalty-anthek. Arrantherr atyeng irrpelthirrenharl."***

<sup>4</sup> Jesus-el renh-rnem ilek, "Arrantherr angka ingwerek-ingwer ayerneyel-kety menty-anem ayenh ipmenherr-arey. Arrantherran apmwarl! Arrantherran ayenh intemarl arlkareweyel, 'Mwerr-angker mwanty mpwara Akngey-kenh rlterrk-akertel!' Atha alakenh-anyem mpwarey-angenh arrekantherr. Athan angka Jonah-akertant ilem arrekantherr."

***Anayntileyel: Ranap angkakert arrwekeleny Akngey-kenh. Arrantherr angka weth***

***iterl-areyel. Aylperr ilkwel renh kwertnek, ingwa atherrel ra ayntenh aylperr-itwel kwen. Aylperr ilkwel renh kwertnew, ingwa atherrel ra ayntenh aylperr-itwel kwen. Akngeyel aylperr iylarne, Jonah renh iteth-antey rllkwethirrelhiletyek aketh-warl, kwaty impalth-warl. Ikwerpenhan rap tawen ilkwewarl Nineveh-warl alhek-anem, ra apmer ikwer-arenyrnem iletyek, apmwekety angkepirretyek Akngey-warl-athek. "Ayengan Artwa Impen Akngey-kenh, ayengap arrekantherr katy ilweyenh, awenng kwenel aynteyenh ingwa atherrel, Jonah-arl aylperr-itwel atnert kwenel ayntek-apeny, ingwa atherrel." Matthew 12:39 aynteyel arrpemarl.***

*Mwentyel arntarnt-arelhenherr-arey Phariseernem-kety*

*(Mark 8:14-21)*

<sup>5</sup> Kwertengerl ikwerenh-rnem kwaty ilkwangkwarr artarnpenhek. Rernem amern ampeng iwerl-alhek apmerek.

<sup>6</sup> Jesus-el renh-rnem ilek, "Mwentyel arntarnt-arelhenherr-arey artwa Phariseernem-kety, artwa Sadduceernem-kety. Ahelarl rernem arlwar rtneyel-kety, thwet-penh-apeny, apmwangkwarrarl rernem akalty-antheyel-kety."

<sup>7</sup> Kwertengerl ikwerenh-rnem apal angkerrenh Jesus-el renh-rnem ilerl-anentyek-athen, "Ra ahelirreyel anwekantherr, anwantherrarl amern iwerl-alhekek-arnterl."

<sup>8</sup> Jesus-el iterl-arek, rernemarl ikwer angkerrenh. Ra renh-rnem ilek, "Ilekekarl arrantherran amernek angkerreyel, arrantherr amern iwerl-alhek-penhan? Arrantherr ayenh tnakey-angenh, atha ingkerrenh amernel wantey-angker!

<sup>9</sup> Ayenh arrantherr iterl-aremer, ayeng Akngey-kenh rlterrk-akert. Arrantherr ayenh iterl-aremer, atha artwa akngerr 5,000 wantek, amern 5-pelel.

<sup>10</sup> Arrantherr ayenh iterl-aremer, atharl 4,000 amernel-then akerel-then wantekarl amern 7-pelel."

<sup>11</sup> Jesus-el renh-rnem ilek, "Mwantyel arntarnt-arelhennherr-arey Pharisee-rnem-kety, Sadducee-rnem-kety. Ayeng amernek angkey-angenh. Mwanty arnwarnelhemel yanh-rnem-kety, rernemarl apmwangkwarrarl akalty-antheyelarl-kety."

***Anayntileyel: Alakenh-anyem Jesus-el renh-rnem ilek, rernem iterretyek. Ra renh-rnem ilek, rernem arntarnt-arelh-ayntetyek. Anterrkwetyek rernem arrkernelhenh, apmwangkwarr alhenh-rnem.***

<sup>12</sup> Kel rernem iterl-arek-anem, rarl artwa ingwer-rnemek angkenh, Pharisee-rnem-then Sadducee-rnem-then rernemarl apmwangkwarr akalty-anthenh.

*Peter-el Jesus renh Christ itneweyel  
(Mark 8:27-30; Luke 9:18-21)*

13 Jesus ra apmer Caesarea Philippi-warl apetyek, ra kwertengerl ikwerenh-rnem ayernek, "Artwa angwenh Akngey-kenh Impenan rernem ileyel?"

14 Rernem angkek, "Ingwer-rnemel ileyel John Baptise-emeley-angker apek, Elijah apek, Jeremiah apek, Akngey-kenh angkakert ingwer-rnem apek."

15 Ra renh-rnem ayernek, "Ilek arrantherr atyeng angkerreyel?"

16 Simon Peter-el renh ilek, "Nga Christ-arl, Akngey-kenh alerikwarl."

17 Jesus-el renh ilek, "Simon, Jonah-kenh alerikw, Akngeyel ngenh arntarnt-areyel inga! Ahern-arenyel ngenh akalty-anthey-angenh. Akngey atyenh irrwerl-areny anyentelant ngenh akalty-anthekan, ntw aayenh iterl-arayntetyek!

18 Peter rlterrkarl ngan. Apwert rlterrk-itwel warl artelhem-apeny, Peter rlterrk arrpemar. Atyenh-rnemel rlterrk-angkwarr apenterl-ayntetyek ngkweng-angkwarrant. Arrentyel renh-rnem nthakenh ywerrelhiley-angenh." Alakenh-anyem Jesus-el renh itnewek, itnan apwertarl, Peter renh.

19 "Atha ngenh mwerr-angkwarr arraty rnrkerneyel, apmwa ingkerrenh-they iwetyek. Ntw aapmwa ingwer-they iwenty Akngey-kenh-angkwarr, kel. Akngeyel artwa renh areyel mwerr-anem, arraty-anem. Ntw aapek ingwer-they apmwa iwey-angenh, Akngeyel renh areyel arrangwarl, apmwakert-anteyarl."

20 Jesus-el kwertengerl ikwerenh-rnem artwerilek, “Atyeng angkerrey-angenh arrantherr anayntetyek, ayengarl Anyent Impenan, Akngeyel ayenh thwenek ahern nhenh-warl.”

*Jesus ilelheyel*

*(Mark 8:3—9:1; Luke 9:22-27)*

21 Ikwer-penhan Jesus-el renh-rnem akalty-anthek, “Arlta atyenhan arrer-anem. Alerl ayeng Jerusalem-warl alpetyek. Jew-kenh tyaty-areny Atyetyartel-rnem-then priest-rnemel-then ayenh anterrkweyenh, irrwampenh anthemel. Ahelengkwel-rnem ayenh ipmek atweyenh. Ingwa atherr-penh ayeng ipmepenh akemirreyenh arppemarl.”

22 Peter-el renh ilek, “Akngeyel ngenh iwerl-alhey-angenh. Ahelengkwel-rnem ngenh atwey-angenh.”

23 Jesus-el renh ilek “Atyengety alhay Satan-ay! Ngarl iterreyel ahern-areny-kenh-angkwarr, Akngey-kenh-angkwarr-weny!”

24 Jesus-el kwertengerl ikwerenh-rnem ilek, “Arlka menty anthelhem atyeng-angkwarr apenterl-ayntetyek, amentewarl alhey-angenh. Ingwerenty apek iteth anetyek ilkelhenty, ra atyeng-angkwarr apenterl-ayntetyek, ikwer-rnem-angkwarr iterrey-angenh.

25 Nga amentewarl alhenty, ngap ilweman. Nga atyeng-angkwarr apententy, ngap iteth aneman.

26 Nga ahern-arenyekant iterrenty, ngap amentewarl irrem, ywerrem-anem.

<sup>27</sup> Akngey-kenh Artwa Impen ranem apey-alpeyenh Akngey-kenh rlterrk ilkwakert, angel-rnem-akert. Ranem renh-rnem arntarnt-areyenh, rernemarl mwerr-angkwarr apentenh.

<sup>28</sup> Ingwerel-rnem Akngey-kenh Artwa Impen areyenh-antey, ikwerenh-rnem-akert, rernem ilwey-alenty.”

## 17

*Jesus apey-alheyel arlertek rlterrk ilkwakert  
(Mark 9:2-13; Luke 9:28-36)*

<sup>1</sup> Arlta 6-penh, Jesus-el renh-rnem atnwenhek apwert irrwerl ikwer-warl, amentewarl. Peter-then James-then awayikw ikwerenh John-then.

<sup>2</sup> Kwertengerl ikwerenhel-rnem arek, inngerr renh arrtyernenty, ingkenyel arrtyernem-apeny, arnkwan arlter inngakertel.

<sup>3</sup> Arrwekeleny-atherr, Moses-then Elijah-then Jesus-itwel aremirrek arrpemarl. Rernem angkerrenh.

<sup>4</sup> Peter angkek Jesus ikwer, “Ingkartay, awethem ntwanwernenhantherr atnwenhey-alhek nhewarl. Mwerr anwernantherr lywenty irrpety rnkerney, ingweran ngkwengarl, ingweran Moses-ekarl, ingweran Elijah-ekarl. Nga apek ilkelhentyekan.”

<sup>5</sup> Peter rarl angkenh-antey, kwenpayel-anem renh-rnem artek ingkerrenh-antey. Rernem angkanem awak, irrwerl-theyarl angkek, “Nhenh alerey atyenh, ayeng ikwer inkwerelheyel, ikwer awelhenherr-arey!”

<sup>6</sup> Rernem awak-penh, rernem ilperr iwelhek aterel.

<sup>7</sup> Jesus-el renh-rnem arnep-arnek, angkemel, “Akemirrenherr-arey, aterirrey-angenh!”

<sup>8</sup> Rernem-anem itnywenenhey-alpek Jesus anyentant-anem rtnerl-anenty.

<sup>9</sup> Rernem apwert-they atwarrenhey-alpenh, Jesus-el renh-rnem artwerilek, “Anyelk aney-alpenherr-arey, arrantherrarl ayenh aytarek-penh. Ingwer-rnem iley-angenh, Akngey-kenh Artwa Impen ayeng ipmepenh itethirrenty-penhelant ingwer-rnem iletetek.”

<sup>10</sup> Kwertengerl ikwerenhel-rnem Jesus renh ilek, “Moses-kenh angka akalty-anthen-anthenhel-rnem ileyel, ‘Elijah retangkwelarl apetyeyenh arrwekelan, Christ-ek-athath.’ ”

<sup>11-12</sup> Jesus angkek, “Ya, arraty inngarl! Elijah kel arrwekel apetyek, ingkerrenh akaltyiletetek, rernem Akngey-angkwarr arratyirretetek. Rernem Elijah ikwer irrpelthirrenh. Alakenh-anyem rernem ayenh Artwa Anyent Impen Akngey-kenh irrpelthirremel atweyenh, ipmek-atwety. Akngey-kenh angka alakenh aynteyel.”

<sup>13</sup> Kel rernem iterl-arek-anem, “John wethekarl nhan angkeyel anwekantherr!”

***Anayntileyel: Jesus-el angkanem Elijah-penh ilek, renh-rnem akalty-anthetyek. John anenh Elijah anenh-apeny, Akngey-kenh angkakert.***

*Jesus-el away arrenty-akert mwerrileyel  
(Mark 9:14-29; Luke 9:37-43)*

<sup>14</sup> Rernem apetyek, artwa akngerr akarrirrek-warl. Artwa anyent apmer ikwer-areny apetyek kwenirremel, Jesus ikwer-warl angkek,

15 “Inkartay, atha away arntety atyenh akngetyek ngkweng-warl, ntwā renh mwerriletyek. Away ra arwengk-arwengk irreyel, rwe-warl aytneyel, kwaty-warl-then.

16 Atha ywarn-antey ayernekwertengerl ngkwenh-rnem, rernem away atyenh mwerriletyek. Rernem arrangwarl.”

17 Jesus angkek, “Akgerr-inger ayeng arrekanttherr ywarn arrkernelhek, atha arrenhanttherr akaltyileyek. Atyeng arranttherr arlkwentey-angenhel, iylpelantarl awenh. Nthakenh ayenhan arranttherr iterl-arey-angenh, ayengan arlertek ilkwakert? Away ilenh atyeng-warl akngetya!”

18 Rernem akngetyek away renh Jesus ikwer-warl. Jesus-el arrenty renh irrentek. Away ra mwerrirrek-anem.

19 Kwertengerl ikwerenhel-rnem renh ayernekwertengerl ament-itwek, “Jesus, nthakenh ngkwengantarl arrenty ilenhan awelhemel alpek, anwarnanttherr ywarnarl ikwer arrkernelhek, arrenty renh irrentetyek.”

20 Jesus-el ilek kwertengerl ikwerenh-rnem, “Arranttherr Akngey renh rltterrknakey-angenh. Arranttherrap Akngey renh tnakenty, arranttherrapwert renh ilenty akngelhetyek, kel ra akngelhem. Ntwā Akngey renh tnakentyelan ntwā ilek-ilek mpwarem.”

*Jesus ilelheyel, ingwer-ingerarl ra ilweyenh  
(Mark 9:30-32; Luke 9:43-45)*



22-23 Rernem alhek, apmer Galilee-angkwarr. Jesus-el kwertengerl-rnem ilek, “Ahelengkwel-rnem ayenh artwa anyent impen Akngey-kenh anterrkwemel atweyenh. Ingwa atherr-penh, ayeng ipmepenh itethirremel akwenteyenh.” Rernem ikwer alpwelyirrek-anem amperrngirremel, rarl renh-rnem ilek.

### *Tax maney payemeletyek*

24 Jesus kwertengerl ikwerenh-rnem-akert Capernaum tawen-warl apetyek. Man akwetyey-angker rernem Peter renh ayernek, “Atyetyart ngkwenhel man antheyel Jew-kenh tyaty ilkwareny-rnemek, arrangkw apek?”

25 “Yaw, ra man antheyel,” Peter-el renh-rnem ilek. Peter ra apmer-warl alpek. Jesus-el renh ayernek, “Atyetyart ahern-areny-rnemel angwenh-rnem-they man-rnem ineyel, alerikw-rnem-they apek, ingwer-rnem-they apek?”

26 Peter-el renh tyernek, “Ingwer-rnem-they.” Jesus-el renh ilek, “Alerikw-rneman arrangkw-warl, man anthey-angharl.

27 Mwerr alakenh anwantherr ikwer-rnem irrwernelhey-angengan, ikwer-rnem awalhemel. Nga alhetyek irrpeng anterrkwetyek. Arrakert altywerilemel, ngkweltyan ikwer-itwek anetyek, man akwetyey-angker anthemel, man tyaty ilkwareny-rnem-warl anthetyek.”

# 18

*Kwertengerl ikwerenh-rnem angkerreyel,  
Atyetyart ilkwa anetyek  
(Mark 9:33-37; Luke 9:46-48)*

<sup>1</sup> Kwertengerl 12 apetyek Jesus ikwer-warl renh ayernetyek, “Ngenharl apenteyel-rnem, kwertengerl angwenharl atyetyart ilkwan ingwer-rnem-they?”

<sup>2</sup> Jesus arlkek ampa akely anyentek. Jesus ra ampa akely renh ampepek rnrkernek.

<sup>3</sup> Ra renh-rnem ilek, “Atha arrenhantherr ileyel. Ampernem-apeny arrantherr akarrir-reyek Akngey-warl, ikwer awelhetyek, Akngey Atyetyart arrekanttherrenh anem. Arrangkwe-lan, Akngey intwemelirrem arrekanttherrety.

<sup>4</sup> Ampa nhanyem atyetyart-arrpantey ilelhey-angenharl. Artwa anyent atyetyart-arrpantey tnakelhey-angenh, Akngeyel arrernem atyetyart ilkwa kwertengerl ingkerrenhek anetyek.

<sup>5</sup> Ampa akely ikwer arrantherr inkwerel-henty, arrantherr atyeng inkwerelhem arrp-marl. Ampa akely arrantherr arntarnt-arem-apeny, arrantherr ayenhan arntarnt-aretyek ar-pemarl.”

*Ingwerentyel renh-rnem arrkerneyel, rernem  
apmweletyek  
(Mark 9:42-48; Luke 17:1-2)*

<sup>6</sup> “Ingwerentyel kwertengerl atyenh-rnem ar-rkernenty, rernem apmweletyek, Akngeyel renh

arntety ilkwa antheyenh. Ra irrwampenty awelhekerr, ingwerel nthakenh renh kwaty ampepwarl iwemer, apwert ilkwa ikwer-warl arrenenty itewarl. Artwa ingwerel atyenh-rnem apmwelenty, Akngeyel renh arntety ilkwa antheyenh. Atyenh-rnemarl apmweleyelarl-kety, artwa ikwer-warl apwert ilkwa itewarl arertnetyek renh kwaty-warl ikwerenp iwemel. Atyenh-rnem ra apmwelerl-anekerr renh iwetyek intemantey kwaty kwen-warl.

<sup>7</sup> Artwa anyentel ingwer-rnem rwewilenty, Akngeyel renh arntety antheman.

<sup>8</sup> Artwa itepel apmwel-areth mpwareyel ingketyel apek. Artwa anyentel itep-atherr-akertel apmwel-areth mpwareyel-kety, mwerran itep anyent-angkwarr renh akalthemel iwemer, ra itep-atherr-akertan rwa ilkwel apmwakert aneykety. Mwerr-ayteng ra anetyek Akngey-kenh apmer-itwek intemantey itep anyent-akert.

<sup>9</sup> Artwa anyentel annga atherr-akertel apmwel-areth mpwareyel-kety, mwerran annga renh tyerremer iwemel. Mwerr-ayteng ra anetyek Akngey-kenh apmer-itwek intemantey annga anyent-akert. Annga atherr-akertel apmwel-areth mpwareyel-kety, rwa ilkwewarl alhetyek.”

***Anayntileyel: Anwantherr arwa akelheyangenh, impen-antey. Alakenh-anyem angka anayntileyel, Inkart ra impen ingarl, anngethen iltyethen-angkwarran. Kel Jesus-el arwa renh-rnem ilek, rernem iterretyek, rernem apmwelhilekerr. Kel Jesus-el arwa renh-rnem ilek, rernem iter-***

## ***retyek, rernem apmwelhilekerr:***

*Angka yep-yep anyentarl akgerr-they aper-*  
*rertirremel alheyel*

*(Luke 15:3-7)*

<sup>10</sup> Jesus-el renh-rnem ilek, “Arrantherr Akngey-angkwarr apenteyel-rnem-kety arlkarirrey-angenharl. Itnweng ikwer-rnem-kenh Akngey-kenh apmer-itwek aneyel.

<sup>12</sup> Artwa anyentel yep-yep akgerr 100 arntarnt-arenh. Yep-yep anyent amentirrek ikwer-rnem-they. Aperrertirrek. Artwa ra yep-yep ingwer-rnem iwerl-alhem, yep-yep anyent ikwer nthwetyek. Rap nthwem yep-yep anyent renh arey-alheyek-atwety.

<sup>13</sup> Ra renh arey-alhem, rap ikwer inkwerel-hem. Rap ilem, ‘Inngantey atha arey-alhek!’

<sup>14</sup> Akngey ilkelheyel ingkerrenhek, ingwer-rnemarl amentirreyel-rnemek-then rernem ikwer-warl ingkerrenh angkepirretyek.”

*Mwerr-angkwarr arratyilerretyek*

*(Luke 17:3)*

<sup>15</sup> “Ingwerenty ngkweng apmwel-areth angkenty, mpwelanth-atherrap arratyilerretyek. Ra ngkweng awelhenty, mpwelanth mwerrant-atherr-anem anayntetyek. Ingkart-kenh-angkwarr alakenh aynteyel.

<sup>16</sup> Ra apek ngkweng awelhey-angenh, ntw a ingwer-rnem ikngwetyek, ingkerrenh-angkwarr-anem arratyilerretyek, rernem ingkerrenhel awetyek, anngetherr.

17 Ingwer-rnemek awelhey-angenh arrangkw, tyaty-areny-rnemel renh arratyiletyek angkerremel. Tyaty-areny-rnem ingkerrenh alhetyek ikwer-warl, rernem ingkerrenhel awetyek, angetherr aretyek. Ra apek tyaty-areny ingkerrenhek awelhey-angenh, menty-anem renh tyarlewetyek, ra apmwangkwarrr menty alhetyek.

18 Nga mwerr angkenty, Akngey mwerr angkem arrpemar. Nga arrkngert-angkenty, Akngey arrkngert angkem arrpemar. Ntwa apmwa ingwer-they iwem Akngey-kenh-angkwarr, kel. Akngeyel renh areyel arraty. Ntwa apek ingwer-they apmwa iwey-angenh, Akngeyel renh areyel arrangkwarr, apmwakert-anteyarl.

19 Arrantherr angkerrenty, Akngey renh ayernenty, Akngey irrwerl-areny awelhem, rap arntarnt-areman.

20 Rernem akarrirrenty, itna atyenh-angkwarr, ayeng ikwer-rnem-itwek aneyel arrpemar intem-antey.”

### *Angka warrkenh awerr-akert*

21 Peter Jesus-warl apetyek. Peter-el renh ayernek, “Arleng-alentyang anwantherr angkep atwerrey-angenh anetyek, mwerrant-arey anem, arratyilerretyek? Ra atwenty arrpemar, anwantherr renh atwey-angenh arrpemar. Angkep atwey-angenh ngay? 7-ingerant atwenty, anwantherr renh angkep atwey-angenh?”

<sup>22</sup> Jesus-el renh tyernek, “7-inger-weny. Intem-antey atwerrey-angenh arrantherr anetyek, Akngey-kenh-angkwarr!

<sup>23</sup> Akngey-kenh-angkwarr alakenh aynteyel; atyetyart ilkwel warrkenh-rnem akarrilem, angkerretyek, pwek iparetyek, man ilkwarl alheleyel.

<sup>24</sup> Artwa ingwerel-anem renh alhelenh 50 million-arl.

<sup>25</sup> Artwa ra arrangkw-antey anenh, pwek iparey-angenh-antey, ranem tharlemilek anewikw-then, alerikw-then ingkerrenh, apmer ikwerenh-then-antey, pwek renh iparetyek.

<sup>26</sup> Artwa ra ampwethel alernelhemel, kwenirrek. Ra ilelhek, ‘Ayengan man-wenyarl, ar-rangkwarl. Alerl mpwelha, ingwer-ingerant atha ngenh man ingkerrenh antheynetyek, pwek iparetyek.’

<sup>27</sup> Atyetyart ra ikwer amperrngirrek, ir-repernek, man-wenyek. Ranem renh ilek, ‘Kel, menty angkep anthey-angenh, pwek payemeley-angenh.’

<sup>28</sup> Artwa warrkenh ra alpek-anem, ra artwa ingwer-anem arey-alpek, rarl man thilp 100 alhelenh, man akely. Itethey anterrkwemel ra angkek, ‘Man ntwal ayenh angkep anthenhey-alpa!’

<sup>29</sup> Artwa ranem ampwethel alernelhemel kwenirrek, ‘Alerl mpwelha, atha ngenh angkep antheytyek.’

<sup>30</sup> Artwa warrkenh ra warrkenh ingwer tyayl-warl akwernek, man anthey-angenh-they.

<sup>31</sup> Warrkenh ingwer-rneman ikwer amperrngirrek. Rernem-anem atyetyart renh ilek, 'Artwa warrkenh ingweran tyayl-itwek aneyel.'

<sup>32-33</sup> Atyetyart rantey yangkelhek artwa arrwekelarl ikwer ilelhekek, apetyetyek. Ra angkek, 'Ngan apmwangkwarrarl alheyel! Athan ngenh menty-anem tyarlewek, pwek iparey-angenh. Nga ingwer-rnemek amperrngirrey-angenh, ayengarl ngkweng amperrngirrek-apeny.'

<sup>34</sup> Atyetyart ranem ahelirrek. Ra warrkenh renh ahayiwek tyayl-areny-warl. Tyayl-arenyel renh tyayl-warl intem akwernek pwek ikwerenh ra ipareyek-atwety."

<sup>35</sup> Jesus angkek, "Akngey-kenh-angkwarr alakenh-anyem aynteyel arrpemarl. Nga awerr ingwer-rnemek aneyel, Akngey irrwerl-areny atyenh ngkweng awerr arrpemarl mpwelheyel, nthakenh ngenh arntarnt-arey-angenh."

## 19

### *Arrkarenheng-atherr iwerretyek (Mark 10:1-12)*

<sup>1</sup> Jesus rarl ingkerrenh akalty-anthenh-penh, ra apmer Galilee-they alhek, apmer Judea-warl alhek, lher Jordan-they intwarr.

<sup>2</sup> Akngerrel renh apentek. Ra arntety-rnem mwerrilek.

<sup>3</sup> Artwa Pharisee-rnem ikwer-warl apetyek, renh arrkernetyek. Rernem renh ayernek, "Mwerrang artwel anew ikwerenh iwetyek?"

Rernem iterrenh renh arrkernetyek, ra apmwel-areth angkentyek, rernem renh angka ilkwewarl arrernetyek.

<sup>4</sup> Jesus-el renh-rnem ilek, “Arrantherr iterl-arey-areny, Akngeyelarl angka nhenh anwekantherr arrerneke. Moses-kenh angka alakenh aynteyel, atharl arrenhantherr ileyel. Akngeyel artwethen arelh-then arrerneke, ahern nhenh-warl.

<sup>5</sup> Artwa akely amek-arenty-iperr ra amikw-then aynikw-then ipmem-anem ra arnkentyelanem aneyel itengerrey-alentyan. Ratherr intem iteng anetyek.

<sup>6</sup> Akngeyel renh-atherr itengilemel antheke artwa renh. Nthakenh ratherr iwerreyang, intem-antey ratherr anetyek. Nthakenh ingwerel renh-atherr akngakey-angenh.”

<sup>7</sup> Rernem renh ilek, “Alakenh Moses-kenh angka aynteyel: ‘Artwa pip-warl itna inkwernel-hemel, arelh ikwerenh pip renh anthemel, arelh ikwerety ipmelhetyek.’ ”

<sup>8</sup> Jesus angkek, “Akngey-kenh angka ayntenh arrwekel, nthakenh iparey-angenh. Moses-el angka arrerneke ingkern-they, rernemarl amentewarl alhenh-kety. Alakenh-they Moses-el angka arrerneke, ingkern-penhel-rnem apenterl-ayntetyek.

<sup>9</sup> Arelh ngkwenh ntwaw iwenty, ntwaw arelh ingwer ikngwenty, ntwaw Ingkart-angkwarr apmwel-hilem. Arelhel arrkarikw ikwerenh iwenty, artwa ingwer-anemarl ikngwetyek, mwerr arelh renh iwem.”



<sup>10</sup> Kwertengerl ikwerenhel-rnem Jesus renh ilek, “Alakenh aynteyel mwerr, anew-weny ament anetyek.”

<sup>11</sup> Jesus-el renh-rnem ilek, “Ingwer-rnem alak-enh anetyek, Akngeyel ikwer-rnem arrernek-angkwarr-antey.

<sup>12</sup> Ingwer-rnem arrangkwarl. Rernem anew inetyek ywarn. Ingwer-rnem itengirrey-angenh, Akngeyek warrkirr-ayntetyek.”

*Jesus-el ampa akely-rnem atnyeneyel  
(Mark 10:13-16; Luke 18:15-17)*

<sup>13</sup> Akgerr Jesus-warl alhek, ampa ikwerenh-rnem-kenh-akert, ra akapwert renh-rnem arneyek. Jesus-kenh kwertengerl-rnemel ampa renh-rnem irrentek.

<sup>14</sup> Jesus-el arek kwertengerl ikwerenh-rnem ampernemarl irrentek. Ra ahelirrek, angkemel, “Ampernem menty apetyey atyeng-warl! Alakenh ikwer-rnem arrkngert angkey-angenh! Ayeng arlkwenteyel ampernem ingkerrenh atyeng-warl apetyem. Akngey arlkwenteyel ra Ingkart ikwer-rnemek anetyek. Ampernem-apeny arrantherr akarrirrenty Akngey-warl, ikwer awelhetyek, Akngey Atyetyart arrekantherrenh aneyel.”

<sup>15</sup> Jesus-el ampernem akapwert ilyel renh-rnem arnek. Jesus rap ayernek Akngey, ra ampa ingkerrenh atnyeneyek. Kel ra alhek-anem.

*Artwa anyent man akgerr-akert  
(Mark 10:17-31; Luke 18:18-30)*

<sup>16</sup> Artwa anyent man akgerr-akert Jesus ikwer-warl anterrey-alhekarl. Ra arrernelhek

kwenirremel, Jesus-itwel angkemel, “Akalty-anthenh-anthenhay. Nthakenh ayeng iteth intem anetyek?”

<sup>17-19</sup> Jesus-el renh ilek, “Nthakenharl ntw aayenh ayerneyel, mwerr-angkwarr apenterl-ayntetyek? Akngeyant anyent mwerr! Ntw a Moses-kenh angka renh iterl-areyelarl. Ntw a ingwerenty ipmek atwetyekarl arrangkwarl. Ingwer-kenh anewikw nthakenh ikngwey-angenh. Ampwal-rnem nthakenh irrtyertel iney-angenh. Ingwer-rnemek irrtywerremel iley-angenh, inngant ntw a ilettyek. Akngeyek-then ameyek-then awelhetyek. Ingwer-rnem mwerranty arntarnt-arerl-ayntetyek, ngkwenh-rnem arntarnt-areyel-apeny. Alakenh apenty, nga iteth intem-antey aneyenh.”

<sup>20</sup> Artwa ra Jesus renh ilek, “Ayengan law ilenh-angkwarr apentenh avey akelyankel. Angka ingwer apek aynteyel, apentyek?”

<sup>21</sup> Jesus-el renh ilek, “Ampwal akngerr renh-rnem tharlemila man inemel, artwa ilenh-rnem, irrepern-rnem, man-weny-rnem ntw a man anthem. Ikwer-penhan Akngeyel-anem ngenh arntarnt-arem, ngenh atnyenem. Atyeng-angkwarrant-anem apetya!”

<sup>22</sup> Artwa man-akert ra iterrek man-then ampwal-rnem-then ingkerrenh ra menty impen ayerrpiletyek. Artwa ra amperrngirrek, “Nthakenh-angkwarr ayeng iteth intem-antey aneyenh, man akngerr-akert, ampwal akngerr-akert?”

<sup>23</sup> Jesus-el kwertengerl ikwerenh-rnem ilek, “Man-areny ilenh-rneman rernem Akngey-

angkwarr anetyek arrangkwarl. Rernem manantarl apenteyel.

<sup>24</sup> Kamwerlan neyl altywer akely-angkwarran nthakenh aylpenhey-angenh, arrangkwarl. Kamwerlan altywer akely-angkwarr aylpey-angenh-apeny, man akgerr-akert-rneman Akngey-kenh-angkwarr aylpey-angenh. Akngeyel nthakenh anyentiley-angenh ikwerenh-rnem-warl.”

<sup>25</sup> Kwertengerl ikwerenh-rnem ywarn iterrek. Rernem renh ayernek, “Ilek-apeny-rnemant Akngey-kenh-angkwarr aylpem, Akngeyel ikwerenh-rnem-warl anyentiletyek?”

***Anayntileyel: Kwertengerl rernem iterrenh Akngeyelang man-areny-rnemekant inkwerelhentyek-athen, man akgerran man-areny renh-rnem anthentyek-athen.***

<sup>26</sup> Jesus angkek, “Akngey rantarl iterl-areyel ikwerenh-rnem-warl anyentiletyek, ahern-arenyel-rnem iterl-areyang arrangkw.”

<sup>27</sup> Peter-el renh ilek, “Anwernantherr-alew? Kwertengerl anwernantherran ampwal-rnem menty-anem ipmek, ngenhant-anem apenteyel. Akngeyel anwernenhantherr pweytilem, ikwerenh-rnem-warl? Anwantherr inem arrpemarl?”

<sup>28</sup> Jesus-el renh-rnem ilek, “Akngey-kenh Artwa Impen ayeng aney-alpeyenh chair mwerr-angker-itwel rlterrk ilkwakert. Kwertengerl arrantherr arrpemarl chair mwerr-angker 12-itwek aney-alpeyenh arrpemarl. Arrantherr

Israel kenh-rnem 12 amentew-ament ayerneyenh.”

***Anayntileyel: Israel-kenh alerikw-rnem 12 anenh. Akgerr arlpimirrek ikwer-rnem-they, rernem akgerram-akgerrirrek. Ingkern-penh-rnem akgerr innga anew-anenh.***

<sup>29</sup> “Artwa anyentarl alhenty, angka atyenh-akert ikwerenh-rnem iwerl-alhemel, angka Akngey-kenh ingwer-rnem ilerl-apayntetyek, Akngeyel renh aleth-antey arntarnt-arem. Artwa ra alhentyelan, ahern ikwerenharlap ra iwerl-alheman, ikwerenh-rnem-then, warl ikwerenh-then, ra iteth intem-antey aneyenh. Akngeyel renh antheyenh akgerr innga renh arntarnt-areyenh intem-antey.

<sup>30</sup> Akgerr ilkelheyel Akngey-angkwarr apentetyek. Akgerr arrkernelheyel Atyetyart ilkwa anetyek, warrkenh iylpareth-rnem-they. Rernem arrangkwarl. Warrkenh iylpareth-rnem rerne-mant Atyetyart ilkwa aneyenh.”

## 20

***Rernem warrkirreyel amern-angketyarr-itwek***

<sup>1</sup> Jesus-el angka anayntilek ikwer-rnem. “Akngey-kenh-angkwarr alakenh aynteyel. Ingwepenh atyetyart alhek tawen-warl, warrkenh-rnem ikngwerl-alpetyek, amern-angketyarr-itwek warrkirretyek.

<sup>2</sup> Ra angkek, ‘Arrantherr atyeng warrkir-renty, atha arrenhantherr man ilkwa antheyek.’ Rernem mwerr angkenh ikwer. Ranem renh-rnem arrwekel thwenek amern-angketyarr-warl.

<sup>3</sup> 9 o'clock ingwepenh-antey, ranem artwa ingwer-rnem arey-alhek, tawen-itwek apatemel rnterl-anenty.

<sup>4</sup> Ranem angkek ikwer-rnem, 'Arrantherr atyeng warrkirrenty, atha arrenhantherr payemelem.' Rernem ikwer-angkwarr iylypareth antelhek.

<sup>5</sup> Ra tawen ikwer-warl alhek arrpemar, rap arey-alhek artwa ingwer-rnem-anemar, rernem apatemel rnterl-anenty. Renh-rnem ra ayerney-alhek warrkek arrpemar, ra renh-rnem man anthetyek.

<sup>6</sup> Atwerrp-anem 5 o'clock ra alhek arrpemar tawen ikwer-warl. Ra ingwer-rnem-anemar arey-alhek rnterl-anenty. Ra renh-rnem ayernek, 'Ilekek arrantherr rntenherreyel apatemel?'

<sup>7</sup> Rernem ikwer ilelhek, 'Ingwerentyel anwenhantherr warrk anthey-angenh.' Ranem renh-rnem ilek, 'Arrantherr amern-angketyarr-itwek atyeng warrkirretyek.'

<sup>8</sup> Atwerrp-anem atyetyart yangkelhek, warrkenh anyentek, ra apetyetyek, ra ingwer-rnem ngkwelty antheynetyek warrk-penh. Ranem artwernem ilek, 'Ingkernarl apetyek-rnem-tangkwel man antha!'

<sup>9</sup> Ra artwa ingkern-theyarl apetyek-rnem man ilkwa antheek.

<sup>10</sup> Arrwekelarl warrkirrek-rnem, rernem-anem apetyek, man inetyek. Rernem iterrek, 'Man ilkwa innga anwantherr ineyenh', arrwekelarl warrkirrey-alhekel-rnem.

<sup>11</sup> Rernem atyetyart ilkwa iltek, 'Ntwa man ilkwan antheek ingkern-they apetyek-rnemantar!'

<sup>12</sup> Artwa ingwer-rneman hour anyent warrkirrenh, ingkern-they apetyek-rneman, anwantherr itwern ilkwel aleth arlkarewelhenh. Ingkernarl apetyekel-rneman nthakenharl man ilkwa inek?’

<sup>13</sup> Atyetyart ranem artwa anyent tyernek, ‘Atha ngenh man ilkwa antheynek, weth atharl ngenh arrwekel ilek-angkwarr-antey.

<sup>14-15</sup> Man ngkwenh inerl-alha, akngeynemel apmer-warl. Atha renh-rnem man ilkwa antheyel mwerr-angkwarr. Ilek-they ntwalharlkwek artwa ingwer-rnem, atharl man akngerr antheek? Man ilkwarl atha alhewer payemelem!’ ”

<sup>16</sup> Jesus angkek, “Akngey-kenh alakenh aynteyel, Akngeyel ingkerrenh arntarnt-arem arrpemar, ingkernarl apetyek-rnem arntarnt-arem arrpemar.”

*Jesus kwertengerl ikwerenh-rnemek ilelheyel  
(Mark 10:32-34; Luke 18:31-34)*

<sup>17</sup> Jesus alhek Jerusalem-warl. Kwertengerl ikwerenh-rnemel renh apentek. Akngerrelan renh-rnem apentek ingkern-theyarl. Ra ilelhek kwertengerl ikwerenh-rnemek,

<sup>18</sup> “Awelhenherr-arey atyeng! Rlengk apmer Jerusalem-warl anwantherr alhem. Ayeng Akngey-kenh Artwa Impen. Anwantherrarl Jerusalem-el aney-alhem. Ahelengkw-rnemel ayenh anterrkweyenh ikwer-itwel. Ayenh rernem akngeyenh, atyetyart tyaty-areny ilkwernem-warl, atyetyart ilkwa Moses-kenh angka akalty-antheyel-rnem-warl. Rernem ayenh ahayiweyenh, ingwer-rnemel ayenh ipmek atwetyek.

19 Rernem ayenh ahayiweyenh, Jew-weny ahelengkw-rnem-warl, rernem ayenh ipmek atwetyek. Rernem ayenh irrwaremel, whip-el-tangkwel atweyenh, ayenh rernem ipmek atwey-alenty. Ayeng ipmepenh akemirreyenh ingwa atherr-penh.”

*James-then John-then ratherr Jesus renh ayerneyel*

*(Mark 10:35-45)*

20 Zebedee-kenh alerikw-atherr amikw ikwer-atherrenh apetyek Jesus-warl, kwenirremel.

21 Jesus-el renh ayernek, “Ilekay?”

Arelh ra renh ilek, “Nga Atyetyart ilkwa aneyenh, Ntwa arraty ilay, ampa atyenh-atherr Atyetyart ilkwa arrpemarl ngkweng-itwel aneyenh?”

22 Jesus-el awayenheng ilek, “Mpwel atyeng mwerranty awelhenherr-atherr. Ahelengkw-rnemel ayenh artewentyel irrwampetyek atweyenh. Mpwel-alew? Mpwel arlka menty anthelhem arrpemarl, ayeng anthelhem-apeny?”

Ratherr ilelhek Jesus ikwer-warl, “Ya, menty ahelengkw-rnemel aylernenh irrwampetyek atwey!”

23 Jesus-el renh-atherr ilek, “Rernem innga mpwelenh irrwampetyek atweyenh, ayenh irrwampetyek atweyenh-apeny. Inpa, athan iterl-arey-angenharl, Akngeyelantarl iterl-areyel angwenharl Atyetyart ilkwa atyeng-apeny aneyenh, Akngey atyenhelant atyetyart ilkwa arrerneyenh.”

24 Kwertengerl 10 ingwer-rnem kwertengerl ikwer-atherrety arlkarirrek ratherrarl Atyetyart ilkwa anetyek arlkwentek, Jesus-apeny.

25-26 Kwertengerl ikwerenh-rnem Jesus ra ilek, "Atyetyart Jew-weny ilkwernem awerr aneyel-rnem-angkwarr, arrantherr apentey-angenh. Arrantherr mwerrant-arey anenherr-arey. Ingwer atyenh-rnem Atyetyart ilkwa anem, mwerr-angkwarr ingkerrenh arntarnt-aretyek.

27 Arrantherr arntarnt-arerretyek, warrkenh iylpareth awelheyel-apeny. Alakenh atha arrenhantherr atyetyart ilkwa arrernem.

28 Akngey-kenh Artwa Impen anyent ayeng kel apetyek ahern nhenh-warl, ingkerrenh mwerr-angkwarr arntarnt-aretyek iylparethel. Ayeng arlkan anthelhem ingkerrenhek."

*Jesus-el artwa aparrng atherr mwerrileyel  
(Mark 10:46-52; Luke 18:35-43)*

29 Jesus kwertengerl ikwerenh-rnem-akert apmer Jericho-they alhek, akngerrel renh-rnem apentek.

30 Artwa aparrng atherr iwerr impalthel anenh. Ratherr awek ingwerentyelarl renhatherr ilek, "Jesus apetyem nhangkwarr." Ratherr arlkek Jesus ikwer, "Jesus, David-kenh, aylekanth amperrngirra!"

31 Akngerrel renhatherr ilek, "Akater anenherr-atherr! Jesus renh arlkareweyang!" Ratherr artewentyel arlkek Jesus ikwer arrpemar, "Artwa David-kenh! Aylernekanth amperrngirra!"



<sup>32</sup> Jesus-el renh-atherr ayernek, “Nthakenh atha ilem?”

<sup>33</sup> Artwa aparrng ratherr Jesus-warl angkek, “Inkartay, annga mwerrila, aylernanth mwerr-anem aretyek!”

<sup>34</sup> Jesus ikwer-atherr amperrngirrek, annga renh-atherr annga rlkerliletyek, ratherr arleng aretyek. Artwa aparrng ratherr kel mwerr arleng aremel-anem, Jesus-anem apentek.

## 21

### *Jesus alheyel tawen Jerusalem-warl*

*(Mark 11:1-11; Luke 19:28-38; John 12:12-19)*

<sup>1</sup> Jesus kwertengerl ikwerenh-rnem-akert apmer ingwer-warl alhew Jerusalem-they arrer-antey, apmer Bethphage-warl, apwert Alip-angketyarr-arrangarr. Jesus-el kwertengerl atherr thwenek, ratherr arrwekel alhetyek,

<sup>2</sup> “Mpwelanthan alhenherr-atherr tawen-warl. Mpwelanthap tangkey atherr arey-alhenherr-atherr, tangkey amenheng-atherr. Rweplhelenherr-atherr, atyeng-warl inenhey-alhemel.

<sup>3</sup> Ingwerentyel mpwelhenh ayernenty, mpwelanth ilenherr-atherr, ‘Inkart ikwer aylernanth akngeyneyel wenh tangkey nhan.’ Ra anthem-anem.”

<sup>4</sup> Alakenh-anyem Akngey-kenh angka arraty ayntenh, angkakert arrwekelenyel ilenh-angkwarr-antey.

<sup>5</sup> “Jerusalem-areny-rnem, atyetyart ilkwa rarlapetyeyenh, tangkey-akert. Ra tnakelhey-angenh, tangkey ateralth-akert.”

<sup>6</sup> Ratherr anperl-alhek, Jesus-elarl ilanthe-  
angkwarr-antey.

<sup>7</sup> Ratherr tangkey renh-atherr ayteng-  
akngeynek Jesus-warl. Ratherr arnkwa tangkey  
artep-atherr-warl arrernek. Jesus-anem tangkey  
ateralth-warl nganek. Alakenh-anyem Akngey-  
kenh angka arraty innganem irrek, angkakert  
arrwekelenyel ilenh-angkwarr-antey.

<sup>8</sup> Akgerr ingkerrenhel arnkwa ahern-  
warl panty iweynek, tangkey alhetyek ikwer-  
angkwarr Jesus-akert. Ingwerel-rnem alperrarl  
akek. Rernem ayatheweyneyek tangkey Jesus-  
akert ra alhetyek panty-angkwarr. Tangkey  
alhek panty-angkwarr Jesus-akert.

<sup>9</sup> Artwa akngerrel Jesus renh apentek.  
Ingkerrenh ikwer inkwerelhek arrwekel-warl  
alhenh-rnem-then, ingkern-theyarl alhenh-  
rnem-then. Rernem Jesus-ek inkwerelhemel  
arlkek, “Anwantherr Atyetyart ilkwek  
inkwerelhey, David-kenh innga! Akngeyelarl  
renh thwenek anwekantherr-warl. Akngeyel  
renh arntarnt-areyel, ra Atyetyart ilkwa  
ingkerrenhek aneyel!”

<sup>10</sup> Jesus alhek apmer Jerusalem-warl. Ingker-  
renh ikwer inkwerelhek, ayernerremel, “Artwa  
angwenharlap ran nhenhey?”

<sup>11</sup> Rernem angkerrenh, “Nhenhan Jesus-arl,  
angkakert Nazareth-areny ahern Galilee-areny.”

*Jesus Jew-rnem-kenh tyaty ilkwewarl alheyel  
(Mark 11:15-19; Luke 19:45-48; John 2:13-22)*

<sup>12</sup> Jew-rnem-kenh tyaty ilkwitwek weker-  
rnemel aker tharlemilenh, store-arrpantey.

Ingwerel-rnem akere thiparl tharlemilenh. Jesus ra arek ingwerel-rnemaerl akere tyenkerr tharlemilenh, ra ingkerrenh-antey renh-rnem irrentek, taypel-rnem iwemel, ampwal ngkweltyek-arelh-rnem-then. Jesus-el renh-rnem weker-rnem irrentek.

<sup>13</sup> Ra renh-rnem ingkerrenh ilek, “Akngeykenh angka alakenh aynteyel: ‘Ingkerrenh akarrirrerl-ayntetyek warl nhenh-warl, Akngeyek inkwerelhemel.’ Irrtyert-awarr-nemantarl apmer nhenh-warlan arrantherr arrernek!”

<sup>14</sup> Artwa aparrng-rnem-then artwa lerrp-rnem-then ikwer-warl apetyek Jew-kenh tyaty ilkwitwek. Ra renh-rnem mwerrilek.

<sup>15</sup> Jew-rnem tyaty ilkwitwek ampernem arikalhelirrenh, “Nhanyem David-kenh.” Artwa priest-rnem-then Moses-kenh akalty-anthey-angker-rnem-then rernem arek-penh rernem ahelirrek-anem. Rernem Jesus renh ilek,

<sup>16</sup> “Ntwa apek yanh-rnem alhengk-aweyel, rernemaerl arikalhelirreyel?” Jesus-el renh-rnem ilek, “Angka Akngeykenh arrwekeleny aynteyel: ‘Ampernemel ayenh tnakeyel arraty-angkwarr.’ ”

<sup>17</sup> Ra renh-rnem iwerl-alhek-anem apmer Bethany-itwel aney-alpek.

*Jesus-el arwerl renh ileyel*  
(Mark 11:12-14, 20-24)

<sup>18</sup> Ingwepenh Jesus Bethany-they anperl-alhek apmer Jerusalem-warl, kwertengerl ikwerrenh-rnem-akert. Ra angayakw-anem irrek ampepel.

19 Arleng-they, ra arwerl tywerrk arek. Ra alhek arrer-warl amernek aretyek. Amern aney-angenh arrangkw-antey ra arek, alper-rant. Jesus-el arwerl renh ilek, "Arwerl nhep-ench nthakenh ingwerentyel amern arlkwey-angenharl intem-antey!" Arwerl arleny-anem irrek.

20 Kwertengerl ikwerenhel-rnem renh awek, rarl alakenh angkenh, rernem apatek.

21 Jesus-el kwertengerl ikwerenh-rnem ilek, "Anwantherr Akngey tnakem, ikwer irrpelthirrey-angenh, arrantherr alakenh mpwarem. Arrantherr areyel apwert aleyarl altyweneyel? Arrantherr apwert ilenh ilenty, ra alpetyek kwaty ampep-warl, ra inngarl awelhemel kwaty ampep-warl arrernelhem. Apwert ilenhan arrekanterr awelhemel kwaty ampep-warl arrernelhem-apeny, Akngeyan arrekanterr awelhem, alakenh-anyem.

22 Akngeyan arrekanterr awelhem, alakenh-anyem, arrantherr renh tnakenty, renh ayer-nenty."

*Atyetyart ilkwernemel Jesus renh ayerneyel  
(Mark 11:27-33; Luke 20:1-8)*

23 Jew-rnem-kenh tyaty ilkwewarl aylpek. Ra renh-rnem akalty-anthenh. Atyetyart Jew-kenh tyaty-areny-rnem-then artwa ilkwernem-then ikwer-warl apetyek. Rernem renh ayernek, "Angwenhel ngenh atyetyart arrernek, ingker-renh akalty-anthetyek."

24 Jesus-el renh-rnem ilek, "Atha arrenhan-therr anyent-inger arwa ayernem, arrantherr

apek atyeng iletiek. Arrantherr atyeng ility, athap arrenhantherr ilem arrpemar, angwenhelarl ayenhan thwenek.

<sup>25</sup> Angwenhel John renh arrernek, ingkerrenh baptise-emeletiek, irrwerl-arenyel apek, ahern-arenyel apek?”

Rernem angkerrenh, “Nthakenh anwantherr Jesus renh iley-angenh, Akngeyel John renharl thwenek ahern nhenh-warl, anwenhantherr Jesus-elarl arraty ilekerr, anwantherr John ikwer awelhey-angenharl, akengentyarl John ikwer irrpelthirrenh.

<sup>26</sup> Nthakenharl anwantherr iley-angenh, atyet-yart ahern-arenyelarl John anwekantherr-warl thwenek, ingwer-rnemarl anwekantherr ahelirrekerr, rerneman John iterl-areyel, rarl Akngeykenh angkakert inngan aneyel. Rerneman John tnakeyelarl, rarl Akngey-kenh angkakert inngarpantey.”

<sup>27</sup> Rernem Jesus ikwer-warl angkek, “Inpa, iterl-arey-angenh, angwenhelarl John renh thwenek ahern nhewarl.”

Jesus angkek ikwer-rnemek, “Arrantherr ayenh arraty tyerneyang-kety, nthakenh atha arrekanterr arraty iley-angenh arrpemar, angwenhelarl ayenh thwenek ahern nhewarl.”

### *Aler atherr-akert*

<sup>28</sup> “Atha angka arrekanterr iletiek. Artwamp-kenh alerikw-atherr anenh. Artwamp ra alerikw alkenh ilanthe, amern grapes-angketyarrel warrkirretyek.

<sup>29</sup> Alerikwan menty-tangkwel angkek, ‘Ar-rangkw.’ Iterrerl-alpek.

Ikwer-penh ra nyerrirrerl-alpek, rap angkep-anem alpek. Ra aynikwek awelhek, atherrk lyapelherl-ayntetyek.

<sup>30</sup> Artwamp ra alerikw ingweran ilantheke-anem. Alerikwan angkek, 'Ya, kel ayeng alhem!' Ranap arrangkw alhey-angenharl."

<sup>31</sup> Jesus-el renh-rnem ayernek, "Alerikw nthenh-apenyarl aynewikw awelhekan?" Rernem renh ilek, "Alerikw wetharl renhtangkwel ayernek, rant ikwer awelhekan." Jesus-el-anem ikwer-rnem ilek, "Apmwernem ingkerrenh rernem Akngey-warl angkepirrenhey-alpeyenh nyerrirremel, man akarriley-angker-rnem-then arelh apmwangkwarrarl alheyel-rnem-then. Rernem Akngey-kenh-angkwarr aylpeyel, arrantherran arrangkwarrl.

<sup>32</sup> John Baptise-emeley-angker ra iwerr arraty arrekanterr iylparrernekarl, arraty-angkwarr apentetyek. Arrantherranap ikwer irrpelthirrenhan. Apmwangkwarr alhenh-rnem, man akarriley-angker-rnem-then arelh apmwernem-then ikwer awelhenharl, Akngey-warl angkepirremel. Arrantherran angetherr arek arrpemar, angkepirrey-angenharl, John ikwer awelhey-angenh."

*Angka amern grapes-akert*

*(Mark 12:1-12; Luke 20:9-19)*

<sup>33</sup> "Arrantherr atyeng awelhenherr-arey. Apmerek-artweyel amern grapes lyapelhilek, parrik apwert-penh artek, amern grapes lyapetyek parrikel kwen. Warl arlpenty ra artek,

artwa anyent irrwerl anayntetyek, arntarnt-arelherl-anemel, ingwerenty irrtiyert apetyekerr amern aketyek. Irrkanem kwen angernemel, amern grapes lthwayntetyek, akarr areyirretyek. Atyetyartel warrkenh-rnem arrernek amern grapes arntarnt-arayntetyek, ra apmer ingwer-warl alhey-kety. Kel ra apmer ingwer-warl alhek.

<sup>34</sup> Amern ampengirrentyel, ra warrkenh-rnem thwenek, amern grapes ampeng awaketyek ikwer.

<sup>35</sup> Ingwer-rnemel warrkenh anyent atwek, ingweran ipmek-antey atwek, ingwer apwertel wek.

<sup>36</sup> Ra warrkenh ingwer-rnem thwenek, akngerr. Rernem renh-rnem atwek arrpemarl.

<sup>37</sup> Ran angkek, 'Alerey anyent atyenh atha renh thwenetyek, rernem apek ikwer awelhetyek.' Atyetyartel alerikw ikwerenh anyentant-anem thwenek.

<sup>38</sup> Atyetyart-kenh alerikw rernem arnarek, rernem angkerrenh, 'Ingwer-ingeran ranem grapes-angketyarrek atyetyart aneyenh. Anwantherr renh atwey, anwekantherr grapes-angketyarr ayntey-alkenh.'

<sup>39</sup> Rernem renh anterrkwek, aketh-warl-anem iwemel ipmek atwek-anem renh."

<sup>40</sup> Jesus-el renh-rnem ayernek, "Nthakenharl arrantherr iterreyel, atyetyart ra apeyalpeyenhel, nthakenharl warrkenh-rnem irreyenh?

<sup>41</sup> Atyetyart priest-rnem-then artwa ilkwernem-then rernem renh tyernek, 'Ra renh-rnem ipmek atweyenh. Ranem warrkenh

mwerr-rnem arrerneyenh, rernem grapes-angketyarr mwerr arntarnt-arayntetyek, amern grapes ikwerenh arraty ikwer awaketyek.' ”

**Anayntileyel: Akngey-kenh angkakert-rnem warrkenh-rnem-apeny. Atyetyart-kenh alerikw Jesus-apeny. Akngeyel angkakert-rnem thwenek atyetyartel warrkenh-rnem thwenek-apeny. Ranem Jesus alerikw ikwerenh thwenek arrpemarl ahern nhenh-warl, atyetyartel alerikw ikwerenh thwenek-apeny. Pharisee-rnem apmer arntarnt-arey-angker-rnem-apeny.**

<sup>42</sup> Jesus-el renh-rnem ilek, “Arrantherr Akngey-kenh angka arrwekeleny iterl-arey-areny. Angka alakenh aynteyel: ‘Arwerl arlpenty ingwerel iwem apmwek-athen. Arwerl ran impen-antey, lywenty artetyek. Ingkartel renh arrernek anwekantherr.’

<sup>43</sup> Arrantherr ikwer impen anyentek awelhey-angenh, arrantherr amentewarl irrekerr ikwerenh-angkwarr-kety. Ingwer-rnemel renh tnakenty, ra renh-rnem arntarnt-aremarl.”

**Anayntileyel: Jesus angka nhenh-anem ikwer-rnem ilek, rernem arraty iterl-arayntetyek. Alakenh-anyem ilelhek ikwer-rnem, “Jew-rnemel ayenh iwerl-alhek, arwerl apmwapeny-arrpantey. Rernem ayenh ipmek atweyenh.” Jesus ran arwerl impen mwerr-angker weth-apeny, ingkerrenh ikwer inkwerelh-ayntetyek.**

<sup>45</sup> Atyetyart tyaty-areny-rnem-then Pharisee-rnem-then rernem awek-penh, rernem iterl-anem-arek, “Anwekantherrip nhenhey angkeyel



wenh!"

<sup>46</sup> Rernem iterrenh renh atwetyek-arrpantey. Rernem aterirrenh, ingwer-rnem-kety, rerne-marl renh iterl-arenh angkakert Akngey-kenh.

## 22

### *Angka tyenkerr-akert (Luke 14:15-24)*

<sup>1</sup> Jesus-el angkanem ikwer-rnem ilek, renh-rnem akalty-anthek arrpemarl,

<sup>2</sup> "Akngey-kenh-angkwarr alakenh aynteyel. Atyetyart anyent anenh. Akngerr akarrirrek, amern kwenty arlkwetyek, alerikw ikwerrenh itengirrenty aytaretyek.

<sup>3</sup> Warrkenh-rnem thwenek, ingwer-rnem ikngwerl-alpetyek. Rerneman arlkarirrek ikwerety.

<sup>4</sup> Ra warrkenh ingwer-rnem thwenek, 'Ingkerrenh ikngwerl-alpenherr-arey, amern kwenty arlkwetyek, aker pwelek anter-akngerr ilek-ilek, arlkwetyekant-anem.'

<sup>5</sup> Rernem ikwer awelhey-angenh. Ingwer-rnem amern weyt atherrk inetyek, ingwerenty amentewarl alherlewenh, ingwerenty amentewarl anew-anenh. Ingwer-rnem store-itwek warrkirrenh ampwal ilek-ilek mpwarenh.

<sup>6</sup> Ingwer-rnemel warrkenh ingwer-rnem anterrkwemel atwek ipmek-antey.

<sup>7</sup> Atyetyartel inngantey ingwer-rnem irlkenty-ilek, rernem apmwernem atwetyek, warl-rnem arrtyeynetyek.

8-9 Ra warrkenh ingwer-rnem thwenek, ingkerrenh ikngwerl-alpetyek, 'Ingwer-rneman arwekelarl ayernekrneman arlkarirreyel amern kwenty ikwer-warl apetyey-angenh. Apmerrpanenh-warl ingkerrenh ikngwerl-alpenherrarey, ingkerrenh apetyeyek, kwenty arlkwetyek.'

10 Rernem amperirrenhey-alpek akwerrwarl ikngwerl-alpek, artwa ingwerek-ingwer ikngwenhey-alpek warl ikwerenh-warl, amern arlkwetyek, artwa mwerr-rnem-then apmwernem-then ingkerr apey-alhek amern kwenty arlkwetyek. Akgerr innga akarrirrek, warl kwen arrkngelek-anem.

11 Akgerr akarrirrek, arnkwa mwerrangkerel aylpemel. Atyetyart rap arey-alhek artwa ingweran arnkwa aterrng-akertarl, arnkwa mwerrek aylpey-angenh.

12 Atyetyart ranem ayernekr, 'Ilek-kety nga arnkwa mwerrelan aylpey-angenh?'

13 Atyetyartel-anem artwernem ilantheke, artwa iltyatherr arertnetyek, ingkety-atherr-then aketh-warl-anem iwetyek, atwemengkwarl, artewentyel arrangkeyel-rnem-warl.

14 Akngey akngerrek yangkelhek, irrpety ingwer-rnemant-anem ra arrwekel-antey rlwaneynek, ikwerenh-rnem anayntetyek."

***Anayntileyel: Inkart Akngey ingkerrenhek arrkernelheyel, ikwer-angkwarr ingkerrenh anetyek. Ingkerrenhek, apmer arrpanenhel ingkerrenh aneyel-rnemek. Ra ingkerrenhek ilkelheyel, ikwer-angkwarr ingkerrenh anetyek. Ingwer-rnem arlkarirrenh kwenty ikwerenh arlkwekerr, aley-***

***anyem ingwer-rnem Akngey-kenh angka awekerr arlkarirreyel-apeny. Alakenh angka nhanyem anayntileyel.***

*Man kapmentek anthetyek  
(Mark 12:13-17; Luke 20:20-26)*

<sup>15</sup> Pharisee-rnem anyentirrek angkerretyek, rernem Jesus renh irrtywerl-ampernetyek, ra apmwel-areth angkenty renh awetyek.

<sup>16</sup> Herod-el-rnem-then, Pharisee-rnem-then rernem artwernem thwenek, Jesus renh ayernetyek, “Inkartay, anwantherr ngenh iterl-areyel. Ngan artwa arraty aneyel, ntwA Akngey-kenh angka arraty akalty-antheyel. Nga ahern-arenyek awelhey-angenh.

<sup>17</sup> Nthakenh nga iterreyel, anwernantherr kapment ilkwernem man antheynetyek, menty?”

<sup>18</sup> Jesus ra iterl-arek, rernemarl irrtywerremel angkek ikwer-warl. Ra renh-rnem ilek, “Arrantherr ayenh arrkerneyel, ayeng arrekanterr akengenty angketyek.”

***Anayntileyel: Rernem arrkernelhenh ikwer, ra akengenty angkentyek. Ra akengenty angkenty, rernem renh ingwer-ingerant anterrkwetyek, renh ipmek atwetyek.***

<sup>19</sup> “Ngkwelty atyeng akngetyay, atha tax maney aretyek.” Rernem ngkwelty anyent renh anthek.

<sup>20</sup> Jesus angkek, “Angwenharl inngerr-akertan nhenhan, itna angwenh-kenh-akert nhan?”

<sup>21</sup> Rernem ikwer ilek, “Caesar, atyetyart kapment ilkwarlap ran nhenhey!”

Jesus-el renh-rnem ilek, “Man-areny-rnemelarl arrenhantherr manek ankem, arrantherr man renh-rnem anthenherr-arey, rernem-anem kapment man renh anthetyek. Akngey-kenh warrk-rnemel man ineynem, arrantherr ingkerrenhel arrernetyek arrpemar, Akngey ikwer-anem rernem man renh arrernetyek.”

<sup>22</sup> Jesus renh awemel, rernem apateyelpok, Jesus-el angka arraty ikwer-rnem ilekarl. Kel rernem alpek-anem.

*Rernem ipmepenh itethirreyenh  
(Mark 12:18-27; Luke 20:27-40)*

<sup>23</sup> Artwa Sadducee-rnem Jesus ikwer-warl apetyek, renh ayernetyek. Sadducee-rnem akalty-anthenh, arrewaly intem-antey ayntem, nthakenh ipmepenh akwentey-angenh. Rernem Jesus renh ayerne.

<sup>24</sup> “Ingkartay, Moses-el angka anwekantherr arrerne, arelh inpertirrenty, ayteyikw rane-marl arelh ikwer-warl itengirretyek ikwer-atherrenh-anemarl, ampa ingwer-anem anetyek.

<sup>25-26</sup> Anew ikwerenhek arelh anyent ran inpertirrek ampeweny-anteyarl, ra ayteyikw ikwerenh-itwel itengirrek arrpemar. Arelh ra inpertirrek ayteyikw ingwerek-anemarl, ampeweny-antey arrpemar. Ayteyikw-rnem 6 ilenh-rnem arelh anyent ikwer-itwel-antey, rernem ingkerrenh anyentarl-anyentarl itengirrek, arrewaly ingwer iylpelerlewenty, awayikw ingwer-itwel itengirremel, ra ampeweny arrangkw arrpemar. Artwa anyent

aytey aynek itengirrek, arelh ikwer-itwel-antey. Artwa ranem ilwek, ampeweny-antey, arelh anyent ikwerenh ampa ikwer-atherrenh aney-angenh-antey.

<sup>27</sup> Arelh ranem ilwek.

<sup>28</sup> Artwa rernem ipmepenh akemirrenty, artwa angwenharlap arelh ikwerenh inngan?”

<sup>29</sup> Jesus-el renh-rnem ilek, “Arrantherr apmwel-areth akalty-antheyel Akngey-kenh angka arrantherr iterl-arey-angenh. Arrantherr Akngey iterl-arey-angenh-antey, Akngeyan rlterrk ilkwakertarl aneyel, ingkerrenh ipmepenh itethiletyek.

<sup>30</sup> Rernem ingkerrenh itethirremel alpeyenh rernem aney-alpeyenh intem-antey, arelh-itwel itengirrey-angenh, irrwerl-areny-rnem-apeny.

<sup>31</sup> Akngeyel arrwekel-antey renh-rnem ilek, rernem angkeparl itethirreyenh, ipmepenh. Arrantherr angka ilenh iterl-arey-areny, angka ilenhan Akngey-kenh pipel arraty inngarl aynteyel. Arwerl wethelarl lherrm ampenh-apeny.

<sup>32</sup> Akngeyel Moses renh ilek, ‘Ayeng ngkwenhek-rnem ingkerrenhek Atyetyart aneyenh, Abraham-ek, Isaac-ek, Jacob-ek.’ Rernem iteth-antey aneyarr-alpek Akngey-kenh apmerel irrwerl, Abraham-akerr, Isaac-akerr, Jacob-akerr. Arrantherran ingwer-rnem apmwel-aretharl akalty-antheyel intem ilwenty-arrpantey. Rernem ipmepenh itethirremel ingkerrenh alpek Akngey-itwel aney-alpek, intem-antey. Alakenh-anyem, anwantherrarl ilwem, Akngeyel anenhantherrenh angkep arrpemarl itethilem, anwantherrap apmer

ikwerenh-warl irrwerl alpem, ra arrenhantherr arntarnt-arayntetyek apmer ikwerenh-itwek intem-antey.”

<sup>33</sup> Jesus-el renh-rnem apatel-anthek.

*Angka Akngey-kenh innga  
(Mark 12:28-34; Luke 10:25-28)*

<sup>34</sup> Pharisee-el-rnem awek-penh, rernem anyentirrek, angkerretyek.

<sup>35</sup> Artwa anyent ingwerel Jew-kenh-angkwarran iterl-arenhan. Ranem Jesus ikwer arrkernelhek, ayernemel,

<sup>36</sup> “Inkartay, Moses-el angka akngerr anwekantherr arrernek. Nthenh-apenyarl angka rlterrk impen inngan, anwantherr renh apentetyek?”

<sup>37</sup> Jesus-el renh tyernek, “ ‘Anyent renhant apentetyek, anyent ikwerant iterretyek’,

<sup>38</sup> Angka nhanyem impen, arrwekeleny.

<sup>39</sup> Akngey-kenh angka ingweran alakenhaym aynteyel: ‘Arrantherr ingwer-rnem arntarnt-arayntetyek, ikwer-rnem inkwerelh-ayntetyek, ampa arrekantherrenh-rnem arntarnt-areyel-apeny.’

<sup>40</sup> Angka ingwer-rnem arrangkwarl, Moses-kenh angka ingwer-rnem artwa angkakert ingwer-rnem-anem ingkern-they-anem aremirrek.”

*Artwa David-kenh  
(Mark 12:35-37; Luke 20:41-44)*

<sup>41</sup> Pharisee-rnem ikwer-itwek rtnenh-antey, Jesus-el renh-rnem ayernek,

<sup>42</sup> “Nthakenh arrantherr iterl-areyel Christ itethiley-angker renhan. Angwenh-kenh ran?”

“Ranem Atyetyart David-kenh,” rernem renh tyerne.

<sup>43</sup> Jesus-el-anem renh-rnem tyerne, “Akngey-kenh itnwengel ikwer lwewarrernek. David-el Christ renh itnewek ‘Atyetyart atyenh’.

<sup>44</sup> Akngeyel atyetyart atyenh renh ilek, ‘Atyeng-itwel ana! Arlkarirreyel-rnem, atha ngenh atyetyart arrernem ikwer-rnem.’

<sup>45</sup> Nthakenh atyetyart David-kenh? David-el renh atyetyart antweyel. Nthakenh arrantherr iterreyel.”

<sup>46</sup> Ingwerentyel arraty renh tyerney-angenh-they, rernemap menty-anem ipmelhek, angka ingwerek ayerney-angenh-anem.

***Anayntileyel: David-they ingkern, ingkern-penh ranem apetyek.***

## 23

*Jesus-el Pharisee-rnem-then Moses-kenh angkakert-rnem akalty-antheyel*

*(Mark 12:38-40; Luke 11:37-52; Luke 20:45-47)*

<sup>1</sup> Jesus-anem ingkerrenh-warl angkek kwertengerl ikwerenh-rnem-warl-then,

<sup>2</sup> “Pharisee-rnem-then Moses-kenh-rnem-then akalty innga aneyel, angka Moses-kenh-angkwarran.

<sup>3</sup> Rernem Moses-kenh angka arraty akalty-antherl-anenty, arrantherr ikwer-rnem awelh-ayntetyek, Pharisee-kenh-angkwarr apentey-angenh. Rernem ingwer-rnem akalty-anthem,

rernem Akngey-kenh-angkwarr arrayty apentey-angenh.

<sup>4</sup> Rernem ingwer-rnem akalty-anthem, rernem renh-rnem aleth arntarnt-arey-angenh-anemarl.

<sup>5</sup> Rernem tnakelheyel. Mwanytel arntarnt-arelhenherr-arey yanh-rnem-kety kwet arlpenty-akert-kety! Akngey-kenh pip-rnem rernem rl-wewarl arertnelhem iyterlarr-apeny akwewarl-then, ingkerrenhel renh-rnem arayntetyek.

<sup>6</sup> Warl ikwer-warl rernem anyentirrem, angkerr-ayntetyek. Rernem arrwekel-warl arrernelheyel arrkngelemel ingwer-rnem-kety, rernemant tnakelhetyek. Ingkerrenhel inkwerelhemel amern arlkwetyek, rernemant arrwekel-warl arrernelhetyek arrkngelemel ingwer-rnem-kety, rernemant tnakelhetyek.

<sup>7</sup> Akngerr akarrirrenty-warl, akngerrel renh-rnem tnakelh-ayntetyek, ingkart ilkwarrpantey.

<sup>8</sup> Arrekantherr akalty-anthey-angker anyentant. Akngey anyent irrwerl-areny rant ingkerrenhek aneyel. Ingkerrenh arrantherr aneyel, awayenheng-apeny, angkwerenheng-apeny.

<sup>9</sup> Ingart ahern-areny ntwā tnakey-angenh, Akngey-arrpantey. Akngey alker-arenyekant anwantherr awelhetyek.

<sup>10</sup> Nthakenh ingkart rltwa tnakelhey-angenh. Artwa itethiley-angker rant atyetyart arrekanttherrenh aneyel.

<sup>11</sup> Ingwerenty apek atyetyart ilkwa anenty, rap warrkenh ingwer-rnemek.

<sup>12</sup> Artwa anyent ilkwarrpantey ilelhenty, Akngeyel renh areyel arrangkwarl. Artwa ra



apmwamwam ilelhenty, Akngeyel renh areyel mwerrarl.

<sup>13</sup> Yaw-yaw! Pharisee-rnem-then angka Moses-kenh akalty-anthey-angker-rnem-then! Akngeyelan arrenhantherr artewentyel innga irrwampenh-antheyenh! Arrantherr angka Akngey-kenh arraty akalty-anthey-angenh, akngerr ingwer-rnem akaltyirretyek, ikwerenh-angkwarr anayntetyek. Arrangkwaw! Rerneman angka ikwerenh iterl-arey-angenh, arrantherr-apeny! Rernem irrtwyerremel angkeyel Akngey-warl-athek arleng-alenty. Akngeyelarl ingkerrenh court-emileyenh, rap renh-rnem irrwampenh-antheyenh, irrtwyalth renh-rnem. Ingwer-rneman ra alyepel irrwampenh-antheyenh.

<sup>15</sup> Artwa Pharisee-rnemay, Moses-kenh-rnem-then arrantherr apmwangkwarr akaltyileyel. Arrantherr apmer arleng-warl alheyel, artwa anyent angkepilyek, renh Inkart-angkwarr akaltyilyek. Arraty-wenyarl arrantherr apmwangkwarr akalty-antheyelarl, apmwangkwarr apenterl-ayntetyek, arrantherr apenteyel-apeny!

<sup>16-17</sup> Rernem irrtwyerremel ilelheyel tyaty ilk-wangkwarr. Alakenh ingwer-rnem irrtwyerremel ilelheyel, 'Gold innga aynteyel-apeny tyaty ilkwitwel, arraty ayeng angkeyel wenh.' Tyaty ilkwa impen, gold-an arrangkwarr.

<sup>18</sup> Apwert ilperr-ilperr impen ikwer tyenkerr amperryek. Ingwer-rnemel irrtwyerremel ilelheyel alakenh, 'Apwert ilperr-ilperr tyaty ilk-witwek innga aynteyel-apeny, innga atha ileyel.'

19-20 Ingwer-rnem alakenh irrtwyerremel ilelheyel, 'Gold tyaty ilkwel innga aynteyel-apeny, arraty innga atha ileyel.' Ingwer-rnem alakenh angkeyel, 'Tyaty ilkwa alakenh aynteyel-apeny, innga arraty atha ileyel.'

21 Akngey-kenh warl ilkwa nhel anwantherr iterretyek, arraty apentetyek Akngey-kenh-angkwarr. Inngant nga ilelhetyek, irrtwyerremel ilelhey-angenh.

22 Ingwer-rnem irrtwyerremel ilelheyel alakenh, 'Alkenhel arem'. Arrkent iley-angenh, arrantherr iterretyek Akngey anyent ikwer. Anwantherr iterretyek ra irrwerl-itwel anwekantherr mpwelheyel, irrtwyerremel ilelhey-angenh.

23 Artwa Pharisee-rnemay! Akngeyelan arrenhantherrenh artewentyel irrwampenh-antheyenh! Arrantherrarl amern atherrk akep-akalthem, akely anthem Akngeyekan, Moses-elarl akalty-anthenh-angkwarr. Angkan ikwerenh arrangkwarr. Angka akely nhan, arrangkwarr. Arrantherr arratyilerrey-angenh, ingwer-rnem arntarnt-arey-angenh, arrantherr Akngey-angkwarr arraty apentey-angenh. Arrantherr angka apenterl-anem angka ingkerr!

24 Arrantherr angka anyent impen ikweretyan iyypelirrekarr. Arrantherr angka apmwel-aretharl apenteyel, angka mwerr-angkwarr apentey-angenh.

25 Arrantherr Pharisee-rnem apmwel-areth iterreyel. Arrantherr mwerr-arrpantey inngelheyel, kwenan apmwarl. Arrantherr apmwerne-marl rnter-rnem.

<sup>26</sup> Arrantherr artwa aparrng-apeny. Arrantherr apmwekety angkepirretyek Ingkart-warl. Ikwer-penh arrantherr Akngey-angkwarr arrayt aneman.

<sup>27-28</sup> Arrantherr iterl-arelheyel arrayt-angkwarr-arrpanteyarl. Arrantherr arlka kwenan apmwakert-anteyarl! Warl mwerrarl intelheyel-arrpantey ntwaa arem, warl apmwarl kwenan. Arrantherr apmwakert-antey aneyel, warl mwerr-arrpantey intelheyel-apeny.

<sup>29</sup> Akngeyelan arrenhantherrenh inngarl artewentyel irrwampenh-antheyenh! Awankakerr artwa angkakert Akngey-kenh-rnem rernem akwernek awenng-warl. Arrantherr awenng-rnem ayterlkwel aperneyel mwerr-angker ilemel, angkakert-rnem iylpangk-ayntetyek.

<sup>30-31</sup> Arrwekelenyel-rnem angkakert-rnem atwenh. Rernemap awelhey-angenh angka Akngey-kenhek, arrangkw. Alakenh-anyem arrantherr awelhey-angenh arrpemarl.

<sup>32</sup> Arrantherran irrtwyerremel ilelheyel arrayt-angkwarr-arrpantey, rernemarl angkakert-rnem atwenh-apeny.

<sup>33</sup> Arrantherr Ingkart-kety amentirrek. Rwa ilkwa arrwekel arrekantherr mpwelheyel.

<sup>34</sup> Arrwekel-antey Akngey angkek, 'Atha angkakert-rnem artwa akalty ingwer-rnem-then arrekantherr Jew-rnem-warl thwenetyek. Arrantherrarl ingwer-rnem ipmek atwem, ingwer-rnem arwerl iylpeyl-atherr-warl arrernem, ingwer-rnem whip-el atwem Jew-

rnem-kenh tyaty akely-rnem-itwek, ingwer-rnem arntety anthemarl apmer arrpanenhel.'

<sup>35-36</sup> Awank-akerr Cain-el ayteyikw Abel-tangkwel atwek. Ingwer-rnemel-anem atwenh angkakert Akngey-kenh-rnem. Artwa anyent Zechariah Barachiah-kenh alerikw rernem atwek arrpemar, rarl rtnenh tyaty ilkwa Jew-rnem-kenh kwen-itwel, ampwal rwek-arelh arrerenty. Yaw-yaw, atha arrenhantherrenh arraty ileyel. Akngeyan ahelirreyel arrekanterr. Arrwekeleny-rnemel angkakert Akngey-kenh-rnem awank-akerr atwenh-they, Akngeyel arrenhantherr atweyenh arrpemar."

*Jesus amperrngirreyel tawen Jerusalem-areny-rnemek*  
(*Luke 13:34-35*)

<sup>37</sup> Jesus-an amperrngirreyelpek Jerusalem-areny-rnemek. "Ayengan ikwer-rnem amperrngirreyel Jerusalem-areny-rnemek! Rernem Akngey-kenh angkakert-rnem atwek, Akngeyelarl ikwer-rnem thwenek. Rernem apwertel wemel, ipmew-antey atwek renh-rnem. Ayenganap ilkelhenh, renh-rnem ingkerrenh-antey arntarnt-arayntetyek. Ayengan ilkelhenh, renh-rnem ingkerrenh akarriletyek, tywek-tywekelarl akely-rnem akarrilem-apeny, aympelhel artemel. Alakenh-anyem. Arrangkwarl! Rernem ingkerrenhel ayenh artepelant arek!

<sup>38</sup> Alakenh-anyem Akngeyelan apmer Jerusalem arntarnt-arey-angenh. Apmer yanhan ampeny arrangkwa aynteyenh, alkey-anem.

Tyaty ilkwa renhanap atep-atakeyenh ahernel-anem arlperry-anem ayntey-ayntey-alheyenh.

<sup>39</sup> Rernem ayenh arey-angenh arleng-alenty apmer yanh-itwek. Ingwer-inger ayeng angkep apetyeyenh. Rernemap ayenh areyenh-anem, alakenh-anem angkemel, 'Artwa nhanyem mwerr-angker! Akngeyelan renh thwenek rlterrk-akertel!' " Angka nhanyeman Jesus-elan ilenh Jerusalem-areny-rnem-akert.

## 24

*Ingwerel-rnem tyaty ilkwa atakeyenh*

*(Mark 13:1-2; Luke 21:5-6)*

<sup>1</sup> Jesus ra tyaty ilkwa iwerl-alhek-penh, kwertengerl ikwerenh-rnem apetyek ikwer-warl angkemel, "Warl nhenh-rnem ara!"

<sup>2</sup> Jesus angkek, "Ingwer-ingeran ingwerel-rnem atakem-anem, tyaty ilkwa yanh akwarrkir-reyenh."

*Rernem atwerreyenh*

*(Mark 13:3-13; Luke 21:7-19)*

<sup>3</sup> Rernem apwert alip-angketyarr irrwerl-warl nganek. Rernem ament rtnenherrenhel, rernem renh ayernekanem, "Ilengerarl ingwerel-rnem tyaty ilkwa ilenh atakeyenh, akwarrkirretyek? Nthakenh anwantherr arlta ingkern iterlareyenh? Ngarl apey-alpey-alpeyenganhan ilekel anwernenhantherr ileyengan?"

<sup>4</sup> Jesus-el renh-rnem tyernekanem, "Mwantyel arntarnt-arelhennherr-arey,

<sup>5</sup> Ingwer-rnemarl apetyem-kety rernem irtwyerremel ilelheyenh-kety ayeng-arrpantey,

‘Ayeng Akngeyel wetharl awank-akerr alhelek, ayeng nhanyem-anem apetyek arrekanterr-warl.’

<sup>6</sup> Apmer arrpanenh atwerrerl-anenty arranterr awerl-aneyenh. Aterirrey-angenh arranterr anetyek. Apmer aparnpan rernem ahel atwerreyenh ahern-then alker-then ywerrey-alenty.

<sup>7</sup> Apmer ingwer-areny-rnem-then ahel atwerrerl-aneyenh. Angayakwel ilwenherreyenh, ahern akngelheyenh.

<sup>8</sup> Alakenh-anyem aynteyenh ingweleman, ahern-then alker-then ywerrey-alenty.

<sup>9</sup> Arranterr atyeng-angkwarr apenteyel-kety rernem arrenhanterr tyayl-warl akwerneyenh, ingkerrenhel ngenh atweyenh. Ingwer-rnem arrekanterrrety arlkarirreyenh, arranterrarl atyeng-angkwarr apenteyenh.

<sup>10</sup> Ingwer-rnem intwemelirreyenh, ingwer-rnem ahelengkw-rnem-warl ahayiweyenh tnhwerant-arey aneyenh.

<sup>11</sup> Irrtywerrey-angker akngerr apetyeyenh Akngey-kenh angkakert-arrpantey, irrttywerremel ilerl-aynteyek.

<sup>12</sup> Akngerrel apmwangkwarr apenteyenh, ipmelhemel-anem mwerrant-arey arnanekerr.

<sup>13</sup> Arranterr atyeng-angkwarr apenterl-anenty arlta ingkernek-atwety, Akngeyel arrenhanterr itethileman.

<sup>14</sup> Angka atyenh arlpimpirreyenh apmer arrpanenh-warl, angka ilpertel-warl rernem ingkerrenhel awek-penh, arlta ra arrer-anemarl.”

*Artwa ahelengkw apmer Jerusalem-itwek aneyenh*

*(Mark 13:14-23; Luke 21:20-24)*

<sup>15</sup> “Arlta ikwerel, ahelengkw Jew-kenh tyaty ilkwitwek aneyenh. Akngey-kenh pip angka arrwekeleny-akert Akngey-kenh angka aynteyel, Akngey-kenh angkakert Daniel-elarl ingkwernek. Arrantherrarl awem, tyaty ilkwa ikwerelarl Atyetyart ilkwa ra aneyenh,

<sup>16</sup> arrantherr Judea-areny-rneman alhetyek, apwert-warlarl.

<sup>17</sup> Arnkwek iterrey-angenh, arrantherr arwa apwert-warl anpenheyekant.

<sup>18</sup> Awangk alhentyel, kwetek angkep alpey-angenh, menty ra ayntey.

<sup>19</sup> Ayeng amperrngirreyel arelh-rnemek, rernem ampa akely irrepern atnyeneyel-kety.”

<sup>20</sup> Jesus angkek, “Akngey rantarl arlta anyent iterl-areyelan, anwantherr iterl-arey-angenharl. Arrantherr Akngey renh ayerney aherrety arrer-netyek, irrerntel arrenhantherr atwekerr. Renh ayerney arrpemar, arlta arrernetyek, arrantherr alhewerarl alhayntetyek, ltyerrey-angker-wenyel.

<sup>21</sup> Arlta anyent ikwerel, artwa ingkerrenh arntetyirreyenh, alakenh awank-akerr anwantherr arntetyirrey-angenh. Anwantherr ingkern arntetyirrey-angenh alakenh.

<sup>22</sup> Arrer-anem anwantherr mpwelhem. Arlta irrpetyap-penh Akngeyel ikwerenh-rnem ingkerrenh arntarnt-areyenh.

<sup>23</sup> Akgerr arrekantherr-warl apetyem, arrenhantherr irrtywerremel iletiek, Akngeyel

renh-rnem thwenenty-arrpantey ahern nhewarl, Christ-apeny. Rernem alakenh ingkerrenh-warl ilelhem. Arrantherr iympelant renh-rnem awe-tyek, arrenhantherr ilpertileyekarl ilenhan arrkernelheyel.

<sup>24</sup> Rernem apetyem, Christ-arrpantey Akngeykenh angkakert-arrpantey, angka ilek-ilek-akert rernem arrekantherr arrkernelhetyek, arrantherr ikwer-rnem-kenh-angkwarr apentetyek.

<sup>25</sup> Mwanytel arntarnt-arelhenherry-arey ikwer-rnem-kety, arrenhantherr ilpertilekerr, atharl arrenhantherr arrwekel ileyel-angkwarr.”

*Jesus ra apey-alpeyenh*

*(Mark 13:24-27; Luke 21:25-28)*

<sup>26</sup> “Ingwer-rnemel alakenh ileyel, ‘Christ ra apmer arlpawelarl aremirrek.’ Ingwer-rnemel ileyel, ‘Christ ra warl kwenel irrtyertewelheyel ingwer-rnem-kety.’ Ikwer-rnem awelheyangenh.

<sup>27</sup> Ingkerrenhel Artwa Impen renh areyenh arrpemar, anaynt, ahern-arenyel awely-awely areyel-apeny.

<sup>28</sup> Thip-rnem akarrirreyel ipmitwel, thip inkwel. Anwantherr anaynt areyenh arrpemar, rarl apey-alpeyenh.”

***Anayntileyel: Jesus-el renh-rnem angkanem ilenh, rernem ikwer arntarnt-arelhetyek. Thip-rnem akerek arntarnt-arelheyel-apeny, anwantherr Jesus ikwerant arrpemar arntarnt-arelheyel.***

<sup>29</sup> “Ingkeny-then, alkent-then, antyarr-then rernem ingkerrenh akngelheyenh, ayeng Anyent



Impen aremirrey-alenty. Ingkeny-then alkent-then ywerreyenh. Antyarr ingkerrenh irrwerl-they aytneyenh.

<sup>30</sup> Arlta anyent ikwerel, ingkerrenhel ayenh arnareyenh, Artwa Impen anyent Akngey-kenh irrwerl-they apetyenty, rlterrk ilkwakert. Rernem artneyenh ingkerr.

<sup>31</sup> Terampet angelh-angelhileyenh. Ikwer-theyan, atha alker-areny-rnem thwenem, rernem alhetyek, apmer arrpanenh-warl, Akngey-kenh-rnem ingkerrenh akarrilenhey-alpetyek.”

*Anwantherr iterl-arey-angenh, ilenger Jesus ra apey-alpeyenh*

*(Mark 13:28-31; Luke 21:29-33)*

<sup>32-33</sup> “Arrantherr iterrenherr-arey, arepampeyel akarley ampengirrentyel ngkweng ileyel aherrety ampep-anem. Akarleyel ileyel-apyeny aherrety ampep arrer-anem, ingkeny-then alkent-then ratherr arrenhantherr ileyenh, ayeng alerl apey-alpeyenh arrekantherr-warl ahern nhewarl. Ayeng apey-alpeyenh ahern nhewarl antyarr-then aytenty, ahern-then alker-then akngelhenty.

<sup>34</sup> Itetharl aneyel-rnem ingwer-rnemel rernem iterl-aremel areyenh arrpemarl.

<sup>35</sup> Innga atha arrenhantherr ileyel. Ahern-then alker-then ywerreyenh. Angka atyenh intem-antey aytneyenh.”

*Jesus-el renh-rnem ileyel, rernem ikwer mpwel-hetyek*

*(Mark 13:32-37; Luke 17:27-30, 34-36)*

36 “Nthakenh ingwerentyel arlta iterl-arey-angenh, ilenger ayeng apey-alpeyenh ahern nhewarl. Alker-arenyel-rnem-then iterl-arey-angenh. Akngey anyent rant iterl-areyel, ilenger ayeng apey-alpeyenh ahern nhewarl.

37 Rap irrkaty-angkwarr aynteyenh Noah-arl anenh-angkwarr-antey.

38 Rernem apatemel anenh, ikwer-rnem-kenh-angkwarrant anenh, amernant arlkwerrenh, ngkwarlant antywerrenh, itengirrenh apmellerreny-angkwarr, Akngey iterl-arey-angenh. Noah-el rtnwa ilkwa arnwarnenh.

39 Akngeyel kwaty ilkwa thwenek. Noah-an aylopenhek ikwerenh-rnem-akert rtnwewarl kwen. Kwaty atnyerr ilkwa ra ingwer-rnem ilwerl-athenek. Akngey-kenh Artwa Impen anyent apey-alpey-alenty, alakenh aynteyenh.

40 Artwa atherr amern-angketyarrel warrkirrerl-anenty, angel-rnemel anyentant inerl-alheyenh, ingweran iwerl-alheyenharl.

41 Arelh atherr apek anerl-aneyenh, ntang atherl-anemel, angel-rnemelan anyentant inerl-alheyenh, ingweran iwerl-alheyenharl.

42 Mwentyel arntarnt-arelhenherr-arey! Arrantherr iterl-arey-angenh, ilenger Ingkart ar-rekantherrenh apey-alpeyenh.

43 Apmerek-artweyel nthakenh iterl-arey-angenh, anyelk-awarr ra apey-alheman. Ra arntarnt-arenhem, irrtiert-awarr ra anyelkel inekerr.

44 Arrantherr iterl-arey-angenh, ilenger Artwa Impen ayeng apey-alpeyenh. Akngey-kenh arlta impen anwantherr iterl-arey-angenh

inpa aneyenh. Atyek-antey arntarnt-arerl-ayntenherr-arey!”

*Mwanty arntarnt-arelh-ayntetyek, Jesus-arl angkep apetyeyenh (Luke 12:35-48)*

<sup>45</sup> “Artwa ilkwa anyent anem warrkenh akngerrew-artey. Atwerrpan ra angkem ikwerenh-rnemek, ‘Ayengarl alhem-kety, arrantherran warl atyenh akarerl-ayntenherr-arey! Mpwelherl-anemel, ayengant apey-alpetyek-atety, arntarnt-arenhemel.’ Akngerr apmer ikwerel akarrirrem, amern akngerr inkwerelhemel amern kwenty arlkwerrem. Ingwa ikwerel-antey artwa ilkwa ra alpem warl ikwerenh-warl. Warrkenh ikwerenh-rnem atyek-antey anem, arntarnt-arenhem ikwer lyenenty-akert. Artwa ilkwana inkwerelhem, warrkenh ikwerenh-rnemaarl atyek-antey ikwer mpwelhemek, rarl ilantheke-angkwarr. Ra renh-rnem ilem arrernelhetyek, rap amentel-antey amern-anem ampernem, rernem arlkwetyek.

<sup>46</sup> Artwa ilkwa alhem-tangkwel. Rarl apey-alpemel, warrkenh renh arey-alpem, mwer-rarl warrkirrerl-anenty. Ra inkwerelhem, rap angkem warrkenhek, ‘Nga artwa mwerrarl atyeng warrkirreyel.

<sup>47</sup> Ngan atyetyart aneyenh warlek, pwelekrnemek, ilek-ilek atyenh ingkerrenhek.’

<sup>48</sup> Warrkenh ingweran arraty warrkirrey-angenh. Ra iterrem, ‘Atyetyart atyenh apey-alpey-angenh-antey, ywerreyel-antey.’

49 Warrkenh apmwa ra warrkenh ingwer-rnem atwem. Ran aynterlant-anem, amernant akngerrarl arlkwemel, ngkwarl-then antywem, terangk irreytyek-atwety.

50 Warrkenh apmwa apal ayntem, atnaraty, atyetyartarl apey-alpeyenhek. Ingwer-ingerant atyetyart apey-alpek anyelkel.

51 Atyetyartel warrkenh apmwa artewentyel atwem, irrentemel artwa apmwernem-warl, atyetyart ikwer awelhey-angenh-rnem-warl-anem.” Alakenh-anyem Jesus ikwer-rnem angkenh.

## 25

### *Angka kwey aleyak 10-pel-akert*

1 Jesus-el renh-rnem ilek, “Angka atha iletiek, Akngey-kenh-angkwarr alakenh aynteyel. Artwa ra aleyak anyent-itwek itengirrey-alenty, aleyak 10 rernem alherlewek artwa anyent rlwatetyek lyenenty-akertel.

2 Aleyak 5-pel ingwer-rneman akwerrparl. 5-pel ingwer-rneman akaltyarl.

3 Aleyak 5-pel akwerrpel-rnem anter akelyarl akngek, rernem lyenenty lyerrtyiletiek.

4 5-pel akalty-rnem rernem anter ilkwarl akngek, anter ywerrekerr, lyenenty lyerrtyiletiek.

5 Rernem ingkerrenh mpwelhenh arleng-alenty. Renh-rnem ankwel atwek, rernem ankwanem ayntek.

<sup>6</sup> Ampepenyelan ingweran arlkek, 'Artwa yanhey ra apetyeyel-anem! Mpa anwantherr arnekirrey ikwer-warl!'

<sup>7</sup> Aleyak-rnem akwentenhey-alpek, ingkerrenhel lyenenty-anem lyerrtyilek.

<sup>8</sup> 5-pel ingwer-rnem akwerrpel-rnem anterek-anem ayernenh aleyak ingwer-rnem, 'Anter ingweran anthenherr-arey, lyenenty ywerrekarkety!'

<sup>9</sup> 5-pel ingwer-rnemel tyerne, 'Arrangkw. Arrantherr store-warl alhenherr-arey anter ament payemeletyek!'

<sup>10</sup> 5-pel ingwer-rnem akwerrp-rnem alhek anter inetyek, artwa ra aremirrek ingkernarl, rernemarl store-warl alhek-kety. 5-pel aleyak akalty-rnem mpwelhenh, kel rernem aylpenhek warl ikwer-warl artwa ikwer-angkwarr, amern kwenty rernem arlkwetyek, artwa ra itengirreyalenty. Ingwerentyel arriw martek-anem.

<sup>11</sup> Ikwer-penhan aleyak akwerrp-rnem apeyalpek-anem warl ikwer-warl arrpemar. Rernem arlkek, 'Ingkartay! Warl altywerilay! Warl altywerilay! Anwernantherr aylpenhetyek arrpemar!'

<sup>12</sup> Artwa angkek, 'Atha arrenhantherr arraty ilem, atha arrenhantherr iterl-arey-angenh.' "

<sup>13</sup> Jesus-el angkanem anayntilek, "Alakenhanyem aynteyel, ayeng apeyalpeyenh arrpemar. Arrantherr mwanty arntarnt-arelhetyek, arrantherr iterl-arey-angenharl, ilenger ayeng apeyalpeyenganh."

*Angka warrkenh 3-pel-akert  
(Luke 19:11-27)*

<sup>14</sup> “Akngey-kenh-angkwarr alakenh aynteyel, artwa anyentel artwa warrkenh irrpety arrernerl-alhek, rernem apmer arntarnt-arerl-ayntetyek.

<sup>15</sup> Kel ra renh-rnem iterl-arek. Artwa ra arrwekel antheke artwa anyent man 5,000-anem. Artwa ingweran antheke 2,000, artwa ingweran 1,000. Artwa atyetyart alethel-anem ikwerpenhan anperl-alhek.

<sup>16</sup> Atyetyart ra alhek-kety Artwa anyent ingwer 5,000-akertel, ra 5,000 ingwer-anem mpwarek.

<sup>17</sup> Artwa 2,000-arl antheke, 2,000 ingwer-anem mpwarek, irrkaty-angkwarr arppemarl.

<sup>18</sup> Artwa anyent ingwer 1,000 anthekearl, ra irrka angernek, irrkewarl irrtyert akwernetyek arlengkewemel.

<sup>19</sup> Ingwer-ingeran atyetyart angkep-anem apetyek apmer ikwerenh-warl. Ranem renh-rnem anyentel-anyentel manek ayerneynek.

<sup>20</sup> Artwa 5,000-arl antheke ran ilelhek, ‘Atha 5,000 ingwer-anem ngkweng mpwarek.’

<sup>21</sup> Atyetyart ranem angkek, ‘Ntwa mwerr-angkwarr mpwarek wenh! Ayeng ngkweng inkwerelheyel. Apetyay atyeng-angkwarr apmer mwerr-angkerel anetyek.’

<sup>22</sup> Warrkenh ingwer 2,000-arl antheke, rane-marl ilelhek, ‘Atha 2,000 ingwer-anem ngkweng mpwarek.’

<sup>23</sup> Atyetyart ranem angkek, ‘Ntwa mwerr-angkwarr mpwarek, ayeng ngkweng inkwerel-

heyel. Apetyay, atyeng-angkwarr apmer mwerr-angkerel anetyek.'

<sup>24</sup> Warrkenh ingweran 1,000-akertel atyetyart ikwer ilelhek, 'Ayengan arrangwarl. Atyetyartay, ngan artwa awerrarl. Ntwa arwa alhewer man iney-angkeran ingkerrenh-they.

<sup>25</sup> Ayeng aterirrek, man ingkerrenh irrkewarl akwernek, arlengkewemel. Nhanyem man ngkwenh ingkerrenh-antey.'

<sup>26</sup> Atyetyart ranem renh ilek, 'Ngan warrkenh apmwarl, alhengkerrarl. Ntwa ayenh iterlareyel, atha ingkerrenh akarriley-angker, amern atha lyapelhey-angenh-itwek.

<sup>27</sup> Ntwa man bank-warl arrerney-areny areyilemel.

<sup>28</sup> Man ngkwenh antha artwa 5,000-akert-warl.

<sup>29</sup> Arraty-angkwarr apenteyel-rnem Akngeyel renh-rnem arntarnt-areyenh. Apmwangkwarr alheyel-rnem, Akngey ikwer-rnem-kety ipmelheyenh.

<sup>30</sup> Warrkenh apmwa akwerr-ampeny-warl irrenteyenh, atayel arrangkeyel-rnem-warl.' "

***Anayntileyel: Warrkenh mwerr atyetyart ikwer awelhenh-apeny, anwantherr Inggkart Akngeyek awelh-ayntetyek. Inggkart Akngeyel anwenhantherr arrernek, ikwer warrkirr-ayntetyek. Anwantherr ikwer awelhenty, ra anwenhantherr anthem arpemarl.***

*Angka yep-yep-akert nanikwet-akert-then*

<sup>31</sup> Jesus-el renh-rnem ilek, “Ayeng Artwa Impen Akngey-kenh. Ayeng apey-alpeyenh rlterrk ilkwakert angel-rnem-then.

<sup>32</sup> Ahern-areny-rnem ingkerrenh rernem anyentirreyenh atyeng-warl. Atha ingkerrenh akngakeyenh artwa anyentelarl yep-yep-rnem-then nanikwet-rnem-then akngakeyenh-apeny.

<sup>33</sup> Yep-yep-rnem atha akngakeyenh arraty-ampeny-warl. Nanikwet-rnem atha akngakeyenh ayleng-ampeny-warl.

<sup>34</sup> Athanem arraty-ampeny-rnem ileyenh, ‘Apetyenherr-arey, Akngey atyenh arrekanterr inkwerelheyel. Apmer nhenh atha arrekanterr arrwekel-antey mpwarek, ahern nhenh arrpmerney-angenh-antey.

<sup>35</sup> Ayeng angayakwirrek, arrantherr amern anthe karkwetyek. Ayeng angkethakwirrek, arrantherr ayenh kwaty antywetyek anthe k. Ayeng alethangank, arrantherr ayenh arntarnt-arenh.

<sup>36</sup> Ayeng arnkwek arrangkw anenharl, arrantherr ayenh arnkwa anthe k. Ayeng arntetyirrek, arrantherr ayenh arntarnt-arenh. Ayeng tyaylitwek anenharl, arrantherr atyeng-warl apetyek rwanng aretyek weth-lkwer ilkwatherr.’

<sup>37</sup> Mwerrel-rnem renh tyernek, ‘Ingkartay! Ilenger ngenh anwernantherr angayakw arek, amern-anem anthemel? Ilenger ngenh anwernantherr angkethakw arek, kwaty-anem antywe tyek anthe k?

<sup>38</sup> Ilenger ngenh alethang anwernantherr arek, warl-warl-anem atnwenheynek? Ilenger ngenh anwernantherr arnkwek arrangkw arek, arnkwanem ngkweng anthemel?



39 Ilenger ngenh arntety anwernantherr arek, tyayl-itwek-then ngenh arek?’

40 Atha tyerneyenh, ‘Atha arrenhantherr ar-raty ilem, arrantherr alakenh-anyem irreperr-nem arntarnt-arek, rernem atyenh-rnem ingk-err.’

41 Ikwer-penhan ra ayleng-ampeny-rnemek ilek, ‘Arrantherr apmwernem alenherr-arey atyengety! Alenherr-arey rwa aknganenty-warl aletharl ampeyel-warl. Atha rwa mpwarekarl, renh-rnem arrtetyek arrenty-kenh-rnem-then. Rwa nthakenh ilwernelhey-angenh.

42 Ayeng angayakwirrek, arrantherr ayenh amern arlkwetyek anthey-angenh. Ayeng angkethakwirrek, arrantherr ayenh kwaty anty-wetyek anthey-angenh.

43 Ayeng alethang anek, arrantherr atyengety intwemelant irrek. Ayeng arnkwek arrangkw anenharl, arrantherr ayenh arnkwa anthey-angenh. Ayeng arntetyirrek, ayenh arntety arntarnt-arey-angenh. Ayeng tyayl-itwek anek, arrantherr ilkwatherr apetyey-angenh atyeng-warl.’

44 Apmwel-rnem renh tyerneyenh, ‘Ingkar-tay! Anwernantherr ngenh angayakw arey-angenh? Anwernantherr angkethakw arey-angenh? Anwernantherr ngenh alethang anwernantherr arey-angenh? Anwernantherr ngenh arnkwek arrangkw arey-angenh? Ilenger ngenh arntety anwernantherr arek, tyayl-itwek-then, ngenh arntarnt-arey-angenh?’

45 Atha tyerneyenh, ‘Atha arrenhantherrenh arraty ilem, arrantherr apek artwa

apmwwamwam atyenh-rnemek alakenh-anyem arntarnt-arey-angenh, rernem atyenh-rnem ingkerr.’

<sup>46</sup> Apmwerneman alheyenh apmer rwa aknganentyarl aleth ampeyel-warlarl. Mwerr-rneman apmer mwerr-warl alheyenh, rernem intemantey iteth aneyenh ikwer-itwek.”

## 26

*Rernem angkerreyel Jesus renh anterrkwetyek, atwetyek*

*(Mark 14:1-2; Luke 22:1-2)*

<sup>1</sup> Jesus-el renh-rnem akalty-anthek. Ikwerpenh ra kwertengerl ikwerenh-rnem ilek,

<sup>2</sup> “Arlta atherr-inger aynteyel tyenkerr-anem arlkwey-alenty. Ahelengkwel-rnem ayenh Akngey-kenh Artwa Impen artwa ingwer-rnem-warl ahayiweyenh, rernem arwerl iylpeyl-atherr-warl atanthetyek.”

<sup>3</sup> Moses-kenh-rnem-then, tyaty-areny ilkwernem-then Atyetyart Jew-rnem-kenh-then, rernem akarrirrek, atyetyart ilkwa tyaty-areny Caiaphas-kenh apmer-warl.

<sup>4</sup> Rernem angkerrenh, Jesus renh anterrkwemel, renh ipmek atwetyek irrtyertel,

<sup>5</sup> “Alerl-antey ra anayntey, akngerrel anwenhantherr atwekerr, ahelirremel ikwer-they.”

*Jesus apmer Bethany-itwel*

*(Mark 14:3-9; Luke 7:36-50; John 12:1-8)*

<sup>6</sup> Jesus apmer Bethany-itwel anenh. Ra amern arlkwenh Simon-kenh warlel, kwertengerl ikwerenh-rnem-akertel. Simon-arl anenh awank

tywen-akert apmer ikwerenhel, ra mwerr-anem aleyan.

<sup>7</sup> Arelh anyentel anter mwerr-angker thelek, akapwert Jesus renh apernemel, arelh rarl anter renh payemelek man akngerrel.

<sup>8</sup> Kwertengerl-rnemel renh arek, rarl Jesus akapwert anterel apernek. Rernem angkerrenh, "Ilek ra anter mwerran arimpeyel?"

<sup>9</sup> Ilek-ketyarl ra anwenhantherr anthey-angenh? Anwantherr tharlemiletyek, man akngerr inetyek, man-weny-rnem, irrepernrnem anthemel."

<sup>10</sup> Jesus-el renh-rnem iterl-arek, rernemarl tyel-angkerrenh. Jesus-el renh-rnem ilek, "Arrantherr ahelirreyang ikwer, mwerr-angkwarr ayenh anterel apernek.

<sup>11</sup> Mwerr-angkwarr arrantherr man-weny-rnem arntarnt-arem. Aleth man-weny-rnem anayntem arrekantherr-itwel. Ayeng nthakenh aleth aney-angenh ahern nhel. Lyert arrantherr atyeng iterretyek.

<sup>12</sup> Mareny-angkwarr arelh ra anterel apernek, ingwer-rnemel ayenh awenng-warl akwerne-tyek." Jew-rnemel apmelerr arrewaly anterel apernenh awenng-warl akwerney-alenty.

<sup>13</sup> "Atyenh-rnem apmer arrpanenh-warl alhentyel, angka atyenh ilayntetyek, rernem ingwer-rnem ileyenh, arelh anyentelarl ayenh anterel akapwert apernek mareny-angkwarr."

*Judas Atyetyart-rnem-warl alheyel  
(Mark 14:10-11; Luke 22:3-6)*

14 Kwertengerl anyent, Judas, apmer Iscariot-areny alhek Atyetyart ilkwa tyaty-areny-rnem-warl Jesus renh ahayiwetyek, rernem Jesus renh anterrkwetyek, rernem renh ipmek atwetyek.

15 “Atha arrekanterr Jesus iypparrrenenhenty, arranterr renh anterrkwetyek, man ilek-apyen arranterr ayenh anthem?” Rernem Judas renh man 30 payemelek.

16 Judas ra ament-anem iterrek nthakenhangkwarr ra Jesus renh ahayiwenh ahelengkw-rnem-warl.

*Jesus-el tyenkerr arlkweyel kwertengerl ikwerenh-rnem-akert*

*(Mark 14:12-16; Luke 22:7-23; John 13:21-30)*

17 Arlta impen anyent ikwerel, Jew-rnem akar-rirrek amern tyenkerr arlkwetyek. Jesus-kenh kwertengerl-rnem apetyek. Rernem renh ay-ernek, “Nthenh-warl anwantherr akarrirrem, anwantherr tyenkerr atyenhiletiek?”

18 Jesus angkek, “Alhenherr-arey, artwa anyent renh iley-alhenherr-arey, ‘Inggartel anwernantherrenh thwenek, arlta ikwerenh arrerirrek, ranem tyenkerr arlkwetyek kwertengerl ikwerenh-rnem-akertel, warl ngkwenh-itwek.’ ”

19 Rernem kel tyenkerrek atyenhilek arrwekel, Jesus-elarl renh-rnem ilek-angkwarr.

20 Ingwel, Jesus kel alhek kwertengerl ikwerenh-rnem-akert amern tyenkerr arlkwetyek.

21 Rernem amern arlkwenharl, Ra kwertengerl 12 ikwerenh-rnem ilek, “Artwa anyentel ayenh ahayiweyenh artwa ahelengkw-rnem-warl, rernem ayenh ipmek atwetyek.”

<sup>22</sup> Kwertengerl ikwerenh-rnem amperrngirrek Jesus ikwer. Anyentel-anyentel rernem renh ayernek, “Ayeng-alew, Inkartay?”

<sup>23</sup> Jesus-el renh-rnem ilek arrpemar, “Artwa anyentel atyeng-itwek amern arlkweyel, rarlap ayenh ahayiwem artwa ahelengkw-rnem-warl.

<sup>24</sup> Angka Akngey-kenh alakenh aynteyel: ‘Akngey-kenh Artwa Anyent Impen ra ilwem.’ Artwa anyentel ayenh ahayiwem artwa ahelengkw-rnem-warl, ayenh atwetyek. Ikwerpenh rap irrkngerney-weny-anemar aneyenh. Akngeyel renh atwem. Artwa ilenh rarl apmwangkwarr alkenhirrek.”

<sup>25</sup> Judas-el renh ayernek, “Ayeng-alew, Inkartay?” Jesus-el renh tyernek, “Ngarl arraty illehek-angkwarr-antey!”

<sup>26</sup> Rernem amern arlkwerrenharl-antey, Jesus-el amern inek, Akngeyek angkemel inkwerelhemel, rarl amern renh antheke. Ikwerthey, Jesus-el amern renh rlweth-akek. Ra kwertengerl ikwerenh-rnem antheke, angkemel, “Ina, arlkwa. Nhenhan arlka atyenharlap ran.”

<sup>27</sup> Tyampet wayn-akert inek-penh, ra Akngey angkeke inkwerelhemel, rarl wayn renh antheke. Ikwerpenhan ra renh-rnem antheke antywetyek.

<sup>28</sup> Jesus angkeke, “Nhenhan arrknga atyenharlap ran. Arrknga thelelhentyel ayeng ilwem, ingkerrenh-they apmwa irrarlkeyek. Akngeyel arrenhantherr alhelek, apmwa arrekantherrety iweyek, arrenhantherr anyentelhiletiek ikwerenh-rnem-warl.

<sup>29</sup> Anyent-inger-antey atha wayn nhenhan antywetyek ahern nhenh-itwek. Ingwer-ingerant,

atha ngkwarl wayn lyerteny antywem, Akngey atyenh-kenh apmer-itwekant.”

<sup>30</sup> Rernemap aylelherrek-anem, Ingkart Akngey-warl-athek, inkwerelhemel. Rernem warl ikwer-they Apwert Alip-angketyarr-warl alhek.

*Peter ilelheyel*

*(Mark 14:27-31; Luke 22:31-34; John 13:36-38)*

<sup>31</sup> Jesus angkek, “Ingwel lyert arrantherr alhem, arlperrrtyirremel, yep-yep-rnem arlperrrtyirremel anterrem, weth-apeny. Akngey-kenh angka arrwekeleny alakenh aynteyel: ‘Yep-yep arntarnt-arey-angker atwenty, yep-yep-rnemarlingkerrenh arlperrrtyirremel anterrem.’

<sup>32</sup> Akngeyel ayenh itethilenty-penhant, ayeng apmer Galilee-warl alhem arrwekel.”

<sup>33</sup> Peter ilelhek, “Kwertengerl ingwerel-rnem ngenh menty iwerl-alhenty, athan nthakenh ngenh iwerl-alhey-angenh.”

<sup>34</sup> Jesus-el Peter renh ilek, “Atha ngenh arraty ileyel, tywek-tywek irrwey ingwepenh arlkey-ayntekerrem-awayt, nga ilelhetyek irrpety-ingerntwa ayenh iterl-arey-angenh akwerrp.”

<sup>35</sup> Peter-el Jesus renh ilek, “Menty! Ayeng alakenh ilelhey-angenh ikwer-rnem-warl. Atha ngenh iwerl-alhey-angenh, aylenhanthatherr-antey ahelengkw-rnemel atwetyek.” Kwertengerl ingwer-rnem ilelhek arrpemarlingkerrenh atwetyek ahelengkw-rnemel.

*Jesus Akngey-warl angkeyel*

*(Mark 14:32-42; Luke 22:39-46; John 12:27)*

<sup>36</sup> Jesus apmer ingwer-warl alhek kwertengerl ikwerenh-rnem-akert, apmer Gethsemane. Jesus kwertengerl ikwerenh-rnem ilek, "Nhel arrantherr anayntenherr-arey, ayeng alhey-kety Akngey-warl angketyek."

<sup>37-38</sup> Jesus-el artwa irrpety atnwenhek, Peter-akerr, artwa ingwer atherr-then, Zebedee-kenh alerikw-atherr, renh-rnemant ra atnwenhek. Jesus ilelhek, "Ayengarl artewentyel iterremel ilwetyek-anem irreyel-kety. Arrantherr atyek anayntenherr-arey."

<sup>39</sup> Jesus ilperr-ayntek Inkart Akngey-warl angkemel, "Akngeyay, ayeng ilkelheyel artwa ahelengkw ilenh-rnem ntwat atyengety anterrkwetyek, ayenh atwekerr. Ntwat atyengety renh-rnem anterrkwa, nga arlkwententyarlan." Ikwere-penhan, Jesus angkek arrpemar, "Akngey, ngarl rltarrk inngan, mwerr ayenh menty rernem arntety ilkwa anthey, ayenh ipmek atwey, ngarl arlkwenteyel-angkwarr. Ayeng ngkweng awelheyel."

<sup>40</sup> Jesus apey-alpek kwertengerl ikwerenh-rnem-warl. Ra renh-rnem arey-alpek ankwantey aynterl-anenty. Ra Simon Peter renh ilek, "Ilekekarl arrantherr ankwantey aynteyel, ngwang ywerrey-angenh ayeng anamerl-antey arrekanterr-warl apey-alpek."

<sup>41</sup> Arrantherr atyeng atyek arntarnt-arelherl-anemer. Arranhanterr ingwerentyel arrkernem, arrantherr apmwangkwarr apentetyek. Arrantherr Akngey renh ayernetyek kwenirremel, arrantherr apmwangkwarr

apentekerr. Arrantherr ahern-areny arwarl, arraty-angkwarr apenterl-ayntetyek-arrpantey.”

<sup>42</sup> Jesus alhek Ingkart Akngey-warl angketyek irrkaty-angkwarr arrpemarl. Ra angkek, “Akngey, mwerr ayenh menty rernem arntety ilkwa anthey awaretyel, ngarl arlkwenteyel-angkwarr. Ayeng ngkweng awelheyel.”

<sup>43</sup> Jesus kwertengerl ikwerenh-rnem-warl apey-alpek. Ra arey-alpek renh-rnem ankwantey aynterl-anenty arrpemarl. Rernem atyek-anem aney-angenh, renh-rnem ankwel intem-antey itnatwenh. Jesus-el renh-rnem akwentelhilek, rernem akater-anem ingkerrenh anenh, nyerrirremel.

<sup>44</sup> Jesus alhek Akngey-warl angketyek arrpemarl, angka irrkaty arrpemarl.

<sup>45</sup> Jesus kwertengerl ikwerenh-rnem-warl apey-alpek, ra arey-alhek renh-rnem ankwantey aynterl-anenty arrpemarl. Jesus-el renh-rnem ilek, “Arrantherr ankwantey arrpem intem aynteyel. Kel arrantherr ankwayntek. Artwa ahelengkw-rnemel Akngey-kenh Artwa Anyent Impen ayenh rlengk anterrkweyenh, artwa apmwernem-warl ahayiwemel.

<sup>46</sup> Ingkerrenh akwentenherr-arey, anwantherr alhetyek. Artwa ilenhel-anyem ayenh ahayiweyenh, artwa ahelengkw-rnem-warl, ayenh rernem anterrkwetyek.”

*Ahelengkwel-rnem Jesus renh anterrkweyel  
(Mark 14:43-50; Luke 22:47-53; John 18:3-12)*



<sup>47</sup> Judas apetyek ikwer-warl. Ra ahelengkw-rnem ikngwerl-alpek Jesus ikwer-warl. Atyetyart ilkwernem-then Atyetyart Jew-kenh tyaty-areny-rnem-then, rernem ahelengkw renh-rnem thwenek. Ahelengkw-rnem napp arlpenty-akert apetyek, walth-then-akert.

<sup>48</sup> Judas-elarl renh-rnem ilek arrwekel, rernem iterl-aretyek, “Athan artwa weth renh arwanyem, arrantherraw renh anterrkwenherr-areyarl.” Ahelengkw-rnemel Jesus renh alhengk-arek, Judas-elarl arrwekel ilek-penh.

<sup>49</sup> Judas Jesus ikwer-warl apetyek angkemel, “Atyetyartay!” Judas-el Jesus renh anterrkwemel arrwanyek. Jew-rnemel artwa ingkerrenh rlwatirremel, rernem arrwanyirremel apmelerr-angkwarr.

<sup>50</sup> Jesus angkek ikwer, “Ilekek nga apetyek?” Kel ahelengkw-rnemel renh anterrkwek, Judas-elarl arrwanyek-warl.

<sup>51</sup> Kwertengerl anyent Jesus-kenhel napp arlpentyel atyetyart ilkwa ikwerrenh warrkenh renh iyipa rlweth-arternek.

<sup>52</sup> Jesus-el renh ilek, “Napp arlpenty yanh arrerneyna, ingwerentyel ikwer-anterl angkep atwekerr napp arlpenty-akertel.

<sup>53</sup> Ayeng arlkwententyarlan, atha Akngey renh ayernem, ra angel akngerr thwenetyek atyeng-warl, ayenh itethiletyek.

<sup>54</sup> Kel, mentyarl. Akngey-kenh angka nhenhan inngarl aynteyel, arrwekelelarl ra atyeng arrernek.”

<sup>55</sup> Jesus-el renh-rnem ilek, “Ilekekarl arrantherr apetyek irrtyertelan, ayenh

arrantherr anterrkwetyekan? Nayp arlpenty-rnem-thenan, walth-rnem-thenan arrantherr akngetyek, ayenh atwetyek, ayeng apmwa atwey-angker-arrpantey! Akgerr-inger atha arrenhantherr akalty-anthenh angka Akngey-kenh, ilerl-anemel, Jew-rnem-kenh tyaty ilkwitwek. Arrantherr ayenh anterrkwemer ikwer-antey artwa akngerrel arenty-angkwarr. Arraty-wenyarl alakenh arrantherr ayenh anterrkwek.

<sup>56</sup> Kel mwerr ayenh arrantherr anterrkwemer, alakenh Akngey-kenh angka pipel aynteyel-angkwarr, angkakert arrwekeleny-rnemel ingkwernek-angkwarr, alakenh-anyem innganem atyeng mpwelheyl arrwekel." Kwertengerl ikwerenh-rnem kel aterel anterrek.

*Atyetyart ilkwernemel Jesus renh arrkerneyel  
(Mark 14:53-65; Luke 22:54-55, 63-71; John  
18:13-14, 19-24)*

<sup>57</sup> Ahelengkwel-rnem Jesus renh akngel Caiaphas-kenh warl-warl atyetyart ilkwewarl. Atyetyart ilkwernem-then Moses-kenh-rnem-then ikwer-warl akarrirrek.

<sup>58</sup> Peter-el renh-rnem apentek, arleng-theyarl. Peter arrernelhek atyetyart-kenh yard-warl, ahelengkw-rnem-itwek. Ra akarenh, nthakenh rernem Jesus renh ileyenh.

<sup>59</sup> Atyetyart ilkwernem mpwelhenh, ingwer ayernetyek, Jesus renh ayntarrp-iletyek, rernem renh ipmek atwetyek.

<sup>60</sup> Rernem apatek nthakenharl rernem Jesus renh atweyenh. Ingwer-rnemel ywarn-anteyarl

Jesus renh ayntarrp-ilenh. Artwa ingwer atherr apetyek, renh ayntarrp-iletiek.

<sup>61</sup> Ratherr ilenh irrtwyerremel, “Jesus ilenh angkek, tyaty ilkwa Jew-rnem-kenh ataketyek, tyaty ingwer-anemarl artey-alkenh arlta irrpety-inger-penh.”

<sup>62</sup> Tyaty-areny atyetyart ilkwel Jesus renh ay-ernek, “Ntwa anwenhanterr tyerney-angenh-antey. Nthakenh rernem ngkweng angkerreyel? Ntwa anwernekantherr arraty ilay!”

<sup>63</sup> Jesus akater anak, tyerney-angenh. Atyetyart ilkwel ayernek arrpemarl, “Akenhel arem, nga arraty-antey atyeng ilelha! Ngenhang Christ Akngeyel anwernenhanterr ilek, ngenh thwenetyek anwernekantherr-warl, ahern nhewarl, Akngey-kenh alerikw?”

<sup>64</sup> Jesus ikwer ilelhek, “Ya, arrantherr areyenh, ayeng iteth alpenty Inkart Akngey-warl intem ayeng aney-alpeyenh ikwer-itwel. Ayeng Atyetyart ilkwa aneyenh intem-antey, Akngey-apeny. Arrantherr ayenh areyenh, Inkart Akngey-kenh apmer-they kwenpay-angkwarr apey-alpenty.”

<sup>65</sup> Artwa atyetyartel arnkwa ikwerenh ilterrek angkemel, “Nhenhey apmwel-areth angkeyel Akngeyek. Ran nhenhey Atyetyart Akngey-apeny-arrpanteyarl ilelheyel! Arrantherr renh awek rarl angkek Akngeyek.

<sup>66</sup> Nthakenh arrantherr iterreyel, nthakenh rarl apmwel-areth Akngeyek angkek?”

Rernem angkerrenh, “Arratyarl anwantherr renh ipmek atwem.”

<sup>67</sup> Artwa ingwer-rnemelan apelharl iwek, renh atwek. Ahelengkw-rnemel renh annga rag-el artek aparrng ilemel, renh atwemel.

<sup>68</sup> Artwa ahelengkw-rnemel renh ayernek, “Ngan akaltyarl, Akngey-kenh Impen. Angwenhel ngenh atweyel?”

*Peter irrtwyerremel ilelheyel*

*(Mark 14:66-72; Luke 22:54-62; John 18:15-18, 25-27)*

<sup>69</sup> Peter-an akethel anenh. Kwey warrkenh Atyetyart tyaty-areny-kenhel Peter renh alhengkarek ayernemel, “Ngan alhenhap Jesus Galilee-areny-angkwarr. Atha ngenh weth arekan, ngay?”

<sup>70</sup> Peter ilelhek irrtwyerremel, “Inpa, atha iterl-areyngarl renh.”

<sup>71</sup> Peter anperl-alhek keyt-warl. Kwey warrenh ingwerel Peter renh arek arrpemar. Ra ilek artwa ingwer-rnem-warl-anem, “Nhanyemarl ran Jesus Nazareth-areny-angkwarrarl alhenhan, atharl renh alhengkarekan.”

<sup>72</sup> Peter irrtwyerremel ilelhek arrpemar, “Akenhel arem, arrangkw, atha iterl-arey-angenh renh.”

<sup>73</sup> Artwa ingwer-rnemel Peter renh ilek, “Ingarl nga alhenh Jesus-angkwarr apmer Galilee-ampeny. Galilee-areny-apeny nga angkeyelan.”

<sup>74</sup> Peter irrtwyerremel ilelhek arrpemar, “Ingartel arem, arraty inngay ayeng angkem. Ayeng akwerrp, atha renh iterl-arey-angenh.” Peter-el renh tywek-tywek irrwey awek rarl ingwepenh arlkey-ayntek.

<sup>75</sup> Peter ra iterl-arek, renharl Jesus-el arwekel ilek-angkwarr, “Tywek-tywek irrwey ingwepenh arlkey-ayntekerr-awaty nga irrtwyerremel irrpety-inger ilelhem.” Kel Peter alpek. Rap artewentyel artnenh-anem.

## 27

*Pilate-el Jesus renh ayernemel arrkerneyel*  
(Mark 15:1; Luke 22:66; 23:1-2; John 18:28-32)

<sup>1</sup> Ingwepenh Atyetyart tyaty-areny-rnem-then, atyetyart apmer-areny-rnem-then, rernem akar-rirrek angkerretyek, Jesus renh atwetyek.

<sup>2</sup> Rernem-anem renh arertnemel, Atyetyart Pilate-warl atnwenhek.

*Judas ilweyel*  
(Acts 1:18-19)

<sup>3</sup> Judas-el kel ahelengkw-rnem-warl Jesus renh ahayiwek. Ranem ywarn iterrek amperrn-girremel. Rap angkepirrek tyaty-areny atyetyart ilkwernem-warl, Jew-rnem-kenh atyetyart-rnem-warl alhek-anem. Ra ngkwelty-rnem atyetyart tyaty-areny-rnem angkep antheynetyek-arrpantey.

<sup>4</sup> Ranem angkek nyerrirremel, “Ayeng-anem Akngey-angkwarr apmwelhilek, artwa mwerr innga atha ahayiwek ahelengkw-rnem-warl. Artwa alyelk ra apmwel-areth mpwarey-angenh.”

Rernem renh ilek, “Ntwap renh ahayiwek anwekantherr-warl. Anantherr arlarl.”

<sup>5</sup> Judas ran ngkwelty-rnem tyaty ilkwa kwen-warl iwek-penh, ranem ament ipmek aynterrar-rewelhek.

<sup>6</sup> Tyaty-areny atyetyart ilkwernemel ngkwelty renh akwetyemel, angkerrenh, “Artwa atwe-tyekarl antheкарl. Nthakenh ngkwelty nhenh angkep akwerney-angenh tyaty-warl.”

<sup>7</sup> Rernem angkerrek-anem, apmer aterterr renh ingwer-itwek payemeletyek. Rernem iterrenh, awenng angernetyek, alethang arrewaly akwernetyek. Artwa ahern-penh mpwarey-angker anyent ra apmer tharlemilek ikwer-rnem.

<sup>8</sup> Alakenh-they aley rernem “Apmer Arrkn-gangketyarr” itneweyel-antey.

<sup>9</sup> Jeremiah-kenh pip alakenh arraty innganem aynteyel, rarl arrwekel ilenh-angkwarr-antey: “Ngkwelty 30-el payemeletyek, man rernem Israel-kenh artwa anyentek payemeletyek.

<sup>10</sup> Rernem aterterr renh-anem payemelek, atnthepenh arnwarney-angker-kenh, Akngeyel renh-rnem ilanthe-k-angkwarr-antey.”

### *Pilate-el Jesus renh ayerneyel*

*(Mark 15:2-5; Luke 23:1-7; John 18:33-38)*

<sup>11</sup> Rernem Jesus renh atnwenhek Atyetyart Pilate ikwer-warl. Pilate-el Jesus renh ay-ernek, “Nganang Atyetyart ilkwa Jew-rnem-kenh, ngay?”

“Ya, alakenh nga angkeyel.” Jesus-el renh tyernek.

<sup>12</sup> Tyaty-areny atyetyart ilkwel-rnem Jesus renh ayntarrp-ilek, ra irrtywerremel ilelhenty-arrpantey. Jesus akater-anem rtnenh, tyerney-angenh.

<sup>13</sup> Pilate-el Jesus renh ayernekk arrpemar, “Ngenharl rernem ayntarrp-iley, nthakenh ngan angkem?”

<sup>14</sup> Jesus akater-anem rtnenh, tyerney-angenh. Atyetyart ra ikwer apatek-anem, rarl akater-anem rtnenhek.

*Pilate-el Jesus renh ipmelheyel, Barabbas renh tyayl-they tyarleweyel*

*(Mark 15:6-15; Luke 23:13-26; John 18:39-40; 19:6-16)*

<sup>15</sup> Aherrety arrpanenhel, amern tyenkerr arlkwenh apmelerr-angkwarr, Pilate-el artwa anyent tyayl-they tyarlewenh.

<sup>16</sup> Artwa Barabbas artwa apmwa innga tyayl-itwek anenh.

<sup>17</sup> Rernem ingkerrenh akarrirrek, Pilate-el renh-rnem ayernekk, “Angwenh athan tyarlewem tyayl-theyan? Barabbas apek? Jesus apek, rernem renh itneweyel Christ, Akngeyellarl ar-rwekel ilek, renh thwenetyek ahern nhenh-warl ingkerrenh itethiletyek.”

<sup>18</sup> Pilate-arl akalty, atyetyart-rnem Jesus-kety arlkarirrenh.

<sup>19</sup> Pilate-el renh tyatyemilenh-angkwarr-antey, Pilate-kenh anewikwel angka thwenek ikwer-warl, “Artwa alyelk yanh ipmay! Ayeng artwa yanhek ilkelhey-angenh, renh atwetyek, altyerr apmwa atha arek-penh.”

20 Tyaty-areny atyetyart ingwer-rnem-then rernem renh-rnem ingkerrenh ilek, “Arrantherr Pilate ilenherr-arey, ra artwa Barabbas tyayl-they tyarlewetyek, Jesus-ant atwetyek.”

21 Pilate-el renh-rnem ayernek arrpemar, “Artwa nthenh-apyen atha tyarleweman?”

Rernem arlkek, “Barabbas renhant tyarlewa!”

22 Pilate-el renh-rnem ayernek arrpemar, “Nthakenh atha Jesus renh ilem? Rernem renh Christ antweyel Akngeyelarl thwenek?”

Rernem arlkek artewentyel, “Renh arwerl iylpeyl-atherr-warl atanthenherr-arey, renh atwetyek!”

23 Pilate-el renh-rnem ayernek, “Ilekek atwetyek? Ran arlarl.”

Rernem artewentyel innga arlkek, “Renh arwerl iylpeyl-atherr-warl atanthenherr-arey, renh atwetyek!”

24 Atyetyart Pilate ra arek, ingkerrenh ahelirrenhant-anem. Kwatyel iltyatherr lhewelhek, angetherr ikwer-rnem-itwek, “Arrantherrant ilkelheyel renh atwetyek. Ayeng arlarl!”

25 Rernem renh ilek, “Kel menty anwenhanterr ayntarrp-ilem ingkerrenhel, renh ipmek atwenty-penh, ingkern-penh-rnem-then ayntarrp-ilem arrpemar.”

26 Pilate-el Barabbas renh tyarlewek, tyayl kwen-they. Pilate-el ahelengkw-rnem ilek, rernem Jesus renh whip-el atwayntetyek arwerl iylpeyl-atherr-warl atanthetyek.



*Rernem Jesus renh arrkentelhilemel ileyel  
(Mark 15:16-20; Luke 23:11; John 19:2-3)*

<sup>27</sup> Ahelengkwel-rnem Jesus renh atnwenhek warl ilkwa rlterrk-warl, warl Atyetyart ilkwa Rome-areny-kenh-warl. Ahelengkw ingwer-rnem ikwer-rnem-warl akarrirrek.

<sup>28</sup> Rernem arnkwa lhelek, ikwer-they, kwet arlpenty rnter-rnter-warl-anem renh akwernek.

<sup>29</sup> Rernem mwekart-apeny mpwarek, arreylp-angketyarr atyetyartek-arrpantey, Jesus akapwert-warl arrernemel, arwerl ilya arraty-warl arrernemel. Rernem renh arrkentelhilemel ilek kwenirremel, "Nganap Atyetyart ilkwa Jew-rnem-kenh."

<sup>30</sup> Rernem apelh ikwer-warl iwek, akapwert-anem renh arwerlel atwemel.

<sup>31</sup> Rernem irrpelthirremel kwanthenh-penh, rernem kwet lhelek, arnkwa ikwerenh-warl-anem akwernemel. Rernem renh atnwenhek, rernem renh atanthetyek, arwerl iylpeyl-atherr-warl.

*Ahelengkw-rnemel Jesus arwerl iylpeyl-atherr-warl atantheyel*

*(Mark 15:21-32; Luke 23:26-43; John 19:17-18)*

<sup>32</sup> Artwa anyent, itnan Simon apmer Cyrene-areny. Ahelengkw-rnemel arwerl iylpeyl-atherr-anem arrernek Simon ikwer-warl, ra arwerl renh aylpwer-akngeyn-ayntetyek. Simon-el arwerl iylpeyl-atherr iytarr-akngeynenh.

<sup>33</sup> Ahelengkw-rnemel Jesus renh apwert ilkwe-warl atnwenhek, apwert itnan Golgotha, apwert ngkwern akarnng-apeny.

<sup>34</sup> Ahelengkw-rnemel arwerl mwerr-angker alperr-penh ngkwarl wayn-warl thelek, Jesus renh anthemel, ra irrwampenty awelhekerr, renh arlelpiletyek, renh atanthenty arwerl iylpeyl-atherrek. Rap arrkernek-anem. Jesus-el ngkwarl menty arek, antywey-angenh.

<sup>35</sup> Ahelengkwel-rnem arnkwa ikwerenh lhelek, ahern-warl iwemel. Rernem Jesus renh arwerl iylpeyl-atherr-warl atanthek. Ahelengkwel-rnem arrkenirrek arnkwa Jesus-kenhek, antengiletyek.

<sup>36</sup> Kel rernem renh arenh-anem, arrernel-hemel.

<sup>37</sup> Ahelengkw-rnemel pip arrernek arwerl iylpeyl-atherr-warl angka ikwer-rnem-kenhakert, "Nhanyem Atyetyart Jew-rnem-kenh."

**Anayntileyel: Ahelengkw-rnemel pip ingkwernek, ra akengenty angkenty-arrpantey. Irrtywerremel renh tyatyemilek, ra angkenty-arrpantey. Angka arrwekeleny Rome-kenh apmelerr ayntenhangkwarr, pip alakenh arrernetyek.**

<sup>38</sup> Artwa apmwatherr rernem arrernek Jesus-angkwarr ilwetyek. Artwa apmwatherr rernem rnkernek, akwerrant-atherr, Jesus ampepekilemel.

<sup>39</sup> Akngerr angkepelar reng alhenh, Jesus ikwer irrpelthirrerl-anemel,

<sup>40</sup> Rernem arlkek, "Weth ntwal anwernen-hantherr ilek, ntwarl tyaty ilkwa Jew-rnem-kenh atakenty-penhel, ntwal tyaty ilkwa ingwer-anemarl artetyek akwel. Ngan arlertek ilkwakert akwel. Nga ament-anem itethelhila! Atwarra

arwerl iylpeyl-atherr-they!”

<sup>41</sup> Atyetyart ilkwa tyaty-areny-rnem-then atyetyart ingwer-rnem-then Moses-kenh-rnem-then, rernem ikwer irrpelthirrenh. Rernem arrkent ikwer angkerrenh,

<sup>42</sup> “Ran artwa ingkerrenh arntety-penh itethiley-angker, ranem ament-anem itethelhiley! Ra ament itethelhienty, anwantherr ingkerrenhelarlap iterl-areman, rap Atyetyart ilkwa Jew-rnem-kenharl aneman.

<sup>43</sup> Ra Akngey tnakeyel. Ra ilelhek, ra Akngey-kenh alerikw akwel. Akngeyelant renh itethilemer.”

<sup>44</sup> Artwa apmwa weth atherrel Jesus renh arrkentalhilenh arrpemar.

### *Jesus ilweyel*

*(Mark 15:33-41; Luke 23:44-49; John 19:28-30)*

<sup>45</sup> Ingkeny arlta ampepel ingwerrerl-alhek, atwerrpek-atwety.

<sup>46</sup> Jesus-el Akngey renh ayernek, “Akngey atyenh, Akngey atyenh, ilek-kety ntwā ayenh menty arek?”

<sup>47</sup> Ingwer-rnem Jesus-arrangarr rtnenherrenh. Rernem Jesus renh awenh, angkemel, “Jesus ra arlkeyel Elijah ikwer. Elijah Akngey-kenh angkakert arrwekeleny ran.”

<sup>48</sup> Artwa anyentel ngkwarl wayn-warl antywer renh apelyilek, Jesus renh arwerl arlpenty-they antywetyek.

<sup>49</sup> Ingwer-rnem angkerrenh, “Anwantherr mpwelhey Elijah ikwer-warl apetyetyek, renh arwerl iylpeyl-atherr-they tyarlewenty anwantherr aretyek.”

<sup>50</sup> Kel Jesus arlkek, ilwemel.

<sup>51</sup> Rag arlpenty Jew-kenh tyaty ilkwitwek ilerrelhek, irwerl-they, kwenek-atwety. Ahern akngenherl-akngenhelhilek. Apwert-rnem akelhemel ngkweltyirremel.

<sup>52</sup> Awenng-rnem altywerirrek, arrewaly-rnem itethirrek, Inkart-angkwarr apenteyel-rnemarl.

<sup>53</sup> Rernem awenng-they akemirrek. Ra itethirrek-penh, rernem Jerusalem-warl alhek. Rernem aremirrek, akngerr ingwer-rnemek,

<sup>54</sup> Atyetyart ahelengkw-rnem-kenh ahelengkw-rnem-then rernem arek. Rernem ahern akngelhenh-akngelhenhek awelhek. Rernem aterirrek angkerrenh, “Jesus ranap Akngey-kenh Alerikw inngarl ilenhey.”

<sup>55</sup> Arelh akngerr rernem akarrirrek apmer Galilee-they, renh arntarnt-aretyek, Jesus arwerl iylpeyl-atherrek ilwey-alenty. Rernem Galilee-they apetyek. Rernem arleng-they arntarnt-arelhenh.

<sup>56</sup> Mary Magdala-areny, Mary ingwer-then, James-then Joseph-then, ikwer-atherrenh amikw, ingwer, James-then John-kenh amikw, rernem ikwer-rnem-itwel rtnenh. James-then John-then Zebedee-kenh alerikw-atherr anenh.

*Rernem Jesus renh awenng intey-warl akwerneyel*

*(Mark 15:42-47; Luke 23:50-56; John 19:38-42)*

57 Atwerrp, artwa man-angketyarr apetyek itnan Joseph, artwa mwerr Inkart-areny apmer ingwer-areny itnan Arimathea.

58 Joseph-el Pilate renh ayernek, arrewalyek. Pilate-el ingwer ilek, ra arrewaly renh arwerl iylpeyl-atherr-they atwarrelhiletyek, Joseph renh anthetyek.

59 Arnkwa mwerrel-anem ataperrelek.

60 Joseph-kenhel-rnem arrewaly renh intey awenng-warl akwernek. Intey awenng renh ilkwilek awank-akerr, arrewaly-anem intey-warl akwerney-alenty, apwert ilkwa arriw-itwek ar- rkingertiwemel. Kel ra alpek-anem.

61 Mary Magdala-areny-then, Mary ingwer-then ratherr intey akarelhilenh.

62 Ingwepenh arlta ltyerrey-angker ikwerel, tyaty-areny atyetyart ilkwernem-then artwa Pharisee-rnem-then Pilate-warl akarrirrek.

63 Rernem ikwer angkek, "Jesus ra irrtysterremel ikwer-rnem ilelhenty-arrpantey, ingwa atherr-penh ipmepenh itethirremel apeyalpetyek-arrpantey.

64 Artwernem irrpety thwenay, arriw ilenh akarerl-ayntetyek arlta irrpetyek-atwety, kwertengerl ikwerenh-rnemel ipma renh tyerremel akngekerr, ingwer-rnem-anem ilekerr, itethirrenty-arrpantey."

65 Pilate-el renh-rnem ilek, "Ahelengkw-rnem atnwenha, rernem awenng renh akarerl-ayntetyek."

66 Atyetyart rernem apwert renh mwantyel akentek rlterrk, ahelengkw renh-rnem-anem rnkernek, awenng renh akarerl-ayntetyek.

## 28

*Jesus ipmepenh itethirreyel*

*(Mark 16:1-8; Luke 24:1-12; John 20:1-10)*

<sup>1</sup> Arlta ltyerrey-angker Ingkeny tyerrelhey-alentyel, Mary Magdala-areny Mary ingwer-then alhek, intey renh aretyek.

<sup>2</sup> Ikwer-penh ahern akngelhekarl ratherr awek, Ingkart-kenh angel ikwer-atherr-warl apetyek irrwerl-they. Ranem apwert renh atwepert-iwek, ranem apwert ikwer-itwek anenh.

<sup>3</sup> Angel ranem lyenentyel-apeny arrtyernek, arnkwan ikwerenh arlter innga.

<sup>4</sup> Ahelengkw-rnem aterirremel ahern-warl aytnek, ipmapeny-anem ayntenh.

<sup>5</sup> Angel angkek ikwer-atherr, "Aterirrey-angenh anenherr-atherr! Atha mpwelanth iterl-areyel. Mpwelanth Jesus-ek nthweyel, arwerl ilpeyl-atherr-warl atanthekek.

<sup>6</sup> Ra nhenh aney-angenh-anem. Akngeyel renh itethilek, weth rarl ingkerrenhek arrwekel ilelhek-angkwarr. Apetyenherr-atherr, intey renh aretyek, rarl ayntenh.

<sup>7</sup> Alhenherr-atherr, kwertengerl ikwerenh-rnem iletiek, rarl ipmepenh itethirrek. Ra Galilee-warl alhek arrwekel, arrantherr alhetyek renh arey-alhetyek. Alakenh-anyem ayeng angkakert apetyek, mpwelenhant atha ilek."

*Jesus aremirrek kwertengerl ikwerenh-rnem-warl*

*(Luke 24:36-49; John 20:19-31)*

<sup>8</sup> Ratherr aterirremel-antey anterrek inkwerel-hemel, kwertengerl-rnem iletiek.

<sup>9</sup> Jesus-el renh-atherr rlwatek, ratherr-anem kwenirremel arrernelhek ingkety atherr anter-  
rkwek, ikwer inkwerelhek.

<sup>10</sup> Jesus angkek, "Aterirrey-angenh, kwertengerl atyenh-rnem ilenherr-arey, rernem ayenh Galilee ikwer-itwek arey-alhetyek."

<sup>11</sup> Ratherr alhenharl-antey ahelengkw-rnem tern ilkwewarl alhek. Rernem tyaty-areny atyetyart-rnemek angka ilek.

<sup>12</sup> Atyetyart tyaty-areny-rnem-then rernem angkerrenh, ahelengkw-rnem payemeletiek rernem menty akater anayntetyek, ingwer-rnemek angka Jesus-akert iley-angenh, rarl itethirrek. Atyetyart ingwer-rnem angkerrenh arrpemarlarl.

<sup>13</sup> "Ingwer-rnem ilayntenherr-arey, kwertengerl weth-rnemelarlarl arrewaly tyerremel irrtiert akngek, awenng-they. Anwantherr arnkwa ayntenharl-antey.

<sup>14</sup> Pilate ra angka awenty, mwerrarl anwantherr renh ilem, nthakenh arrenhantherr aytarrp-ileyangarl."

<sup>15</sup> Rernem ahelengkw-rnem man payemelek. Rernem-anem akater anenh. Apmer Judea-areny-rnem rernem arraty iterl-arey-angenh-antey.

*Jesus alker-warlarl alpeyel*

*(Mark 16:19-20; Luke 24:50-53; John 20:19-23; Acts 1:6-11)*

<sup>16</sup> Kwertengerl 11-pel alhek Galilee-warl, apwert ilkwewarl, Jesus-el kel renh-rnem ilek arwekel, renh rlwatetyek.

<sup>17</sup> Rernem renh arek, ikwer inkwerelhemel. Ingwer-rnem arrangwarl, ikwer irrpelthirrenh.

<sup>18</sup> Jesus ikwer-rnem-warl apetyek angkemel, “Akngeyel ayenh arrernek, alker-areny-rnemek, ahern-areny-rnemek, Ingkart ingkerrenhek anetyek.

<sup>19</sup> Apmer arrpanenh-warl alhenherr-arey, ingkerrenh akalty-anthetyek, rernem kwertengerl atyeng-anem anayntetyek. Baptise-emelenherr-arey renh-rnem itna Akngeyek, Alerek, Itnweng Rlwartek angkemel.

<sup>20</sup> Akalty-anthenherr-arey renh-rnem, angka atyenh ingkerrenh ywerreyek-atwety. Ayeng arrekant Herr-itwek aneyenh, ahern nhenh ywerreyek-atwety.”



**Alyawarr Bible**  
**Portions of the Holy Bible in the Alyawarr language**  
**of Australia**

copyright © 2009 Wycliffe Bible Translators

Language: Alyawarr

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2023-11-10

---

PDF generated using Haiola and XeLaTeX on 18 Apr 2025 from source files dated 10 Nov 2023

284d4e02-292d-5bd8-a8a6-8360a307b937